

**SEVENTH LEGISLATIVE ASSEMBLY OF MIZORAM  
( FIFTH SESSION )**

**LIST OF BUSINESS**

FOR FOURTH SITTING ON FRIDAY, THE 20<sup>th</sup> MARCH, 2015  
( Time 10:30 A.M. to 1:00 P.M. and 2:00 P.M. to 4:00 P.M. )

**QUESTIONS**

1. **Questions** entered in separate list to be asked and oral answers given.

**PRIVATE MEMBERS' BUSINESS**

2. \* Resolutions

NGURTHANZUALA  
Secretary

---

\* Please see Bulletin Part-II No. 73, dated the 17<sup>th</sup> March, 2015 for relative precedence of Private Members' Resolutions to be moved.

**DEPUTY SPEAKER** : Rorelnaah chuan fel lo takin in rel tur a ni lo; mi rethei i thlei tur a ni lo va, mi thiltithe i zah chuang tur a ni lo va, fel takin i thenawm ro i rel sak tur a ni. Leveticus 19 : 15

Awle, zawhna leh chhanna kan la ang a Starred Question No. 21-na zawt turin member zahawm tak Dr. K. Beichhua ilo sawm ang.

**Dr. K. BEICHHUA** : Pu Deputy Speaker, ka lawm e, Starred Question No. 21-na P.W.D changtu Minister zahawm tak ka zawhna chu –

- (a) Lunglei J.B. College Building sak nan estimate amount engzatnge ?
- (b) Tunge contractor ?
- (c) Hna zawh hun tur engtik nge ni ang ?
- (d) Building sak nan sorkarin sum engzatnge a dawn tawh ? Contractor hnenah engzatnge released ni tawh ?
- (e) Building sak Physical Achievement engzatnge ni tawh ?

**DEPUTY SPEAKER** : Chhang turin Hon'ble Chief Minister, House Leader ni bawk Pu Lal Thanhawla ilo sawm ang.

**Pu LAL THANHAWLA, CHIEF MINISTER** : Pu Deputy Speaker, Member zahawm tak Dr. K. Beichhua zawhna chhanna chu hetiang hi a ni –

- (a) Estimated amount chu ₹ 142.50 lakhs a ni.
- (b) Contractor chu Pu Lalchhuanmawia, Class-I Constrctor, College Veng, Aizawl a ni.
- (c) Dt. 30.4.2015-ah zawh tum a ni.
- (d) ₹ 53.63 lakhs hmuh tawh a ni a, Contractor hnenah ₹ 53.63 lakhs released tawh a ni.
- (e) 97% zawh tawh a ni.

**DEPUTY SPEAKER** : Zawhbelhna a awm em ?

**Dr. K. BEICHHUA** : Pu Deputy Speaker, physical achievement kha 97% a ni tih kan lo hria a, chutih lai chuan pawisa dawn tawh kha ₹ 53.63 lakhs a ni a, hei hi engvanga DoNER lam atanga la dawng lo nge kan nih tih kha ka zawhbelhna pakhatna ni ta se. Tin, he College hi College tha tak a ni a, building room te leh students room atan te contractor hnena phalna an hmuh anga luah an ni tawh a. Mahse, ground floor hi luah theih a la ni lova, a chhan chu contractor hnen atanga phalna an la lak loh avangin harsatna namen lo tunah sawn an tawh a ni. Chuvang chuan, he sum la hmuh loh hi DoNER lamah sorkar hian tun aia chak zawk hian hma lak dan a awm ang em tih kha ka zawhbelhna a ni e.

**DEPUTY SPEAKER** : Zawhbelhna dang Er. Lalrinawma

**Er. LALRINAWMA** : Pu Deputy Speaker, ka lawm e. Tuna chhanna atang khan physical achievement kha 97%, financial achievement kha 37.6% a ni a, a inthlau khawp mai a, pawisa dawn leh hnathawh hi. Khati a nih lai karah khan price escalation-te hi claim ta sela, claim thei dinhmunah a ding niin a lang a, claim ta se he estimate hian a zo pha ang em? Nge hun kal a saw chhiar belh sak zel a ni em tih ka zawt e. Contractor hi tuna a hunlai a hi hna zo lo anga chhiar sak zel a ni em? Ni ta ang se a daih dawn em tih ka zawt e.

**DEPUTY SPEAKER** : Zawhbelhna dang a awm em? Chhang turin Chief Minister zahawm tak ilo sawm ang.

**Pu LAL THANHAWLA, CHIEF MINISTER** : Pu Deputy Speaker, J.B. College building sakna hna hi infrastructure development various in Mizoram, Coolege 10 vel lai tana sum dil atang a sak a ni a, chumi amount chu ₹ 1367.64 lakhs (cheng nuai sangkhat zathum sawmruk pasarih leh point sawmruk pali) a ni. Tin, NLCP atangin sanction hmuh a ni a, J.B. College atan bik hian a amount hi ₹ 142.50 lakhs (cheng nuai za sawmli pahnih point sawmnga) a ni. DoNER in 1<sup>st</sup> instalment atan 51.29 crore (cheng crore 51 leh nuai 29) a release tawh a, state share nuai 2.34 Mizoram sorkarin a release

tawh a, a vaia sum hmuh tawh zawng zawng chu cheng nuai 53.63 a ni. A hna hi tender koh hnuah Pu Lalchhuanmawia, Class-I Contractor, College Veng, Aizawl hnenah ni 8.5.2012-ah pek a ni a. Civil works zawng hi contractor hian a zo tawh a, internal electrification hi sum hmuh loh vangin la thawh loh a ni. Amaherawhchu, mamawhna avangin Pu Deputy Speaker, civil works zawh theih ang chin chin zawh a nih rual hian luah nghal a ni a, fund hmuh dan a zirin ni 30.4.2015 ah zawhfel tum a ni. Chu chu a dinhmun tlangpui a ni a, contract agreement-ah hian escalation clause a tel loh avangin escalation kha chu ka sawi mai thei lova, chu chu tuna a dinhmun a ni.

**DEPUTY SPEAKER** : Starred Question No. 22-na zawt turin member zahawm tak Pu Chalrosanga Ralte ilo sawm ang.

**Pu CHALROSANGA RALTE** : Pu Deputy Speaker, ka lawm e. Ka zawhna Starred Question No. 22-na School Education Minister zahawm tak ka zawhna chu – Sorkar hian Primary School leh Middle School hlui tawhte hi siamtha tura ruahmanna a nei em ?

\* Speech not corrected.

**DEPUTY SPEAKER** : Chhang turin a changtu Minister zahawm tak Pu H. Rohluna ilo sawm ang.

**Pu H. ROHLUNA MINISTER** : Pu Deputy Speaker, member zahawm tak Pu Chalrosanga Ralte zawhna chhanna chu – Primary School leh Middle School hlui tawhte hi siamtha turin ruahmanna a nei a, sum awm dan azirin hma lak tum a ni.

\*Speech not corrected.

**DEPUTY SPEAKER** : Zawhbelhna Pu Chalrosanga Ralte

**Pu CHALROSANGA RALTE** : Pu Deputy Speaker, a lawmawm khawp mai kan Education Minister-in ruahmanna a awm e, a rawn ti a. Mizoram hmun hrang hrangah kan zin kual a, Primary School leh Middle

School te hi a hlui tawh hlawm hle a, a bik takin ka Bial chhunga Lunglei West bik saw bialtu leh enkawltu neilo ang mai sawn Primary leh Middle School ho saw a chhe tawh hlawm hle mai a, Rahsi Vengah te, Vanhne-ah te, Buarpui-ah te sawn. Chuvang chuan helaiah hian zawhna ni em em lovin ngenna angin, kha ruahmanna an siamna turah khan Lunglei 'W' bial saw min lo duhsak bik turin khawngaihin ka rawn ngen a ni.

\* Speech not corrected.

**DEPUTY SPEAKER** : Er. Lalrinawma

**Er. LALRINAWMA** : Pu Deputy Speaker, ka lawm e. Ka zawhbelhna chu tun dinhmunah hian heng School te maintenance-na tur hi ruahmanna a awm em tih kha ni se. Ruahmanna awm ni ta se kum khatah school pakhatah engzat nge ruahman a nih ? A tlem viau nge ni ? Tih pun theih te a ni em tih ka zawhbelh nghal e.

**DEPUTY SPEAKER** : Dr. K. Beichhua

**Dr. K. BEICHHUA** : Pu Deputy Speaker, a zawhna hi school hlui leh Middle School hlui nge ni a building hlui tih hi ka chiang lo va, khalai kha clarification ka rawn dil a ni.

**DEPUTY SPEAKER** : Pathum kan la tawh a, mahse Pu Ruatkima saw a phar ve si a, sawm lawk ang aw.

**Pu LALRUATKIMA** : Pu Deputy Speaker, ka lawm e. A zawhna neitu kan MLA zahawm tak khan a sawi a. A bial chhunga Primary School leh Middle School a hlui tawh thu a sawi a. Kan school tam tak hi 1935 bawr vel ami te pawh an ni awm e. Chuvang chuan a zawhna kha a chhangtu Hon'ble Education Minister tan pawh khan a harsa in ka ring a. Ka hmaa sawitu sawi ang khan school building hlui tawh a tihna nge ni ang a, school hlui tawh khawi zawk kha nge siam that tur tih lai tak kha ka ngaihtuahnaah a awm a, chuvang chuan kan phar a ni e.

**DEPUTY SPEAKER** : An hrefiah duh a ni mai a, Minister zahawm tak ilo sawm ang.

**Pu H. ROHLUNA, MINISTER** : Pu Deputy Speaker, ni e, member zahawm takte hi chuan hrethiam mai turah kan ngai a, mahse thutna lam a dan hi chuan thil hi han kher tur te te te pawh hi a awm ve thin bawk a nia. Zawhna neituin a zawhbelhna kha chu han chhan vak ngai niin ka hre lo va, ngenna a ni a. A theih ang ang chuan hei chu lo enzui tur a ni a. Er. Lalrinawma zawhbelhna kha school mal te te ang hi chuan tunah hian ka sawi mai thei lo va. Amaherawhchu a theih ang angin a school building hlui tawh, dilapidated building kan han tih ho ang hi chu a theih ang angin sum awm dan azirin thawmthat kan tum a, kan en chho mek a.

Tun 2015-16 fianancial year hi chuan a zavaiin ti thei lo mah ila, tul zual hi chu tih theih chu kan inbeisei a ni, beiseinain kan thlir mek a ni.

Tin, Dr. K. Beichhua, kan member zahawm takin building nge school hlui tih kha. A school chu a upat poh leh a senior a ni mai a, mahse building hi Mizo tawngah hian va sawi tel kher a ni lo mai thei a, mahse a zawttu khan a kawh tuma kha chu a building hlui tawh a ni tih kha chu chiang maiah kan ngai a. Chuvang chuan sawifiah hranpa ngai lo turah kan ngai a. A building lo kha chu school chu va siamthat vak thu kha chu a awm rih lo a ni. Chu chu a nia member zahawm tak Pu Lalruatkima han sawi pawh kha a thuhmun tho niin ka hria a. Ka chhannaah khan ka chhang kim thovin ka hria, school hlui han tih khan a building hlui tihna turah keini chuan kan ngai a ni.

\* Speech not corrected.

**DEPUTY SPEAKER** : Awle, Starred Question No. 23-na zawt turin member zahawm tak Pu Lalruatkima ilo sawm ang.

**Pu LALRUATKIMA** : Pu Deputy Speaker, ka Starred Question No.23-na PWD changtu Minister zahawm tak chhan atan –

- (a) Vaivakawn to Mizoram University kawng siamthatna atan hian sum engzatnge ruahman a nih? Engzat nge hmuh a nih tawh?
- (b) Widening leh Pavement hnathawhna turin sum engzat te nge ruahman a nih? Contractor hnenah engzat nge pek a nih tawh?
- (c) Tute nge Contractor? Agreement angin engtika thawh zawh tura ruahman nge a nih?
- (d) Sum hi engtikah nge hmuh leh beisei a nih? Hna te hi engchen nge thawh (physical achievement) a nih tawh tih ka zawt e.

**DEPUTY SPEAKER** : Awle chhang turin Chief Minister zahawm tak Pu Lal Thanhawla ilo sawm ang.

**Pu LAL THANHAWLA, CHIEF MINISTER** : Pu Deputy Speaker, member zahawm tak zawhna chhanna chu –

- (a) Vaivakawn to Mizoram University kawng siam thatna atan hian sum ruahman zat DPR (Detail Project Report) chu ₹ 19.07 crores (vaibelchhia) a ni a. Sum hmuh tawh zat chu ₹ 7.82 crores a ni.
- (b) Widening atan hian ₹ 2.99 crores ruahman a ni a, Pavement atan hian ₹ 9.15 crores ruahman a ni bawk. Widening atan hian ₹ 1.77 crores pek tawh a ni a. pavement atan hi ₹ 2.44 crores pek tawh a ni bawk.
- (c) Widening contractor hi G.P.Project Pvt. Ltd. a ni a. Thawh zawh hun tur chu ni 14.12.2012 a ni. Tin, pavement contractor chu Sunshine Overseas Pvt. Ltd., a ni a, thawh zawh hun tur chu ni 30.11.2013 a ni.
- (d) Fund hi hmuh leh beisei mek a ni a. Widening hi 100% zawh tawh a ni a, pavement hi 83% zawh tawh a ni a. Tin, permanent works hi 96% zawh tawh a ni bawk.

**DEPUTY SPEAKER** : Zawhbelhna a awm em? Pu Lalruatkima.

**Pu LALRUATKIMA** : Pu Deputy Speaker, ka lawm e. Kan hriat angin helai kawng hi a bialtu MLA zahawm tak damlohna avanga arawn tel theih loh avangin ka zawt a ni. A lawmawm khawp mai a, minrawn chhang Chiang a. Amaherawhchu khulai Ch. Chhunga High School atanga Chawlhmun Kawn thleng khuan black-top hna hi tun thlengin khawih ala ni

lo va. Chuvang chuan engtikah nge khuti lai khu khawih a nih dawn ? Chanchinbu lamah tunhnaiah kan UD&PA Minister zahawm tak khan siam mai turin ruahmanna ka lo siam e JNNURM pawisa a ni a, a ti a. Engtikah nge hna kan tan ang, hei fur ruahtui a tla mai dawn a, a kawng khu tun hnaia ka kal chuan a khu em em mai a, ruah a rawn tla a a diak leh em em mai bawk a. Chuvang chuan tun thal hun chhung hian kan thawk thei ang em ? Thawk turin ruahmanna kan nei em tih kan zawh belh a ni e.

**DEPUTY SPEAKER** : Zawhbelhna dang a awm em ? A awm lo maw ? Chhang turin Chief Minister zahawm tak ilo sawm ang.

**Pu LAL THANHAWLA, CHIEF MINISTER** : Pu Deputy Speaker, a zawhna bak thenkhat hriat ve atan Vaivakawn to Mizoram University kawng 10 kms leh a chanve a sei siamthat nan hian JNNURM atangin kan hriat tawh ang khan vaibelchhe 19.07 hmuh a ni. Tun dinhmunah chuan 7.82 crores hmuh tawh niin widening atan ₹ 1.77 crores leh pavement atan ₹ 2.44 crores leh permanent work chi hrang hrang atan ₹ 3.61 crores hman a ni tawh a. Tunah hian widening bik atan ₹ 65 lakhs leh pavement atan ₹ 7.59 crores leh pavement works atan ₹ 85 lakhs bat a ni a. Pavement hna bik hi 1 km leh 80 meters a thui thawh loh la niin thawh zawh thuai tum a ni a. Thawh zawh hun tura hna thawh zawh a nih theih lohna chhan hi central atanga fund lo kal tura beisei a hun tak kan hmuh thin loh vang a ni. Tin, central atangin fund hi lo kal tura beisei a ni a, tuna physical progress hi widening 100% zawh tawh, pavement 83% zawh tawh niin permanent works hi 95% zawh tawh a ni a. Fund hi central atanga hmuh vele hna hi zawh fel thuai tura tih a ni a. Tin, hemi lai allot bak 1 km leh tlem awm khu tun thawhtanni atang khan an thawh tawh ka ring.

**DEPUTY SPEAKER** : Le, Starred Question No. 24-na zawt turin member zahawm tak Er. Lalrinawma sawm ila.



**Er. LALRINAWMA** : Pu Deputy Speaker, ka lawm e. Ka Starred Question No. 24-na Food, Civil Supplies & Consumer Affairs Department changtu Minister zahawm tak hnena ka zawhna chu –

- (a) Tun dinhmunah Mizoram chhungah Ration Card engzat nge awm ?
- (b) Ration Card-a mihring chuang zawng zawng engzat nge tih a ni e.

**DEPUTY SPEAKER** : Awle, chhang turin Minister zahawm tak Pu John Rotluangliana ilo sawm ang.

**Pu JOHN ROTLUANGLIANA, MINISTER** : Pu Deputy Speaker, member zahawm tak Er. Lalrinawma zawhna Starred Question No. 24-na chhanna chu –

(a)	APL	:	211784 as on 5.3.2015
	BPL	:	41900
	AAY	:	<u>26100</u>
	TOTAL	:	279784

(b)	APL	:	1276657
	BPL	:	199143
	AAY	:	115733
	Total	:	1591533

Pu Deputy Speaker, kan sawi zau lawk duh chu, ram pum population ai hian ration card-a mihring chuang zat hi kan tam zawk a, hei hi District hrang hrang a kan DCSO ten an rawn report dan a ni. Engpawhnise, tunah hian End to End computerization kan ti a, kan zo tep tawh a, kan zawh hunah chuan ration card lem a awm tawh lo ang a, tin, tuna kan population ang hi ration card population-ah pawh dik taka a lo chhuah theih tawh kan beisei, ka lawm e.

**DEPUTY SPEAKER** : Zawhbelhna a awm em ? Awm loh chuan Starred Question No 25-na zawt turin Pu Lalthanliana ilo sawm ang.

**Pu LALTHANLIANA** : Pu Deputy Speaker, ka lawm e. Minister zahawm tak, Disaster Management & Rehabilitation changtu chhan atan ka starred question chu heng te hi a ni e :-

Ramhlun sports complex leh Ramhlun Vengthar leimin control leh tihnepna atana hnathawh mekah hian :-

- a) Hnathawh tura ruahman atangin engzat percent nge thawh zawh a nih tawh ?
- b) Engtik hun chhunga thawh zawh tur nge ?

\*Speech not corrected.

**Pu C. NGUNLIANCHUNGA, MINISTER** : Pu Deputy Speaker, ka lawm e. Member zahawm tak Pu Lalthanliana zawhna chhanna chu :-

- a) Hnathawh tur ruahman dan hi phase 3 a then a ni a, 1<sup>st</sup>, 2<sup>nd</sup> & 3<sup>rd</sup> phase te an ni a.
- b) Tun dinhmunah 1<sup>st</sup> phase thawh zawh tep a ni tawh a, 89.5% zo tawh anga chhut a ni.

Phase pumpui atang chuan 23.6% zo tawh anga chhut a ni. Hnathawh zawh hun chhung tur hi ruahman dan ang chuan –

1<sup>st</sup> Phase (2013-2014)

2<sup>nd</sup> Phase (2014-2015)

3<sup>rd</sup> Phase (2015-2016) ang a ruahman ani.

\*Speech not corrected.

**Pu LALTHANLIANA** : Pu Deputy Speaker, zawhbelhna chiah chu a ni lova, han sawi zau ka duh a. Rehabilitation hmunah sawn in te sak a ni tawh hlawm a, thenkhat chu an pem thla tawh a, chuvangin tui leh eng (light) an mamawh ta tlat mai a, tuna awmsa sawn a khawchhung atanga pawh thlak pawhin a daih dawn silova, chuvang chuan tui leh eng (light) hi an mamawh ang zat min ngaihtuah ran sak theih chuan a va lawmawm dawn em tih kha ka'n ngen duh a ni e, ka lawm e.

\*Speech not corrected.

**Dr. NGURDINGLIANA** : Pu Deputy Speaker, ka lawm e. Ka zawhbelh duh chu ka bial Phullen khuaah tunah khian a khaw luh tirh Presbyterian biak in thlang chiah ah kum tin mai lei che a awm a, tunah hian in 6 thiah tawh a ni a, kumin fur ah hian tui a tam phei chuan in 20 chuang thiah leh tur a ni dawn a. Khimi kawng khi khaw 6 kalna kawng a ni a, fur lai phei chuan traffic te pawh a ti jam nasa thin khawp mai a, kum 2010 khan Geology & Mining Department ho khan an han en a, hma min rawn lak sak mai dawn emaw kan tih laiin kut thlak a awm ta lova, chuvangin chhiatna rapthlak kan tawh hma hian kan Minister zahawm tak hian concept note theh lut kher lovin an department pawisa neih atanga min siam sak theih chuan ka lawm khawp ang.

**DEPUTY SPEAKER** : Zawhna pawh a ni chiah lova, Ramhlun atangin Phullen-ah, Minister-in a chhang tho dawn em ?

**Pu C. NGUNLIANCHUNGA, MINISTER** : Pu Deputy Speaker, ka lawm e. Question neituin a ngenna pawh kha han chhang law law ila 2<sup>nd</sup> phase atang hian power transmission atan nuai 25 ruahman a ni a, water supply atan hian nuai 50 ruahman a ni. Tunah hian cheng nuai khat zathum sawmkua lehsang thum hi Finance department a release turin ruahman mek a ni.

Tuna Pu Ngurdingliana sawi kha engpawhnise kan en a, a dinhmun te zir chian phawt loh chuan heti lai atangin kan tih theih leh theih loh kha sawi a har a, sorkar-in a lo hria ang e.

\* Speech not corrected.

**DEPUTY SPEAKER** : Starred Question No 26 na zawt turin member zahawm tak Pu Lalruatkima ilo sawm ang.

**Pu LALRUATKIMA** : Pu Deputy Speaker, ka lawm e. Kan Minister zahawm tak chhan atan -

a) Mizoram Sports Policy kan nei tawh em ? Kan neilo a nih chuan enge a chhan ?

- b) Engtikah nge neih a nih ang ?
- c) Mizoram Olympic Association (MOA) hmalakna engte nge ? Term hi kum eng zat tur nge ? MOA hruaitute tute nge ?

**Pu ZODINTLUANGA, MINISTER** : Pu Deputy Speaker, ka lawm e. Kan member zahawm tak zawhna hi MSOA Sr. Vice President ka nihna chuan ka chhang thei tho va, mahse sorkar anga Sports Minister ka nihna ang chuan chhan chi ah kan ngailo deuh va. A chhan chu Association pakhat ve mai sorkarah pawh affiliation neih neih lo khu ti lamah Indian Olympic Association hnuai in affiliate an ni a, b)-na nen khan ka chhan dan chu a ni e.

- a) Mizoram Sorkarin Drafting Committee a ruat angin Drafting Committee hian sorkar-ah draft sports policy a thehltut tawh a. Duhthusam lo lai a la awm avangin tun dinhmunah sorkarin a la pawm lo a ni.
- b) Draft Sports Policy sorkar-in a pawm hnuah Sports Policy neih a ni ang.
- c) MOA hi Mizoram-ah a awm tawh lova, MSOA kan ti a, independent body a ni a, Mizoram sorkarin kumtin Grant-in-Aid a pek bak chu an inrelbawlnaah inrawlhna a nei lo.

\* Speech not corrected.

**DEPUTY SPEAKER** : Kan Dan Rule 42 hian subject matter of question-ah hian “The question must relate to a matter of administration for which the government is responsible” a ti a, sorkarin mawhphurhna a neih leh khang ang kha a zawhna tur a ni a, khami nilo Association ringawt va zawh kha chuan Martar Association hruaitu tute nge, an term chhung eng chen nge tih te kha an rawn zawt ang a, sorkar in buai lutuk palh ang e. Pu Ruatkima zawhbelhna.

**Pu LALRUATKIMA** : Pu Deputy Speaker, ka lawm e. Mizoram Sports Policy Drafting Committee-in an thehluhna hi July 2009 daih tawh kha a ni a, kum 5 chuang a kal liam leh tawh a, tunah la peih loh kan ti bawk si a, engtizia nge a va muthlu rei ta ve mawle, kan Minister hian tan

rawn la thar leh sela (interruption)...infiamna kawng hrang hrang a Association te tana hamthatna awm thei thil a nih avangin min hmanhmawh sak thei lawm ni tih kha ka zawhna a ni a. Mizoram State Olympic Association kha a hnuaia affiliation recognized unit ho kha discipline hrang hrangah khan Mizoram State Sports Council in a pawm ve tulna chin te a lo awm a, phei khai rual taka kal an nihna chin kha a awm a ni. Tunah pawh Indian Olympic Association in a pawm loh discipline dang te chuan an va dawr hlei thei lo kha a nihna chen a awm a, inkaihnawihna chin a awm avangin ka rawn zawt tel duh a ni e.

**Pu VANLALZAWMA** : Pu Deputy Speaker, ka lawm e, zawhbelhna MSOA kha kan ngaihthlak ang khan sorkar body a ni lova, a in enkawl nan khan sum leh paite hi sorkar atang hian an hmu em? Engzatnge an hmuh tih leh khulam atangin an dawn tih te kha kan hre fiah duh deuh a ni.

**DEPUTY SPEAKER** : Grant-in-Aid pek a nih thu kha a chhang tawh a, khang te nen khan zawhbelhna a awm em? Minister zahawm tak i lo sawm ang.

**Pu ZODINTLUANGA, MINISTER** : Pu Deputy Speaker, nia, kan sports policy hi neih tha kan ti a. Amaherawhchu, kan Drafting Committee-ten thahnem an ngai em em a, tunah hian kan en rei tawh tih pawh kha a dik a, tuna kan member zahawm tak Pu Ruatkima pawh kha a copy kan lo pe ve ang a, min lo enpui ve theih chuan a lawmawm ngawt ang. A chhan chu, a Committee-in a duh kha chu duhthusam ang tak a ni a. Amaherawhchu, sawrkar-in a tih theih loh tam tak rawn ruahmante kha a nih avangin uluk taka enkawl a ngai a. Sawrkar chu a inthlak a, sawrkar tharte a lo piang thin a. Khang zingah khanin sports lama ti tha zawng zawngte sawrkar hna a luh vek ang chi, khatiang ang chi te kha siam that ngai tam tak a awm avangin ennawn leh a ngai a ni tih kha ka chhanna a ni e. Ka lawm e.

\* Speech not corrected.

**DEPUTY SPEAKER** : ‘Engzah nge pek a nih’ tih vel kha chhan a ngai em ?

**Pu ZODINTLUANGA, MINISTER** : Pu Deputy Speaker, kan member zahawm tak Pu Zawma rawh zawh belhna kha nichinah khan, original answer-ah khanin ka rawn ti tawh a. Mizoram sawrkar-in kum tih Grants-in-Aid a pe a. Kum tin Mizoram Olympic Association-ah Nuai sawmhnih pek thin a ni. Chu chu a kim mai em ?

\* Speech not corrected.

**DEPUTY SPEAKER** : Awle, House Leader.

**Pu LAL THANHAWLA, CHIEF MINISTER** : Pu Deputy Speaker, Mizoram Olympic Association chauh ni lo, State Level Sports Association hrang hrang hi sawrkar-in tanpuina kan pe thin a. A inang vek lo va, an mamawh dan pawh a inang lova. Tin, a tul chuan state pawna eng emaw National Games-ah te leh thil dang danga an kal te pawhin kan neih ang angin kan tum sak thin a ni tih kha a chhan tawh chu a ni nain, ‘tiang khan State Olympic Association chauh ni lo, State level sports association zawng zawng, Mizoram Olympic Association-a in affiliate ang te phei hi chu grant kan ruahman sak thin a ni.

Tin, nichin ami kha han sawi lawk ka duh a, Pu Deputy Speaker, khawngaih takin. National Disaster Management hnuaiah hian sum kan hmu a, keimahni state hian sum kan nei hranpa lo va. Zoram leilung hi a nghet lo va, chuvangin disaster prone area kan ni a. Red seismic zone-ah kan awm lehngal a. Chuvangin fimkhur a ngai a. Tun lai Zoram dung leh vanga tlahniam ang chi report kan hriat reng reng hi chu kan mithiamten an en vat zel a. A theih ang angin central lam atangte pawhin kan ngaihtuah a.

Tin, tunah phei chuan South Korea leh Taiwan te an palaite biain an mithiamte zinah kan sawm a, an lo zin a. Kan dinhmunte kan sawi a, anni

kha an tih thiam zawng takte a lo nih avangin co-operation tha tak neih theih kan beisei a. Kan inralrin a ngai a, chhiatrupna tawh thei kan nih avangin. Geologist ten “Kan ram leilung hi a nghet lo a ni,” an tih avangin kha lampang zawng khan nasa takin tan lak mek chhoh zel a ni. Ram dang sawrkar te pawh kan pun mek a ni tih kha House ka'n hrilh duh a ni.

**DEPUTY SPEAKER** : A lawmawm e. Starred Question No. 27-na zawt turin member zahawm tak Dr. K. Beichhua ilo sawm ang.

**Dr. K. BEICHHUA** : Pu Deputy Speaker, ka lawm e. Transport Department changtu Minister zahawm tak hnena ka zawhna chu :

- (a) State Transport Authority hian Mizoram Taxi fare bituk bik a nei em ?
- (b) Aizawl khawpuihah Taxi service lai engzat nge awm ?
- (c) Taxi fare hi siam ni ta se per kilometer-ah engzat nge ni ang tih kha ka zawhna a ni e.

**DEPUTY SPEAKER** : A changtu Minister zahawm tak Pu John Rotluangliana chhang turin ilo sawm ang.

**Pu JOHN ROTLUANGLIANA, MINISTER** : Pu Deputy Speaker, Starred Question No. 27-na Dr. K. Beichhua zawhna chhanna chu

- a) “Nei e” tih a ni a.
- b) “Aizawl khawpuihah Taxi service lai 3489 a awm a. Heng zing 82 permit hi cancel a ni,” tih a ni. c) Aizawl City-ah chuan kilometer khatah ₹ 40/-. Subsequent kilometer-ah ₹ 30/- a ni a. Hei hi March ni 1, 2015 atanga hman tan a ni. Aizawl City tih loh hi chu chumi atanga chumi inkar tih anga fare siam a nih avangin Rupees per Km angin a awm lo a ni. Taxi fare bu hi Pu Deputy Speaker, March ni 1 atang khan issue a ni a. Hei hi mipui tan pawh lei theih tura siam a ni a, hei hi tunah hian hman mek a ni. Ka lawm e.

**DEPUTY SPEAKER** : Zawhbelhna a awm em ?

**Dr. K. BEICHHUA** : Pu Deputy Speaker, ka zawh belhna chu: Night service charge hi chhun nen a inang em ? Engzat nge ni ? Taxi fare thar

hmang duh lo an awm report dawn a ni tawh em ? Police-ah leh enforcement lam atanga report engzat nge ? Pathumnaah chuan hmang duh lo ho hi engtia hremna pek tur nge ni ang tih kha ka zawh belhna a ni e.

**DEPUTY SPEAKER** : Zawhbelhna dang a awm em ? Awm lo maw ? Awle, chhang turin Minister zahawm tak Pu John Rotluangliana.

**Pu JOHN ROTLUANGLIANA, MINISTER** : Pu Deputy Speaker, tunah rih chuan hmang duh lo report kan la dawng lo va. An awm chuan hrem theih an ni ang. Tin, zan dar 9 leh zing dar 4 inkar bikah hi chuan 25%-a a fare hi tihsan a ni.

**Dr. K. BEICHHUA** : Pu Deputy Speaker, taxi stand tinah hian Aizawl City taxi fare tar a ni em tih lai kha min la chhang lo tlat.

**DEPUTY SPEAKER** : Kha kha a zawt a, chhan tel loh a ni tlat.

**Pu JOHN ROTLUANGLIANA, MINISTER** : Ka lo chhan hmaih a ni. Pu Deputy Speaker, hei hi tar vek a ni. Tin taxi driver-ho hnenah pawh heng hi pek vek an ni bawk e.

**DEPUTY SPEAKER** : A fiah e. Starred Question No. 28-na zawt turin member zahawm tak Er. Lalrinawma lo sawm ila.

**Er. LALRINAWMA** : Pu Deputy Speaker, ka lawm e. School Education Department changtu Minister zahawm tak hnena ka Starred Question 28-na chu :

- (a) Kum 2014-2015 chhungin School Education Department-in School naupang hnenah School Uniform Grant pek a nei em ?
- (b) Lo nei ta se engzatin nge a pek ?
- (c) Kum 2014-2015 chhungin Mizoram Sawrkar-in SSA Scheme hnuaiyah Government of India atangin School Uniform Grant hmuh a nei em ?



- (d) Lo nei ta se engzat nge a hmuh ?
- (e) Tun dinhmunah engzat nge release a nih tawh tih ka zawt e.

**DEPUTY SPEAKER** : Awle, chhang turin a changtu Minister zahawm tak Pu H. Rohluna lo sawm ila.

**Pu H. ROHLUNA, MINISTER** : Pu Deputy Speaker, member zahawm tak Er. Lalrinawma Starred Question chhanna chu :-

- (a) Nei e.
- (b) Government of India Norms angin naupang pakhat zelah ₹ 400/- zela pek a ni.
- (c) “Financial year 2014-2015 atan SSA Scheme hnuaiah Government of India atangin School Uniform Grant hmuh a la ni lo,”
- (d) Hmuh a la ni lo.
- (e) Tun dinhmunah release a la ni lo, tih a ni.

\* Speech not corrected.

**DEPUTY SPEAKER** : Zawhbelhna a awm em ? Aw, Er. Lalrinawma.

**Er. LALRINAWMA** : Pu Deputy Speaker, ka'n zawh belhna chu, hemi BRCC thenkhatah hian school naupang pakhat ₹ 400 turah hian ₹10/- cut sak a awm a. Hei hi Department-in a hriatpui em ? Nge ni hei hi Dan a lo ni reng em ? BRCC coordinator-te hian hei hi tih theihna dan an nei em tih Ka zawt e.

**DEPUTY SPEAKER** : Zawhbelhna dang a awm em ? Awm lo maw ? Chhang turin Minister zahawm tak Pu Rohluna.

**Pu H. ROHLUNA, MINISTER** : Pu Deputy Speaker, BRCC lamin uniform man atangin ₹10 an lo deduct tih kha kan la hre lo a. Chu chu tute

nge ni, an lo ti a nih a member zahawm takin min han hriattir theih chuan kan lo en zui ang e.

\* Speech not corrected.

**DEPUTY SPEAKER** : I hriattir nghal dawn nge ?

**Er. LALRINAWMA** : Aibawk BRCC hnuaiah hian a kal chhuak ta ti mai ila, tunah pheih chuan a thawk tawh lo a nih hmel. Tahchuan ₹ 10 zel hi cut a ni a, hei hi enge ni a awmzia tih lai hi, a mak khawp mai a chu lai chu kan sawi chhan lai tak chu a ni a. Min lo chhui chian sak theih chuan a lawmawm hle ang.

**DEPUTY SPEAKER** : A hun lai kha ?

**Er. LALRINAWMA** : Pu Deputy Speaker, tuna an hak lai mek kha a ni a, a chhan chu an rawn report a, hei kan in phone kual char char a, chutiang chu a dinhmun a ni a. Tuna an dawn mek, an hak mek a nih hmel e.

**DEPUTY SPEAKER** : Minister i lo sawm ang.

**Pu H. ROHLUNA, MINISTER** : Pu Deputy Speaker, kan chhangchhe ve deuh thin a, School Education Department hi chu min zar pharh ve a khatiang tawk pawh kha an lo awm palh a nih pawhin kan lo en zui ang a Aibawk BRCC lam a nih chuan. Tin, a tlangpui thuin School uniform hi naupangte hnenah hian a School Management Committee kuta pek tur kha a ni a, BRCC lamin engtia khatia lo ti nge an nih tih te pawh kan lo enzui ang a. Khatiang thil fel lo kha chu kan ngai serious khawp mai.

\* Speech not corrected.

**DEPUTY SPEAKER** : Starred Question No. 29-na zawt turin member zahawm tak Pu Lalruatkima.

**Pu LALRUATKIMA** : Pu Deputy Speaker, ka lawm e. Starred Question No. 29-na Land Revenue and Settlement Department changtu Minister zahawm tak chhan atan :-

- a) The Mizoram Land Revenue Laws hi siam that/ennawn a ni dawn em ?
- b) Revenue chhiah chi hrang hrangte hi siam thata ennawn a ni dawn em ?
- c) Vantlang hmun hma Biak In leh thlanmual chhiah lak hi eng angin nge kalpui zel a nih dawn ?

**DEPUTY SPEAKER** : Chhang turin Minister zahawm Pu R. Romawia lo sawm ila.

**Pu R. ROMAWIA, MINISTER** : Pu Deputy Speaker, member zahawm tak Pu Lalruatkima zawhna chhanna chu hetiang hi a ni e.

- a) The Mizoram Land Revenue Laws hi siamthat/ennawn tul tihna Department-in a nei a, ennawn tum mek a ni.
- b) Revenue chhiah chi hrang hrang te hi Department chuan ennawn a tum mek.
- c) Biak In leh thlanmual chhiah lak hi suspend a ni a, kalpui zel dan tur ngaihtuah mek a ni.

**DEPUTY SPEAKER** : Zawhbelhna Pu Lalruatkima.

**Pu LALRUATKIMA** : Pu Deputy Speaker, ka lawm e. Nimin piah lamah khan kan sawihonaah te khan kan sawi tawh a, 'The Mizoram Land Revenue Laws' hi Dan tha tak anga lang mahse Dan khirh tak niin a lang a. Ennawn turin kan Minister zahawm takin ruahmanna a nei kha lawmawm ka ti a. Ka sawi duh chu Revenue chi hrang hrang kan la a, (Deputy Speaker : Sawi phal a ni lo, zawh tur). Ka zawt dawn a, ka zawhna sawifiah kha a ngai a ni.

Nikuma leiman ka pekah chuan ₹ 445 a ni a, kuminah ₹ 4,171 min rawn thing a, a punna kha a let 10 dawnin a pung a ni, chuti khawp chuan a in san hleih a, a tuartu tan a tam awl khawp mai a. Tin, ka bial chhung Dinthar thlanmualah khan ₹ 1,74,000 zet leiman hi thin an ni bawkw

a, mahse suspend a nih thu kha kan ngaithla a. Pu Deputy Speaker, kan zawh duh chu, sawi kan duh chu sawifiah nan, nikum July 10 khan, 'Lei man, in hmun leh ram chhiah tun hnaiah tihpun tum a ni em? tih a ni a, 'Aw ni e' tiin kan Minister zahawm tak khan min chhang a. Leiman chungchang hi mipui khawih a nih avangin ka vei em a ni.

November 11, 2014 Session-ah khan ka Starred Question No. 192-naah khan ka zawt leh a 'In hmun leh ram chhiah tihpun tum a ni em?' tih hi 'Ni lo' tiin min chhang a. 'Tihpun tum a nih chuan engtik a hman tan tur nge tih chu 'Nil' ti vek khan min chhang bawk a ni. Kan efficiency hi enge ni aw ka ti a, chu lai-ah chuan a hma in tihpun tum a nih thu in min chhang a, tunah pawh a pun thu kan hre vek a. Mahse Kum 2014 November thla financial year kal lai mekah khan a nih loh thu in min chhang a. Hei hi kan Minister zahawm takin min hrilhiah thei lawm ni tih kha ka zawt duh a.

Tin, a dawt lehah chuan Biak In leh thlanmual bik hi chu suspend lo deuh in, hnuh let vek mai hi a thain ka ring a, kan sakhua biakna hmun te, kan Pathian biakna hmun a ni a. Tin, thlanmual hi kan hmangaih kalta te lungahna hmun a nih avangin leiman khawn a nih chuan vantlang kha a tuartu tur tho kan nih avangin hei hi chu suspend mai ni lovin, hlih law law a, a hma anga kal leh kha a tha ka ti a. Tin, Revenue chhiah chi hrang hrangte siamthat a ennawn tum mek a ni kha kan Minister zahawm tak kha lawmthu kan hrilh duh a ni e. Ka lawm e

**DEPUTY SPEAKER** : Chhan tur a awm em? Minister i lo sawm ang.

**Pu R. ROMAWIA, MINISTER** : Pu Deputy Speaker, a kal hman chu Official Gazette hian chhiah lakna tur chungchang hi June 27, 2014-ah khan Gazette hi tihchhuah tawh a ni a. November-ah kha chuan hemi bak hi chu tih thar kan la nei tlat lo a, chuvangin neilo tih kha a awm ve viau a ni. Amaherawhchu kha ti lai a tahrik ..chungchang kha chu khatiang

khan sawi mam dawn ta ila. A vang chu April thla lama ruahman a ni a. Tin, April 1, 2014-a effective tur anga ruahman a ni a.

Pu Deputy Speaker, han sawi zau ta deuh hlek ila, thil awmzia chu hemi land lease ho bikah hian ennawn ngai em em problem kan nei ta a. Governor compound te, Chief Secretary compound zawng zawng te pawh kha engtia tih tur nge tih kha department lam khan ngaihtuah tul a ti a. Mimal/individual lam ai khan khang lampang a nih avang khan ennawn a ngaihna lai kha a awm a, ennawn tum mek a ni ti a kan chhan lai khan, chutiang chuan engemaw chen kha ngaihtuah a ni a.

Mahse khawvel ram changkang zawk sapram-ah te chuan thlanmual te leh Biak In ang te pawh khatianga chhiah lakna a lo nih avangin mi tam takin Biak In te pawh an tih ral te a tul a. Chutiang te ngaihtuahna lo awmah khan kan official-te ngaihtuahna pawh a inhnial ta ngat ngat a. Chutiang chuan kan han ti chho ta a, khawpuiah khan kan han khawn chho ta a, rin aiin boruak kha a rawn sa ta viau a, kan dan tharah khan exemption lampang kha phal theihna lai chu a lo awm ve na a, mahse a particular khan chungte chu exempt tur a ni tih te pawh kha a lo awm lem lova. Dt.19.10.2005-ah khan Director, Land Revenue hming khan thil chi hrang 8 laiah exemption order kha an lo ti a. Engpawh ni se, hun engemaw ti chhung chu Biak In leh thlanmualte hi chu suspend rih phawt ang tih a ni a. Mahse, individual merit-a en ngaite pawh hi a awm awm mang e tih ngaihtuahna te kha chu a awm a ni. Biak In compound chhungah, a land lease huam chhungah, sum tam tak hmuhna dawr tam tak siam te pawh a lo awm ve a. Kohhran ho pawh hi kan Biak In compound hman dan pawh hi kan inang lo viau a ni. Chungte avang chuan thil thlir uluk ngai tak a awm a. A pum puhlum a han tih hlawk loh chi te pawh a awm ve thei a. Chutiang chu tuna kan dinhmun a ni a.

Engpawhnise, mipuiin an tawrh nep ber dan tur chu kan ngaihtuah a ngai a. Chhiah kan tihpun chungchangah pawh thawm a lian hle a. Chhiah pe tur kan ni a, mahse, a pung hi a chuti lutuk e tih te a awm a. Kan chhiah

tihpun hi 2011 ami, 2014 a kan han revised leh kha a ni a. Mahse, thil tih fuh tawk lohte pawh awm thei a awm avangin, tuna kan member zahawm takin a han sawi ang khan, a pun dan kha exorbitant rate-te pawhin hmun thenkhatah a pung a awm a ni tih ka hriat khan pawl ka ti hle a. Individual a enfiah leh tur ah mimal grievances neite kha chuan an mimal chhiah lo pek pun nasat lutuk dan te pawh chianguang taka enge a pun chhan ti in Department-ah te pawh hian complaint te pawh hi lut se ka ti a. Ka hnena tawngkam ngeia sawi pawh “ziakin Department-ah ti teh u, ka hnen ringawta sawi lo hian. Individual case-te pawh re-examine leh theih vek a ni a. Mihring chu thil tvisual thei kan nih avangin kan khawntute pawhin chhut sual an nei thei a ni” ka ti a.

Chutiang chuan sawti laia Bawngkawn South thlanmual ngei pawh an han complaint-a, an han chhut that leh chuan kan Department pawh khan tih fuh loh an lo nei ve a, a tla ta ve duak a ni a. Khatiang kha a nih vangin, mipui hian khawlaia sawi chiam lo in a Department mawhphurtu te ngei hnenah hian complaint hi thehlut hreh lo ila. Anni pawhin ‘kan tih chu kan tih’ ti tlat lovin, mipuite phurrit tlem thei ber tur ang zawnzawnga, Dan ang taka thiltih dan hi a la awmin ka hria a. Vawiin thleng pawhin chu chu a beidawnthlak lohvin ka hria a. Heng angah hian, a lo a luak chhuak lutuk awma lo pung ta thur angte pawh khan Department lamah hian complaint-na la thehluh zel hi a thain ka hria. Nakin zela kan kal zel dan turah pawh khawlaia sawi vak hma hian Department concern-ah thil thlen thin ni se a lawmawm ngawt ang tih ka han sawi tel duh a ni. Pu Deputy Speaker.

**Dr. K. BEICHHUA** : Pu Deputy Speaker, zawhbelhna.

**DEPUTY SPEAKER** : Zawhbelhna a ?

**Dr. K. BEICHHUA** : Pu Deputy Speaker, junior politician kan ni a, kan senior politician-te hian kan zawhna inang hi vawi 2 vawi 3 vel a nih hian a inang lo in min chhang tlat mai thin a. Hei hi thil diklo leh House

zah lohna a ni em tih ka zawt a. Tin, hetiang hi ti tawh lo turin assurance min pe thei em tih kha ka zawt a ni.

**DEPUTY SPEAKER** : Ngawi rawh, tunah khan a rawn zawh kha. A hmaa ka zawh khan “Tum e” tiin min chhang a, a ti a. A hnua a zawh leh kha November-ah “Tum lo” a ti a. Tunah khan Minister zahawm tak khan a rawn sawifiah a. A zawh lai khan tum mek a ni a. Tichuan, a zawh leh inkarah khan an lo ti sang tawh a. A zawh leh hnu kha chuan tihsan leh tumna a awm tawh lo a ni tih kha a rawn chhanna a ni.

**Pu LALRUATKIMA** : Pu Deputy Speaker, leiman tih punna Gazette hi 27<sup>th</sup> July, 2014-ah chhuah a ni a. Chumi hnua ka zawhna ve ve a ni a, Notification chhuah hnu vekah. Pakhat zawk hi 10<sup>th</sup> July, 2014-a ka zawh a ni a. Chutah chuan “Leiman, inhmun lo ram chhiah hi tun hnaiah tihpun tum a ni em?” tih ka zawt a. A chhanna chu “Aw, ni e. Leiman tihpun hi kum khata sang taka tihpun aiin tlem tlema tihpun zin deuh hi sawrkarin tha a ti” a ti a. Chuan July thla zawhna chu chutiang chuan min chhan laiin 11<sup>th</sup> November, 2014 Session-a ka zawhnaah kan Leiman tihpun chungchang hi “Tum a ni lo” tih fai vek mai lai kha hriatthiam har zawk lai chu a ni e. Kha lai kha tun hnua chuan fimkhur tlan a ngai a, accountability kan tih fo hi kan ngaihtuahna ah awm se la. Tumah mi famkim kan awm chuang lova. Ti dik lo thei kan ni a, mahse, tihdik hram hi chu kan tihpur a ni dawn lawm ni. Kan member zahawm takin a sawi ang khan, tun hnua chuan assurance-te hi kan inpek loh pheii chuan kan inthlahdah zel a, tu a te pawh hi. Chu laite chu kan ngen tel duh a ni e.

**DEPUTY SPEAKER** : Sawi duh i nei em, Minister zahawm tak.

**Pu R. ROMAWIA, MINISTER** : Pu Deputy Speaker, ka sawi tawhin ka hria a. A bik takin land lease chungchangah te khan ennawn ngai tak kha a lo awm a. Ka sawi viau tawhin ka hria a. Chuvang chuan, individual lam ai khan khati lampang mah kha a ni nghe nghe a. Chu chu leiman chhiah khan a huam vek tho a ni. Amaherawhchu, thil han kal zelah

khan Gazette tidanglam em khawp kha chuan thil tih ngaia hriatna a awm ta lova. Gazette-a lo chhuak tawh ang khan kan kal ta a ni ber.

**DEPUTY SPEAKER** : Awle, zawhna hun minute 1 chiah a awm a, in zawt zo hman dawn si lova, ti tawp mai ila a tha ang e.

**Pu H. ROHLUNA, MINISTER** : Pu Deputy Speaker, nichina member zahawm tak Pu Lalrinawma zawhna Aibawk BRCC chungchang kha Department lamin hremna an lo lekkawh tawh a. BRCC atangin an lo chawlh tir tawh a tih kha House information-ah ka sawi tel duh zawk a ni.

\* Speech not corrected.

**DEPUTY SPEAKER** : House-a sawi chhuah hmain in lo hmang der tawh tihna a ni maw ? In prompt hle mai.

Awle, tunah chuan thil han puan lawk tur a awm a. Vawiina kan member absent-te, a hmaa kan lo puan tawh Pu S. Laldingliana leh Pu K. Sangthuama damlohna avanga chawl bakah hian, vawiinah Pu PC. Zoram Sangliana, Pu Hmingdailova Khiangte, Pu K. Lalrinthanga te hi programme pawimawhah an kal a ngaih avangin chawlh minrawn dil a, kan phalsak a ni.

Vawiin hi kan Dan rule 27, sub rule 1 in Private Member Business lak tur ni a a ruat a ni a. Vawiinah hian Private Member Resolution kan la ang a. Resolution hi 7 kan hmu a, dt.13.3.2015 (Friday) dar 1:00 khan vawiina kan lak indawt dan tur hi ballot a lo ni tawh a. Chuta a chhuah dan indawtin kan la ang a. Kha kha Bulletin Part 2 No. 73 dt 17.3.2015-ah khan kan lo hriattir vek tawh che u a.

Awle, tunah chuan Pu T. Sangkunga, member zahawm takin a resolution “Zofate inpumkhatna daltu chu engmah tih nilo rawh se” tih chu House-ah move turin i lo sawm ang.



**Pu T. SANGKUNGA** : Pu Deputy Speaker, ka lawm e. Vawiinah ka resolution “Zofate inpumkhatna daltu chu engmah tih nilo rawh se” tih House zahawm taka sawi thei tura kan awm hi lawmawm ka ti tak zet a. Awle, kan hriat theuh angin khawvel hnam chi hrang hrang, ram tina darhte hian mahni hnam inpumkhatna leh kan luah chin ramte inzawmkhawm leh hi kan rilru lian tak a ni theuh a. A bik takin Mizo te phei chu hnam lungleng thei leh inkawmngleih kan ni a, kan unaute, kan thenrual te, tunhmaa ram khat a awm thin, British sorkar in min rawn awp a, min then dan zulzui a independent country 3 a thendarh kan han ni ta hian lung a ti lengin inzawmkhawmlehna hi kan rilru pui ber a ni a.

Keini mai ni lo, German-te pawh tunhma in lal ram hrang hrangah an inthen darh a; Bismark-a hunlai in German Unification an lo ti a, an in unite-a, chutiingin, Greek City state te pawh an lal Philip-a hunlai in an lo inzawmkhawm a nih kha. Amaherawhchu, boruak hrang hrang leh khawvel a indona te lo awm thin hian unau leh thlah khat, hnam khat te min thendarh thin a ni.

Mizo te hi tunhma chuan tu lal ram hnuaiah mah kan awm ngai lova, amaherawhchu, British-in an ram, an empire an rawn zauh zel naah khan a tuartu ber zingah awmin, Zo hnahtlak te hi ram pathumah thendarh kan lo ni ta a. Helaiah pawh hian han sawi ka duh chu, kum 1872-a Chin Lushai Expedition leh 1890-a Chin Lushai Expedition an neih kha kan history-ah hian a lar hle a. 1872-ah khan Mary Winchester pawh lak let leh a ni a. 1890-ah khan Adjutant General Simon-a hova, ani Commander-in-Chief nih na hnuaia Burma lam atanga rawn thawk leh Chittagong lam leh Assam lam atanga lo thawk te khan min awp tura expedition an rawn neih khan effect lian tak a lo nei ta a.

Hei pawh hi kan sawi uar duhna chu, hemi hma hian British-in kan ram hi a lo run tawh thin tih hi han sawi lan ka duh a. A chhan, Mary Winchester la let turin 1872-ah expedition hi a awm a ni tih history pawh hi rewrite ngaiin ka hria a. 1852 Sepoy Mutiny hi India historian te chuan “1<sup>st</sup>

War of Independence,” ti a an ziah theih chuan, keini pawh kan history ziah that hi a ngai. Silchar bawrhsap A.K.Iyeger-a diary-a a lan dan chuan kum 1950-ah, Sentlang lal, (khatih lai khan Sentlang tih a la ni lova, Ngura khua tih a ni a) kha khua kha 1850-ah an rawn run daih tawh a ni. A chhan chu Ngura khan Mizoram, khulai cachar atanga mel 9 vela lei, tui chim thin bula mual te tak te te ah khuan Seipuia’n khua a nei a. Silchar bawrhsap te khan ‘kan ram a ni’ tiin chhiah an han khawn a. A ni khan a lo pe mai a, Ngura khan, ‘hei hi Lusei ram a ni a, engahnge Cachar bawrhsap-ah chhiah i lo pek, kan ni man pawh i la ba a, ka darkhuang man pawh i la ba a ni,” a ti a. A khua a zuk hal sak tawp mai a ni. Chuvangin British te kha an thin a rim ta a, Captain Lister-a, hnua Cornel nita hovin Sentlang kan tih, Ngura khua chu an rawn run ta a. Anni kha mi dang bei turin an pasaltha zawng zawng an lo riak chhuak vek a. Mahse, Lister thinrim hian an khua chu a hal a, nu nau tam tak a that a, thisen tam tak a luan avangin a khua pawh Sentlang tih a lo ni ta a. Ngura te chu Khawruhlian lamah an insawn ta nghe nghe a. A chhan chu British ho hian Mizoram (Lusei) lamah thingpui huan an zauh zel avang khan an thinrim in Assam ram hi an lo run thin a ni. Tin, Mary Winchester pawh hi a pa an rawn that si a, a fanu khan sap ni lovin, inneihna pangngai lo a fa a lo nih bawk si avangin Mizote khan an khawngaih a, an la chho ta a, a nu an hmu bawk si lova, chuvangin, an sal man dangte ang lo takin nitin artui pakhat an chhum ziah a, duat takin an enkawl a ni tiin Deputy Commissioner hian a diary-ah a lo ziak daih tawh a ni.

Chuvangin, Mary Winchester la let turin 1872-ah British ten an sipaite an rawn tir nilovin, kan ram lamah thingpui huan an rawn zauh zel a, London-ah tender an ko va, chu chu kan lalten ngaitheilovin Seipuia khua te pawh chu hal hial a lo ni a. Chutiang a nih avang chuan kan Mizo pi pute hian an lo ngaitheilo tawh em em thin a. Kum 1890-a Adjutant General Simon-a ho in awp tura an rawn lak pawh khan a hnu kum hnih chhungin an tisual tih an in hria a. Khang army hrang hrang ten an ram lak kha an insem ta vek a, a then in chhim lam an chang a. Tuna kan Mizoram ngei pawh chhim leh hmarah then in kan awm ta kha a ni a, chu chu tisual an in ti a. Fort William-ah, 1892 khan Chin Lushai Conference an ko ta a, a ko tu chu

Foreign Secretary, Shimla ami a ni a. Hei hi kan sawi lan duh chu keini excluded area hi George VI-na order 1930 ang khan Shimla atangin Foreign Secretary-in min awp daih a ni. Chuvangin tuna kan document pawimawh zawng zawng hi tun thleng in Shimla museum-ah hian a tam ber a ni an ti. Kolkata museum a awm lo hi Shimla (min rawn awp na hmun) museum-ah khuan a awm fo thin. Kan thian pakhatin a sawi phei chu, “order pakhat British hunlaia an tih chhuah nasa takin ka zawng a. Kolkata museum a zawn hlawhchham hnuin Shimla-ah kal rawh min ti a, ka han haichhuak nghe nghe a.” a ti a.

Chuvangin, keini excluded area hi king’s order, George VI-na in 1930-a a siamah khan Mizoram te, khatihlaia Sadia, Arunachal Pradesh kan tih tak te, Nagaland-te hi excluded area-ah min pawm a. A dawt leh ah chuan, partially excluded area an tih Khasi, Jaintia te, Garo te leh Mikir te khu an ni a. Chuvangin Inner Line Permit an nei ve thei lo. Eastern Bengal Regulation 1873-in Inner Line Permit an hman ve theihlohna pawh hi khatihlaia lo in tan daih tawh kha a ni. Excluded area zawng zawng kha chu Shimla atangin Foreign Secretary in min rawn awp daih a, kan bawrhsap te pawh kha Superintendent an ni a. Excluded area ni lo, India an awp District awptu chu Deputy Commissioner an ti daih a, excluded area ami te kha chu Superintendent min ti a, chuvangin an power pawh hi a inang lo va. Keini chu Foreign Department/Ministry ni lovin Foreign Department, Shimla atanga awp kan ni a. Fort Willian-a 1892-a Chin-Lushai Conference-ah pawh hian, ‘kan lo ti sual der a ni,’ an ti a. ‘Chin leh Lushai te hi hnam khat an ni e. Chuvangin, kan lo then darh ta si a, engtingge kan tih ang,’ an ti a. Chuta an resolution no.1-ah pawh chuan, anni ram hran hrana kan then hi in zawmkhawm leh ni rawh se an ti a. Resolution no.2 leh 3-ah chuan, kawng leh telegram (inbiakpawhna) a chhe si a, heng hi siam that zet ni se an ti a.

Amaherawhchu, chumi kum leh maiah chuan Mizoram chhim lam leh hmar lam hi chu an zawmkhawm leh ta a. British ho pawhin min then darh hi chu ti sual in ti mahse an lo tih tawh a ni a, tih that leh mai a har avangin hei hi Mizoten kan tuar em em a, kan inthen hlen na bul pui ber

pakhat a ni. Tin, Indopui II-na a lo chhuak a, chutah chuan inngaihtuah thar leh na hun tur kan neih theihna turin Atlantic Charter kha siam a lo ni ta a. Kan hriat theuh angin kha Atlantic Charter-ah khan Allied Force ho khan indona a min pui apiang chu chakna kan nei a nih chuan ‘anmahni own destiny chu anmahnin an ngaihtuah thei ang’ tih an lo sign avang khan vanneihna kan nei leh dawn ni a hriatna te a lo awm ta a.

Tichuan, khatih laia superintendent, Mc Call-a pawh khan 1941-ah Mizo lal leh Upa 300 rual, khilai kan Governor Bangla bulah khian (Superintendent bangla a la ni a) a ko khawm a, British flag an tar a, anin hma a hruai a, kan Lal leh Upa 300 rual te khan kha flag kha an kal hual a, chutah chuan Mc Call-an ‘in destiny chu nangmahnin in ngaihtuah thei ang,’ tiin a puang nghe nghe a. Chuta a thu puan chu chhonzawm in independent hi a tha em tih ngaihtuahna te pawh alo awm a. Chutih lai chuan Mizo Union khan 1947-ah Mizo hnaathlak hrang hrang te hi kan dinhmun te ngaihtuah tur leh inzawm khawm leh vek turin memorandum an thehlut a, “hnam 47 kan ni e”, tiin an ziak tlar nghe nghe a.

Manipur lama kan Mizo hnaathlak te khan theihtawpin Mzoram lama rawn beh tumin an bei a, chutih lai chuan an Raja R.P Singh-a khan “ Mizoram lamah chuan phei lo ula, District Council aia tha zawk pawh kan pe ang che u” a ti a. Ani kha India nen an inrem hnu khan Manipur State Prime Minister angin a awm a ni a, nihna sang tak a offer pawh khan sawta kan Zohnaathlak unau te khan inzawm khawm leh duhin an pawm lova ni.

R.P Singh-a khan theihtawpin a thlem a, an duh tak loh hnu khan an hruaitu thenkhat a vaw hrep a, Jail-ah te a dah a, nasa takin an tuar a. Amaherawhchu, District Council kan neih khan kan hotuten Zoram lamah an dah leh ta si lova, chu chu kan tihsual vawikhatna leh Manipura kan unau te lungawi loh lo intan na a lo ni ta a. Tin, independent movement a lo chhuah khan Mizoram lama beh theihna tur leh flag khat hnuai a kan awm leh theihna tur a ni tih hriain theihtawpin an bei a, underground-ah te pawh an lut a. China delegation

hruaitu hmasa berte pawh Kuki tlangval Demkhawsiak a ni a, mi tam takin an thih phah a ni.

Amaherawhchu, independent kan han hmuh dawn loh hnu, 1986-a inremna a han awm khan sawlam kha kan kal kan leh tlat mai a, an tel leh ta lo a ni. Chance vawihnih an hlohna niin an hria a, an rilru a na em em a ni. Chuvangin vawiina kan han ngaihtuah a, thiamloh kan han chantir pawh hi kan thiamloh hi a tam viau a ni.

District Council kan neih lai pawh khan min sawi kep lo reng reng an ti tlat a ni. District Council neih in nghakhlel lutuk a, keini hi min kep lo alawm, keinin kan chan tur zawng zawng kan lo hloh a, vuak kan tuar a, mahse min sawi kep lo an ti. Independent kan hlawhchham hnu a kan inremna ah pawh khan min kep lo, helaiah nawr tak tak in in nawr lo, an ti a. Pawl te insiam in anmahni khan theihtawpin Mizorama beh kha an zu dil ve a, chung pawh chu kan ngaihsak tawh lovin an hre tlat a ni. Hetah hian kan sawi duhna chu kan inpumkhatna dalna tur hian British sorkar chauh nilo, keini Mizoram lam ami pawh hian thiamlohna engemaw chen hi kan nei ve a ni tih hi he House-ah hian sawilan ve hrim hrim ka duh a ni.

Chuvangin kan Zo hnahtlak unaute keimahnia an han lungawi lo deuh pawh hi awmna chin a awm a ni. Chutiang bawh chuan Bangladesh lama kan unau te anmahni tawngkam ngei, kum 10 kalta a ka hriat chu, “Independent beih lai khan kan lo phur em em a, Mizo Army-te kan awm a, an eitur buhfai te zanah thla eng hnuaiyah te kan deng a, man lovin vawh te kan talh a, he rama rawn tel ngei hi kan duh a, inremna alo awm dawn te khan, In thiam ang, in phu tawh te te sorkar hna kan lo pe ang che u, an ti a, kan phur em em a. Inremna a lo awm ta a Hnam Run-ah han kal ila, ‘enge i rawn tih ve dawn?’ an lo ti a, bazaar-a inpho na takngial pawh hi min pe duh lo a, heti hian kan vak kan vak ringawt mai a ni.” He thu ka sawi na chhan chu tu te emaw ka zu demna a ni lova, Mizo Union hunlai a ni emaw, MNF hun lai a ni emaw an beisei ang leh kan tawng hmawr hmuh ang hian kan Zo hnahtlak unau, British thendarha awm tawh te hi kan ngaihsak tawh tlat lo a

ni. An ni chuan Grade IV te tal pawh hmu ngei turin lehkha thiamlo deuchte pawh hian an lo in beisei si a, bazara kawngkama inpho na takngial pawh kan pe duh lova, enge i rawn tih dawn te kan lo ti mai mai kha chu an rilru a na ve a ni.

Ka training naah ‘mi chungchang i ngaihtuah dawnin anmahniah zu inchan hmasa rawh’. If I were you an tih te pawh kha Mizo te hian kan insuihkhawm lehna atan hian a pawimawh hle in ka hria a. Tunah pawh ala dam emaw ka hre lova, Manipur lama Mizo, MNF leh India sorkar Zorama beh ngei duh, Pu Haukhawmang Haokip kha an hotupa a ni nghe nghe a, chumi ten Mizorama behna tur an beihna pawh kha Pu Denga te khan an duh angin an ngaihsak tlat lo niin an hria a. Mizo inti helaia awm te pawh hian kan nawr na lo a, thiamlohna thui tak kan nei ve a ni tih hria ila. Amaherawhchu tunah chuan he harh tharna, inzawmkhawm leh duhna harh tharna hi a lo chhuak nasa hle in ka hria. Zirlai pawl ten Zofest te an ti a, YMA leh a dang dang te pawhin kan theihtawpin insuih khawm lehna turin kan bei thin a. Central YMA kan hruai lai pawhin 1999-ah Pu Ruatkima hi MZP President a la ni a. 1999-ah Young Gangte Association (YGA) chu YMA-ah kan va lawmlut a. Tin Gangte zirlai pawl chu MZP-ah Pu Ruatkima’n a va lawmlut a ni.

Tin, khatih lai khan Manipura Zo hnahthlak hruaitute ka hmu kimin ka hria. Kan va cham a, ‘kan insuihkhawm leh tur a ni, kan inthen darh hi a diklo a ni,’ kan ti a, kan kual kan kual thin. An helte pawh sawi ta tawp ila, a chang chuan kan hmu thin a ni. Chutiang chuan hnam insuihkhawm lehna turin tan kan la ve nasa a. Kan House Leader phei hi chu tunhma a kan House Leader te ang lo takin hmanni lawkah pawh Zofest-ah te hun neilo chung chung, hritlang tak chungin a zuk kal tawk tawk a ni. Tin Tripura-a kan unauten emaw, Manipur-a kan unauten emaw an tawrhin ani hian a ti buaitute a dim loh tur zia te leh police an la ngah zia te sawiin, ‘lo thlaphang reng reng suh u,’ tiin a zu hnem thin a ni. Tunah chuan kan sorkar hruaitute pawhin kal san mai lovin kan House Leader te, kan Deputy Leader ten an ngaihsak em em a. Zofest tih dawn pawh hian kan Deputy Leader pawh hi a

insengso thin khawpin ka hria. Tun ang hun hi kan ministry kal tawh reng rengah kan chheh vela Zo hnahthlakten Pa ena an en leh ngaihsaktu an awm lovin ka hria a.

Chuvangin beiseina pawh a sangin ka hria a. He thu han sawi pawh hi a chakawm a, tin, inzawmkhawm duh ngawih ngawihte atangin ZORO movement 1988-ah a lo chhuak a, 1988-ah ZORO din a ni a. 1999 atangin he pawl hi Geneva-ah emaw, New York-ah emaw, Working Group on Indigenous People Session zu attend hian, a bik takin an president phei chu ama pawisa ngatin ala kal ziah a ni. “Indigeneous People tam tak mai khawvelah an awm a. Chung thendarh leh awpbeh a awmte chu U.N.O. hian a ngaihsak a, an chungchang a ngaihtuah thin. Mizo tih hi Parliament-a kan M.P. hmasa Pu R. Thanhkira’n Lushai tih thlak nan kum 1953-a a putluh, Parliament-in a pass chauh a ni a. British, min awptute kha chuan Lusei, Zo, Kuki, Chin ti tein an ziak a. “Mizo tih hi a thar deuh a, chuvangin UNO-ah hian “Zo tiin kan represent loh chuan an pawm tlat lo” ZORO ho chuan an ti a ni.

Zo emaw, Chin emaw, Lushai emaw, Kuki emaw kha Sap ho min lo koh dan a nih avangin ZORO an ti a. Anni pawh hi kan House Leader te leh kan hruaitu hrang hrangte hian an ngaihsak ta hlein ka hria a. An conference-ah te va kalin, khuallian ah te an tang a. Opposition lam atang te pawhin kan rilru tui bak bak te pawh hian kan sawi emaw ni tih tur khawp hian tunah chuan party hrang hrang te insuihkhawm lamah kan lo intlansiak ta zawk mah mah a. Engpawhnise, Zofate inzawmkhawmna tur atan keini a ram neitu ber te hian mawh kan phur lian a. Kan thiante chu Manipur State-ah an bet a, hrehawm takin an awm a, a then chu Bangladesh-ah hrehawm takin nek chepin an awm a, a then lah Burma-ah. Keini chu zalen takin India sawrkar hnuaiyah kan awm a, keini hian mawh lian ber kan lak a ngai tak zet zet a, kan inzawmkhawm leh na turin an rilru kan tih nat loh a ngai a ni.

Vanduaithlak takin Mizo history a thil lo thleng chu Dt 16<sup>th</sup> March, 2007-ah he House-ah ngei hian, khatih laia kan MLA zahawm tak Pu Lalchandama Ralte khan ‘Indo – Bangladesh chauh nilo in, Indo – Myanmar

border pawh fencing ti turin central sawrkar-ah nawr ni rawh se' tih resolution a lo move a ni. A move hlimah pawh ri hak a awm a. Hei hi Zofate in zawmkhawm lehna tura thil pawl tak tak kan lo tih thin zinga tunlaia langsar ber pakhat a ni ta a ni. He state neitu kan unauten kan Jerusalem ti a an lo thlir ten, ransa danna tur nilo, kan unaute danna atana ramri hung han rawt tlat mai kha chu, tunlai khawvelah hi chuan a dik thei tawhin a lang lo a ni. A move chhan han chhiar lah khan development pawisa lo kal tur itna leh central in a ti tho tho dawnin a lang tih vel kha a ni a. Khatiang ringawt mai, a reason kha a ho lutuk a. Hei chu kan hnam tan a pawimawh, inzawmkhawm lehna lam a kawk lo reng reng. A rawn move chhan a sawi kha zu chhiar neuh neuh hian a zialo tlat. Khatih lai khan tuna kan House Leader leh tuna kan Deputy Leader hian nasa takin an hnial a, Pu Duhawma, ZNP hruaitupa pawh khan a duh lo nasa a ni. Hmana ZORO a kan Chief Minister (Pu Zoramthanga) thusawi nen khan a va inang ta lo ve,' te a ti a. Hrelo pawh an ni lo a, kan hotu zahawm tak tak te hian a pawitur zia leh helaia kan unau thendarha awm, inzawmkhawm duh ngawih ngawih te thinlung hi ala na dawn.

Hei hi tun hma a District Council neih dawn leh 1986 inremna a kan hmaih tawh mah tih nak alaia hemi kan han ti nawn leh hi chu a dik theilo ang, ti a nasa taka an au chung pawh khan, ban tam lam khan phar hnan niin, 16<sup>th</sup> March, 2007-ah resolution tha lo tak mai leh he hnam tana thil pawl, ser nung awm reng tur kan lo pass hi a pawl em em a. Amaherawhchu, hemi against a resolution han move leh hi a dik thei tawh silo a. He House zahawmna a ti bawrhbang dawn bawk si a. Chuvangin, he Resolution hi central-ah um zui loh ni se, hei hi chu bawhzui lo hram ila. An khaw zawna kan unaute lo lut mai tura ramri kan hung chuan an kal kual vak a ngai ang a, an senso a tam em em ang. Tin, lo luh kha a har em em dawn a ni. Assam Rifle an lo duty tawh ang a, in hmuh a harsa ang. Kan inhmuh khat chuan kan inggaina lo ang.

Kan chhungkua hi Burma leh Mizoram-a awm hi a inzah chiaha inthen kan ni a. Ka pu te hi Burma atanga lo chhuk an ni a, ka pa leh ka pa chhang chiah hmeichhia hi Mizoram-ah an awm a, mipa naupang ber, ka pa



Biakvela leh ka ni pakhat kha Burma-ah an chho leh a, pakhat sipai-ah a han tang a, hmeichhia zawkin pasal-ah sipai a han nei a, chuvangin a inzah chiaha inthen kan ni a. Boruak a rih lai kha chuan an lo chhuk thei lo, an awm tih hi kan hre tawh mang lo reng reng, a rei tawh lutuk a. Chuvangin inhmuh thin hi a ngai a ni, in zinpawha in tlawhpawh a ngai. Mithiamte chhut dan chuan tun ang hian Tourism hi chakin mihring hi tun angin in tlawhpawh ngat ila chuan, khawvel Indopui – II-na kha a chhuak lo ang tih hi an ngaihdan a ni. In hung tih te chu, ransa chauh i hung ang u, thlai nen, mihring in danna tur reng reng, chutah pawh kan unau te danna tur lehnghal hi chuan i hung lo ang u. Hung tum an awm pawhin i do ang u tih hi ka duh a. Chumi rual chuan a zau thei ang bera kan in tlawhpawh, kan in ngaihsak a ngai. Tunah vanneih thlak takin mi thahnemngai te Burma ram te an han tlawh a, an khaw awmdan te, an in awmdan te, Khampat Bungpui dinna hmun lam te T.V a kan han en hian lung a ti leng a ni. Chu chuan inzawmkhawm lehna atan thil tha a thlen a. Hetiang tih hi encourage ila, tunah kan inzawm mai thei lo. Kan House Leader-in a sawi angin Independent hi tharum in a lak theih si loh a, engtikah emaw hun tha te a lo in her chhuah leh theih hunah unau te ram khat, in awpna pakhat hnuaiah kan awm leh hunte a lo thleng ang a, chung atan chuan tuna kan lo inkawm ngeih a ngai.

Korea te communist leh democracy ramah an han inthen a, an han in hmuh leh chuan T.V. a kan hmuh angin an tap vawng vawng mai a ni. An lo tar tawh si a, a ha bal a ha balin an in fawp vel te han hmuh kha chuan hnam inzawmkhawm hi miten an lo duh zia a lang a. Chuvangin, kan unau British-in min lo thendarh a, independent country kan nih hnu ah kan in then darh tawlh tawlh a, kan unau sawrkar nikhua lo tak mai hnuaia awmte retheih zia hi hria in, theihtawp chhuahin he House hian insuihkhawm leh zai i rel ang u, tiin he Resolution hi min pass pui turin ka sawm che u a ni. Ka lawm e.

**DEPUTY SPEAKER** : Hun i hmang thiam hle mai, mover hian hei kan Dan - 131-naah hian member te chuan minute 15 engti kawng mahin pelh loh tur a ti a. Mover erawh chuan darkar chanve, Speaker in a phal

chuan a aia rei. Darkar chanve chiah hun i hmang a ni, i thiam khawp mai. A move thiam bawk a, a bul ret rawt bawk a, kan adopt nghal mai dawn em maw ni le? Adopt nghal mai ila.

Le, kan sawiho ang a, member tin te kha minute 5 nge minute 10? Minute 10 inpe ila. Hei Resolution dang pawh a awm a, kan zawh leh a dangah kan kal thei a, hunin min phal chuan.

Le, tunge han sawi ang le? Aw, Pu T.T. Zothansanga ilo sawm ang.

**Pu T.T. ZOTHANSANGA** : Pu Deputy Speaker, ka lawm e. Vawiina kan resolution hi kan en kan en a, Zofate inpumkhatna daltu hi, keimahni ramah hian kan lo awm thin a ni ang a tih ngaihndan kan nei a, a paw ka ti khawp mai. Tawite kan sawi duh chu, Mizoramah 1986 atangin Remna leh Muanna kan nei a, tichuan sawrkarna kan han nei chho a ni a. MNF ten sawrkarna term hnih an hmang tawh a, vawi hnih paw an khawihah kei chuan ka ngai a. Kum 2001 khan border fencing kha an lo rawt tawh bawk a, tichuan 2007-ah khan min lo rawt sak tawh bawk a ni. 2003 March ni 23 khan Pu C. Sangzuala khan a rawn moved tawh a. Chuta a conclusion-ah phe chuan “hlahawm hmuh loh kha chu paw ka ti a, tunhnuah chuan hlahawm hmu thei turin mit fim tak i pu ang u,” a ti a. He ramri an hung avanga thil hlahawm a hmuh loh kha paw ka ti a, kha a hmuh loh paw a tih taka kha vawiinah hian kan khel a ni. Tichuan, 2007 March ni 17-ah khan party ngai bawkin a rawn moved leh a. Kha kha paw ka ti khawp mai.

Engvangin nge heti teh sek a kan ram hi himlo a an hriat? Engatinge ramri hung hi an hmanhlelh em em mai? Tih loh atana tha hi kan tihnem lutuk a, tih atana tha kan ti leh si lo. Kum 10 chhunga party pakhatin paw an khawih khan Zoram harsatna a siam hnem lutuk. Tunah pawisawi lo leh tha ber ang maiin an awm a, an kihhnawk kan thian zel a nih hi. Tun hmain Burma pawh kha MNF ten, an mahni ngeiin an ti ralti leh a ni. Engtin nge an tih ral tit? An tihral tir dan chu Tidim leh Falam bank kha an han

rawk bawk a ni. Khami kha an han rawk a, a hma chuan Burma sorkar khan tha deuhin ral tlan tiin min lo treat a, tha takin min lo enkawl a, harsatna pawh kan nei hran lo a ni. Amaherawhchu, Tidim bank leh Falam bank an han rawk a, Tuibual-ah out-post an han kah bawk kha a pawl em em a ni.

**Pu LALRUATKIMA** : Pu Chairman, point of clarification. Inremna 1986-ah kan nei tawh a, khalai inremna kan neih tawh hnu khan hei kan House Leader zahawm tak pawh hmalakna fatu zingah a tel a, khalai thil hlui lutuk mai leh thil kal tawh kan chhiatna zawng zawng sawi tur khan helaiiah hian eng ang right nge kan neih tih kha ka zawt duh e.

**Pu T.T. ZOTHANSANGA** : Pu Deputy Speaker, khawvel ram ropui America-ah pawh khuan an past history te hi an inchingdarh vek a, kan past history hi thup duh kan nei a nih chuan 'i thup ang u,' rawn ti rawh u. Kan past history thup duh avanga

**Pu LALRUATKIMA** : Thup tur a awm lo, Pu Chairman, thup tur pakhat mah a awm lo. Amaherawhchu, remna leh muanna a awm tawh hnu hian khang lai kha kan tifuh tawk lo emaw khami hnu kha sawi mai ila.

**Pu LALROBIAKA (CHAIRMAN)** : Duhtawh rawh u, hun tha zawk kan neih theihna turin kan thusawi lai kha chu intibuai lo ila a tha ang e.

**Pu T.T. ZOTHANSANGA** : Pu Chairman, anni kha ramhnuai kal kha an ni ve lo va, an hre vak lo bawk a ni.

**Pu LALROBIAKA (CHAIRMAN)** : Awle, chhonzawm leh rawh le.

**Pu T.T. ZOTHANSANGA** : Pu Chairman, Mizoram sorkarah lalna an rawn chang a, an rawn chan hnu reiloteah Lawngtlai bank-te kha rawk a han ni leh nghal a. Hemi kan sawi duahna chhan chu Pu Chairman, kan rama party lian pakhat leh pawisa hi a inhnaih hrim hrim a ni. March 1,

1966 a buai-ah pawh khan, Champhai, Lunglei, Tlabung leh Sangau ah te chuan sipai outpost beih chat vek a ni a. Aizawl-ah erawh chuan outpost bei lovin, Treasury-in beih a tawh ta zawk a ni. Sum awmna hre tak party chu kan awm a ni.

**Pu LALRUATKIMA** : Pu Chairman, khawngaih takin, Lawngtlai bank rawk tu chu MNF sorkar a nih chuan puang nghal rawh se. MNF in an rawk em ni ? Tute nge rawktute chu ? MNF-ah an awm a nih chuan sawi rawh se. MNF in an rawk em ni ? (Er. LALRINAWMA : MNF sorkar-in an rawk a nih chuan sawi nghal rawh u tunah hian) tunge sawi tur a nei em kan member zahawm tak khan ? Khalai kha chu a diklo hrim hrim chungin khalai kha MNF rawk anga tih kha a dik lo reng reng.

**Pu R. LALZIRLIANA, MINISTER** : ‘MNF in an rawk’ a ti lo, ‘an lal hnu lawkah bank an rawk leh nghal,’ a ti a ni. Chuvangchuan, in inngaihbel a, a rawktu chu in lo ni ngei zawk a ni lo maw ?

**Pu LALRUATKIMA** : Pu Chairman, sawi dawn chuan sawi tur tam tak kan nei ang. Kan inpumkhatna hun niin ka hria a, kei chuan inpumkhat nan tawngkam i duhtui deuh ang u kan ti mai a ni.

**Pu T.T. ZOTHANSANGA** : Pu Chairman, aw, ni e, kan sawi zel ang e. Kan sawi chhan zawk tak chu he ramri kan hung dawn pawh hian kilometer chanve emaw vel zawng hleh phai char char, India ram lam a ni dawn tih hre reng in kha pawh kha a move tu, a support tu lam khan an sawi lang vek a. Amaherawhchu, khami kan sum hmuh tur tam lutuk mai buk kha a rit ta zawk a. Chuvangin kan sorkar hmasa ah kha chuan ramri hung hi kan hnam inzawmkhawm na te, kan inunau na te, kan inlaichinna te ai khan a buk an ti rit a. Chuvang chuan, kan hnam kal zel tur atan khan a tha lova. Chuvangin vawiina kan resolution pawh hi a rawn chhuak chiah a ni. Kha kha in hnial duh a nih chuan nakinah in rawn hnial ang. Ramri ah ram kan hungna apiangah ram kan chan char char, assessment pawh kan tifel vek an ti. Tuna in senior vice president pawhin a pawisa nen lam a rawn sawi a, hetah

hian ka rawn chhiar chhuah vek tawh kha. Chu chu Assembly proceeding hlui en ula in hmu vek ang.

**Pu LALROBIAKA, CHAIRMAN** : Ngawi rawh aw, minutes 2 ila nei a i hun kha han in adjust deuh la.

**Pu T.T. ZOTHANSANGA** : Ava tlem ve Pu Chairman, kha kha chu min interrupt nasa lutuk a, min lo hriat ve deuh pawh kha a tha. Tin, Pu Chairman, Mizoram hi kan inpumkhat loh Mizo Union pawh khan an lo hlau khawp a. Kum 1947 April ni 22 pawh khan chhiarpui te pawh an lo nei a. Tah chuan advisory sub-committee-ah memorandum te pawh an thehlut tawh a. Chuta an memorandum thehluh ah chuan Mizoram hian Sq. miles 8143 a nei a. Tichuan, population 1,46,900 an nei a ni, Cachar bialah sq. mile 300 population 9000, Chittagong-ah sq.mile 3,000 population 5,000, Manipur-ah 3,500 population 7000, Reng ramah sq.miles 250 population 7,000 kan neih tawh ah khan memorandum te kha an thehlut a. Anni hian Zo hnahtlak te kan in unau loh an hlau lutuk a. Tin, Lakhipur-ah te pawh conference an lo zuk nei tawh a ni. Kha kha min hriatpui ka'n duh a.

Tin, Pu Chairman, lehkhabu pakhat The Burmese always of socialism Rangoon-a tihchhuah ah chuan kum 1968-ah Chin Hills-ah ringawt pawh Zo hnahtlak hnam 43 tarlan a ni a. Khawchhak ah khian kum 1967-ah Zo hnahtlak 3,39,000 kan awm tawh angin tarlan a ni nghe nghe a ni. Tin, ZORO hruaitute khan U.N. General Secretary hnenah kum 1995-a an theh luh ah khan kum 1991 chhiarpuiah Zohnahtlak hi khawvelah hian nuai 50 vel kan awm a ni a ti a ni. Tin, chubakah Zohnahtlak in kan ram luah hi 1,45,6000 Sq. Km. zet a ni tih kha an zuk tarlang tawh bawh a ni.

Tin, tunhma deuh kum 1892-ah Kolkata-a Fort William-ah pawh khan Sap ho kaihhruaina hnuaiah Chin Lushai Conference kan lo hmang tawh a. Chuta kan hmanna ah chuan Sap ho thutlukna ah chuan, "Hengho hi thlah khat an lo ni reng mai, chhulkhatkual an lo ni reng mai a, kan thendarh hi a lo dik lo a ni, rorelna pakhat hnuaiah hian i dah ang u" tiin an lo sawi tawh a

ni. Keimahni in, “kan inunau e, kan inpumkhat e” kan tihna piahah hian Sap ho pawh hian unau pakhatah min lo ngai vek a ni tih kan hriat a tha a. Vawiinah hian sawi tur a tam khawp mai a, mahse hun kha i rawn ti limit si a.

Tin, ka'n sawi leh duh chu Zoram buai avangin hmun him lamah kan unau tam tak khawchhak tlangdungah an tlan chho a, chutah chuan Burma sorkarin tha deuh deuhin treatment min lo pe a, kan mi te pawhin nuam an ti a, tam takte pawh an awm nghet nghe nghe a ni. An rawn chhuk duh tawh lova, tun hnuah hian engemawzat an rawn chhuk leh a ni tih kan hria a ni. Tidim leh Falam Bank rawk a nih hma pheikha chuan khilamah kan chho deuh dur dur mai a, amaherawhchu, harsatna kan tawk ta a ni. Tun hnuah boruak a lo in lumlet a, khilamah harsatna an tawk ve a, helamah keini kan lo rem ta deuh a ni ang khilam atangin an rawn chhuk ve a, tichuan helamah tam tak an rawn tla thla ve a ni.

Chuta rawn tla thlate chuan engemaw harsatna an siam chin a awm ang. Tam tak an rawn tla thla a, chuta rawn tla thlate kha Mizorama sual awm zawng zawng hi anmahni tih ah kan puh a ni. An Resolution-a an ziah dan tak chuan Burma lama ramri hung an duhna chhan chu, ‘pawngsual te, rukruk te, rualthah te, lirthei bo, ralthuamte rawn tawlh luhna hmunpui a ni’, tih te. Tin, sorkarin revenue tam tak kan lak theihna tur a ni dawn a, an ti a. Kan Mizo mipuite kan him nan te an ti, hei hi a pawika ti khawp mai. Tin, an sawi lehna pakhatah pheikha chuan ramri zawng zawng hi hung vek ila chuan YMA duty-te pawh hi kan hahdam sawt ang te an la rawn ti zui, kha kha pawika ti.

Greater Mizoram te kan ti a, ZORO te pawhin kan hnam inunau nan te an rawn ti a. Kan hrereng ang chu award dawng Captain L.Z. Sailo te pheikha chuan ‘Insuihkhawm leh zai i rel ang u’, a ti a. Khatianga kan hnam kan inpumkhatna hun hi kan hmahlir a ni a. Engtik hunah emaw chuan hnam khatin lian takin kan la awm ve ang a, chutih hunah chuan kan la ropui ve ang tih hi kan hmahlir leh dingdihlipa kan

thlir a nih lai hian, engati nge a inrekte zawng, a ramri inhung ang zawnga hma an lak leh thin tih kha ka'n zawt duh a.

Tin, a dik tak chuan India ram chin hnuaiah pawh hian sawi ta ila, hemi keimahni Mizo hnuaiah pawh hian theihtawpa hma kan lak lai khan MNF unaute khan 'Hei chu lo ti suh u, kan Salurawn hawn tur a ni' an ti a. Kum 1986 inremna, Memorandum of Understanding-ah khan a tel ve ang a tiin nghakhel takin kan thlir a, a pawimawh zawng zawng an hlep thla fai vek, a pawl lutuk. Vawiina kan resolution hi tha ka ti a, kan hnam inpumkhatna dal tur chi ang reng reng hma la tawh an lo awm thin a, hma an lak tawhna ang khan hma lak tawh loh ni rawh se, kan duh a ni.

Tin, a tawp berah chuan Pu Chairman, kan inhung avangin kan him ang an ti a, kan inhung avanga him ngawt thei kan ni lo. Him thei ni ila chuan kan in hmun leh lo kan hung vek ang a, kan fate pawhin drug an ti miah lovang, zu pawh an in miah lovang. Chuvangin inhung avang ringawta him thei kan ni lo. Kan rilruah Pathian in chatuan a dah a, chhia leh tha hriatna a dah a, kan hnam lo thang chho zel tur atan hian theihtawpin tan kan la ang. Party bik sawi lovin theihtawpin i tangho ang u tih pahin kan resolution kha pass ngei turin ka rawn thlawp a ni. Ka lawm e.

**Pu LALROBIAKA, CHAIRMAN** : Kan sawi leh hmian kan intibuai deuh thin a, a pawl hle a. Kan inngaihthlak chian loh vang niin a lang a. Kan tawngkam engemawah khan han hmaih palh leh kan rilrua awm angte kan lo dinpui te pawh a ni mai thei a, chuvang chuan a hun kan pel duai a. Sana ka lo enmil a, 12 mins chiah a hmang a ni. Amaherawhchu, a nihna takah chuan 15 mins angin a lang na a, 12 mins chiah, kan inhnial buai deuh thin avangin hun kha a pah leh thin a ni. Tunge han sawi leh ang le. kan awm tawh lo em ni? Aw, Pu Zothangliana i lo sawm ang.

**Pu H. ZOTHANGLIANA** : Pu Chairman, ka lawm e. Kei chu hun pek belh ka dil lo ang a, tawite chauh han sawi ve ka duh a ni. Zofate inpumkhatna daltu chu engmah tih ni lo rawh se tih hi a tha ka ti a. Tun

hmain inpumkhatna dal theitu tur thil tih eng eng emaw a lo awm tawh thin a nih tih kan hria a, a pawl hle a. Khatiang kha tun hnuah chuan awm tawh lo rawh se kan tih hi a dik, a pawm nahawm em em a ni.

Thil dang sawi duah lova ka rilrua awm deuh ka'n sawi ve duh chu keini aia dai zau leh chinchang hre zau apiangte hian 'Zofate' han tih hi an huam zau tir a ni mai lawm maw aw ka ti a. Entirna han sawi ta ila, U.S.A-ah khuan, hmanni lawka pastor pakhatin a report danah chuan keini'n Burma ho kan tih thin, anmahni'n 'Chin' inti ho mi singnga chuang an awm a. U.S.A-a Zoram atanga tu tute emaw zu kal thin ho pawh hi anni ho khuan an lo lawm a, an lo mikhual a, an lo enkawl deuh thin a ni. Mizorama awm laia Burma, Pawichhia, Pawite ti mai mai thin ho khan USA te, Canada te, Malaysia te, Thailand te, Philippines-te an rah thlen meuh chuan "Mizo unau te, Mizo unau" an ti em em mai thin a ni.

Hman kum deuhah khan mi pakhat thil tih sual avangin Zoramah Aizawl leh a chhehvelah te a rapa raphlak khawpin kan in um darh chum chum tawh a. Khatih lai khan Lawngtlai lamah chuan a hminga NGO-a hruaitu kan nih lai a ni a. Hemite hi kan unau an ni, thlahtu bul hmun khat kan ni tih kan hria a. Chuvang chuan kan theih ang tawkin kan lo enkawl a, kan lo mikhual a, kan lo buaipui a ni. Chu chu intihtheihna vang nilovin thil awmia a chian leh zual nan ka'n sawi ri ve hrim hrim duh a ni.

Compensation it emaw, tute emaw sual avanga a chi a chi a mi sual leh dik lo ber mai, chhiatna, harsatna zawng zawng thlentlu anga inpuh buaih mai ang chi te hi ramhlui zia ni thei tawh sela. Zofate khawvel hmun hrang hranga awmte hi unau chhulkhatkual kan ni tih rilru leh thinlung tak takin pawm nachang i hre ve tawh ang u. Kan inpumkhatna daltu chu engmah tih ni tawh suh se.

Tunhmain party dangte an sorkar lai in thiltihtheihna hmanga inpumkhatna dal thei tur ang an lo tih kha tun hnuah chuan awm tawh suh se tih hi ka thlawp a ni e. Pu Chairman, ka lawm e.



**Pu LALROBIAKA, CHAIRMAN** : Tunge han ding leh ang le, kan awm tawh lo em ni ? Kan pass mai dawn em ni ? Ka Chair lai hian a pas-tu nih te pawh hi ka chak a nia kei hian. Chuvang chuan sawi duh kan awm tawh lo em ni ? Aw, Pu Thanliana i lo sawm ang.

**Pu LALTHANLIANA** : Pu Chairman, ka lawm e. He resolution hi tha ka ti khawp mai a, chuvang chuan he kawr hi ka rawn ha a ni, pass ngei pawh tha ka ti a, ka thlawp a. Amaherawhchu, ka tum angin kan sawi lo deuh a, inhnial nan kan hmang dawn a nih chuan ka sawi tum ang zawng zawng hi ka sawi tui loh phah a. Thil thing her lum leh Pathian thu atanga ngaihtuah phei chuan kan sawi tawh lo tur te hi kan sawi zel dawn, intihthinrim te, intihthinur te, vairam kan sawi a, Parliament-te kan sawi a, state dangte kan sawi a, kan House Leader ngei pawhin a thatzia te, kan House boruak that thin ziate a sawi thin a, kan inhnial dawn lek lek mai niin ka hria a, a paw ka ti deuh a, ka sawi lo mai dawn emaw ni ka ti zawk mah mah tawh a.

Ka lo ngaihtuahna atang chuan keini MPC, kan party atang pawhin heng hi kan tuipui a, tunhma atangte pawhin kan thil tuipui leh kan vei em em a ni tih chu Zoram hian min hriatpui a. Insuihkhawm lehna chungchangte, Zofa inpumkhat lehna chungchangah hi chuan kan tui viau zel a. Keimahni party chang lo pawh Mizoramah hian tuipui tam tak an awm zel a, hei hi lawmawm ka ti a. Ka ngaihtuahnaah tak phei chuan kan resolution hi a Kristian-in ka hria a. Kan Pathian thu chuan mi zawng zawng nen inremin awm turin min ti zawk lehngal a, chuvang chuan a Kristian ngawih ngawihin ka hria a. Miin min rem thei lo a nih pawhin nangmahni lam tal inremin awm rawh u a ti a. Keimahni lam tal hian min remlotute pawh rem kan tum tur a ni. Chu chu Pathian thuin min fuih dan a ni a.

Vawiinah hian a mover chungchangah emaw, a party thil lo tih tawh emaw han kher han kher dawn ila chuan sawi tur hi chu a tam viauin ka ring a. Amaherawhchu, min lo thlirtute, mipuiin, a em em ti a mawi lo leh ngaihthlak nuam lo ang kha kan sawi ang tih ka hlau a. Chuvang chuan khang zawng zawng lampang kha chu kei chu ka rilruah a awm lova. Chuvang chuan

he thil, tawi te ka'n sawi duh chu tha ka ti a, a pawimawh pawh ka ti a, inremin kan awm zel dawn a ni. Kohhran pawh hi inpumkhatna kan sawi kan sawi a, nakinah chuan kan la inpumkhat dawn niawm tak a ni a. Chutiang deuh chuan kan zavai hian rilru hmun khat, ngaihtuahna hmun khata kan awm te pawh hi a pawimawh a. Hei ka'n sawi zel ang a, kan ngaipawimawh zel a, chu chu hemi resolution rawn lut pawh hi a hun lai tak te pawh a nih ka ring a, chuvang chuan kan support em em a ni tih kha ka'n sawi duh a. Hei hi chu pass ngei pawh tha ka ti a ni tih kha ka'n sawi a ni, ka lawm e.

\* Speech not corrected.

**Pu LALROBIAKA, CHAIRMAN** : A thiam hle mai kha a ngaihtuahtute pawl ami, Pu Thana pheih chu "aika laih saih" tih lai khan Lungleiah khan ke in i va thleng pheih ve em ni kha? Chuti khawpa ngaihtuahtute chu an ni ve a. Awle, midang tunge han sawi leh ang, kan pass mai dawn nge? Han sawi zel rawh u, kan awm tawh lo em ni? Heti lamah hian Engineer Lalrinawma'n sawi sela.

**Er. LALRINAWMA** : Pu Chairman, ka lawm e. Vawiina kan resolution hi Zofate inpumkhatna dal tu chu engmah tih nilo rawh se tih a ni a. A resolution hi a tha khawp mai a, amaherawchu a tih hlawhtlin nan hian sawiho lo law law ila a tha mai awm mang ka ti a. A chhan chu kan sawi duh dan te, kan sawi kalphung te han ngaihtuah chuan a thu tum pelin thil dangah kan pakai a, a tum a that tehreng nen hian a sawihona hi sawi lo ta ila. A sawihona hian Zofate inpumkhatna hi a tichhe zawk dawn emaw ni chu aw! ka ti rum rum a ni. Chuvang chuan a resolution tum hi chu a tha a, a sawiho na sawiho loh hi a tih turin a phut pakhat a ni thei mai awm mang e ka ti rum rum a ni. Thil hlui tak tak te kan sawi chhuak a, he ramin, kan hnamin a thatpui lem loh tur te kan sawi chhuak a. Keini lam pawh kan chet danah khan ka inchhuang teh vak lo va, in mi hriatthiamna pawh ka'n ngen nghal rualin tawngkam mawi leh tha te hetiang hunah hian hman hram hram ni se a tha khawpin ka'n ring a ni.

Hun kal tawh te kan han sawi a, a pawimawh lai ber zawk chu hnam inpumkhatna atan chuan kan thinlung leh kan rilru leh kan ngaihtuahnate a inpawh tlan hi a ni a. Vawina kan resolution move tu pa pawh hian a ngaihtuah ve ka ring a. He kan ram hi Mizo hnahtlakte tan chuan kan Jerusalem a ni a. Zofa tlang tin mual tin, hmun dang a awm te pawhin an Jerusalem a ni a. Keini a hmuna thute hian rilru leh ngaihtuahna nen kan thinlungin kan lo lawm thiam a ngai a. Anmahni sawi nan tawngkam hrang hrangte kan lo chherchhuak tawh thin. Tin, khawsak hran, hmun hrana awm, political boundary a then darh te kan nih avangin kan tihphung pawh a inang lo a ni. Hei hi kan hriatthiam a ngaiin ka hria a. Hnam inpumkhatna nei tur chuan theihpatawpa a rama cheng te hian kan lo zir a ngai a ni tih hi vawiinah hian ka sawi duh a ni. Thumu hnu sawi chhuah sawi chhuah hi thil tul tawh lo a ni a, kan inbei dawn a nih chuan tumah hi kan in la dawn lo a ni. Thiamchan tumin kan inbei ang a, vawiina a rawn puluttu pain a rawn sawi ngei pawh hi a tum thelh in, inngeih lohna zawkah Zo-hnahtlakte hi min hnuklut thei ang tih ka ring tlat a ni. Chuvang chuan ka hnunga sawi leh tur te pawhin a dam zawngin, a constructive zawngin i sawi hram hram ang u, a mover pawh a khawngaih thlak a ni tih kha ka'n sawi duh a. Chuvang chuan tawngkam mawi leh tha i zawng hram hram ang u.

Tin, hun kal tawh a kan resolution te pawh kan ngaihtuah thin a, thil reng reng chu eng pawh hi pass tawh pawh lo ni sela, a eng a pawh chu ni sela German bang te pawh an chhu chim a, thil reng rengah thinlung hi a pawimawh zawk a ni tih laiah hian chiang tlang ila a thain ka hria a. Bangladesh lama kan unau tih an ni emaw, Burma lama kan unau tih an ni emaw, Manipur ami an ni emaw kan thinlung a inpawh phawt hi chuan inpumkhatna hi a kal zel dawn a ni tih ka'n sawi duh a ni.

Vawiinah hian thu ropui tak a ni a he thil hi. Chutih rual erawh chuan kan sawihona hian a thu tum thelh hian hnam inunauna, inpumkhatna hi a tichhe zawk ang tih hi ka hlau khawp a ni tih kha Pu Chairman, ka sawi theih ni rawh se. Ka lawm e.

**DEPUTY SPEAKER** : Tunge han sawi ve leh ang le ? Pi Vanlalawmpuii Chawngthu.

**Pi VANLALAWMPUII CHAWNGTHU** : Pu Speaker, ka lo sawi ve lawk. He resolution, “Zofate inpumkhatna daltu chu engmah tih ni lo rawh se” tih member zahawm tak Pu T. Sangkunga’n a rawn pulut hi a lawmawm ka ti hle a, Mizo hnam a thinlung tak takin a hmangaih zia a langchiang hlein ka hria.

Nichinah khan kan member zahawm tak, Pu T.T. Zothansanga khan Captain L.Z. Sailo-a a rawn sawilang a, Captain LZ. Sailo-a hi ka nu pate-a a ni a, kan naupan laiin guitar a perh a, ‘Insuihkhawm leh zai i rel ang u’ tih hla hi a sa hlarh hlarh thin a, Hmun hrang hranga Mizo awm te insuihkhawm lehna hi a vei em em thin a, min hrih thin a, naupang mai kan la nih avangin kan la hrethiam ve lo a. Ka pa te nen an ti ho thin a, Mizote thendarh a kan awm, kan insuihkhawm leh nan theihtawp chhuahin an bei thin. Tin, Zirlai Pawl hrang hrangten Mizote kan insuihkhawm lehna tura an theihna kawng kawnga hma an la te pawh hi lawmawm ka ti hle mai.

Ka sawilo ang ka ti na a kan naupan lai hun ka ngaihtuah a, a lunglen thlak hle mai. Kan unau te, hmundang ami mikhual te kha kan ngah em em thin a, kan ning em em a, ‘Burma mi hi an lo kal reng thin,’ te kan ti a, ka lo hrethiam thin lo khawp mai. Kan han puitlin meuh chuan khawvel hmun hrang hranga Mizo te insuihkhawm leh a pawimawh zia a takin ka hre chiang hle a, churang chuan vawiinah hian he resolution hi a ropui ka ti a, ka thlawp takzet a ni tih ka rawn dinpui a ni e. Ka lawm e.

**DEPUTY SPEAKER** : In sawi thiam hlawm hle mai a. Le, Pu John Siamkunga ilo sawm ang.

**Pu JOHN SIAMKUNGA** : Pu Deputy Speaker, ka lawm e. Kan member zahawm tak Pu T. Sangkunga’n a resolution rawn move ‘Zofate inpumkhatna daltu chu engmah tih nilo rawh se’ a rawn tih hi Zo-hnahthlak

thinlung raih chung a rawn tih a nih ka ring a. Nichinah khan a rawn move tawh a, a move-na thu te han ngaihthlak khan belhchian a dawl em em a ni. Chuvangin Zofate kan inpumkhatna hi thinlung lamah te a nasa em em a, Mizo, ram danga awm, foreign rama awm kan tih te pawh hian eng emaw nikhua hi chuan 'Aw Zoram' ti hian an kuk vawng vawng thin a ni. Khawi hmunah pawh hian kal se kan ram neih ve chhun, helai tlangram chhe te mah ni se khawilai hmunah pawh hian han kalin han vak thin mah ila 'Aw Zoram' kan tih hi a bang thei lo a ni. Mi tam tak Israel mite kan ni thei dah law maw ti a chhuitute chuan kan inanna lai ber ni a an sawi thin ah chuan, anni Israel mite pawh khuan 'Aw Jerusalem' an ti thin a. Chutiang bawkin keini Mizote pawh hian khawi hmun atang pawh hian kan awmna a hla emaw, a hnai emaw 'Aw Zoram' kan tih hi a reh thei lova. Keini Mizote tan chuan khawilai hmuna awmte tan pawh kan Jerusalem a ni ve a ni tih te an sawi thin a. Chutiang te atanga han ngaihthlak chuan vawiina kan resoluitiion hi a ropui hlein ka hria a. Hnam inpumkhatna leh hnam khat anga kan awmna te tinghet lehzualtu lo ni se a lawmawm hlein ka ring.

Tin, kan state chheh velah hian Zo hnaathlak tam tak an awm hlawm a, a bikin Burma ramah khian an tam zual a. Vawiina kan thusawitu thenkhat ten in sawi tawhah khan Burma ram nena kan inrina hung ni lo se an tih kha thil tha tak niin ka hria. A chhan chu, keini unaute thinlung hrang thei reng reng lo, englaipawha inmamawh leh englaipawha inggai ngawih ngawih te hi, bang anchhe dawngin min rawn thliar hran chuan keimahni'n dang thei lo mah ila, sawisel hleihtheih lohin kan thinlung a na dawn a ni. Chumi a nih avang chuan helaiah hian bang anchhe dawng hi awm lo thei sela tih hi vawiina miten kan duh dan niin ka hria. A chhan chu 1989-a Berlin tahna bang an han tihchhiat te khan, u leh nau rei tak tak lo inhmaw tawh lo te tap vawng vawnga an inkuah lai han hmuhte khan, hetiang bang mai hian mi thinlung inpawhte hmun hranah a dah a, rilru na in he khawvel a siam a ni tih kha a lang chiang hlein ka hria.

North Korea leh South Korea te kum tam tak khitiang khian then hran an lo ni tawh a. Kum 1946 vel atang khan then hran an lo ni tawh a.

Vawiinah pawh an u leh naute khatih hun laia inthen leh an thlahchhawng te thlengin inngaiin an la rum vawng vawng a ni. Chuvangin, khawvel hmun tam takah thil tha lo kan hmuh tawh hnuah hi chuan, keini helaia unauza British atanga Myanmar a indan 1948 pawh khan, keini duh thuhmun, culture thuhmun, duh dan inang ho hi chu min hrethiam em em a. Chuvangin, kan ramri te pawh hi rin bik awm mang lo khan, 'no man's land'an ti a. Tu ram bik mah awm lo, unauza chen ho nan min lo puan sak tawh a ni. Chumi a nih avang chuan a hung tur tih ri han awm pawh kha thil sawi chi niin a lang lo. Lo awm tawh a nih pawhin hei hi chu thil pawl tak a ni dawn a. Zo hnahtlakhte hi kan thlunlung a inpawh avangin thenhran chi kan ni lo tih kha kan hriat a pawimawh hlein ka hria. A chhan chu khilalah kan mi te foreign rama awm tam ber hi chu Burma rama awmte an ni a. Keini pawh kan chhungte 1954-a chhote kan hmuh tak reng reng loh, min boral san ta te pawh an awm tawh a ni. Kan u leh nau ten he khawvel an lo chhuahsanna hmun te a lo ni a. Khi lamahte phum an lo ni a. Chutiang chu a nih avangin khilai ram leh helai ram hi sawi hran theih a ni lova, ram pakhat ang kan ni.

Tin, India leh Burma inlaichinna pawh hi a tha em em a. Tun hmain British India Province a ni thin a. 1948 khan British atang khan a indang a ni. Chumi hnuah pawh India hian duat thiam tak leh awmze nei tak hian a enkawl chho thin a. Chuvangin, sumdawanna lamah te pawh kan inlaichinna a tha a. Cultural links kan ti a, hnam dan leh zia rangah te hian kan inpawh em em a. Tin, sumdawanna mai bakah kan duh hi a thuhmun em em a. A chhan chu kan chenna hmunte inang tlang thin a nih avang hian kan rilru sukthlek leh thil dang zawng zawng hi a inunau em em a. Chumi a nih avang chuan India leh Burma laichin thatna hi keini Mizote hian kan chhawr em em a.

Kum 1987 khan Rajiv Gandhi kha a han zin a, ani khan India leh Burma inlaichinna nasa takin a han siamtha a. Kha kha keini helaia hnam then hrante hian kan lo hlawkpui em em a ni. 1988 khan democracy movement a lo awm ta a. Democracy duhtute kha an lo pung khawm a. Amaherawhchu, nawr tlawm an lo ni ta a. Mahse, khatih lai pawh khan India khan vawikhatmah demna a chhak chhuak ve lem lo a ni. Kan inlaichinna kha kha khan a tichhe

em em lova. Kum 1993 khan Prime Minister Narasimha Rao han zin lehin, kan inkungkaihna nasa takin a han siamtha leh a, chu chu Zo hnahthlakte hian kan hlawkpui em em a ni. Chutiang chuan India leh Burma inlaichinna pawh hi a tha a.

Tin, India leh Burma insumdawnnaah hian Burma hian India hi a market lian ber a ni a. Kum 2000 AD khan US dollar maktaduai 220 lai hmangin kan insumdawn tawn a ni. Tin, India pawh hian Burma lamah hian kan hralhchhuak nasa ve hle a ni. A lan dan chuan 2000 AD-ah khan US dollar 75 million kan thawn chho ve tho a ni. Khatiang khan sumdawnna lamah te pawh hian inthenawm hnaite kan nih avang hian kan inhlath lo hle tih kha a chiang a. 2006-a kan insumdawn tawna pheichu a rawn lian zual ta hle a, US dollar maktaduai 650 lai a tling chho tawh a ni. Chutiang chu kan kal chhoh dan zel a ni a. Hemi a nih avang hian India pawh hian a ngaihsak chho tial tial zel a. Chu chu keini Zo hnahthlakte hian kan chhawr tial tial a, Kum 2001-ah khan India leh Burma inkara kawng tha deuh sialna tur 250 km lai, Indo-Myanmar/Friendship Road kan tih kha an hawng nghe nghe a ni. Chutiang chuan, Kaladan Multi Modal Transport Project te pawh kalpui chhoh zel a ni a. Hei hian Kolkata lawng chawlhna leh Sittwe lawng chawlhna saw nasa fein a hnuk hnai dawn a. Chuta tang chuan Inland Water Transport kan ti a, tui saw hmangin, lawng lo lut chhoin, bungraw tam tak kha Thailand ram atangin emaw, Korea ram atang emaw khan khulai Kolkata thleng tawh lovin a lo lut chho thei dawn a ni tih te kha a hriat a, a lawmawm tak zet a ni.

Tin, ram inthiantha si mahse border kan hung that lohna em em chu 2004 khan a chiang em em in ka hria. Manipur leh Burma inrina khu hung an lo tum tawh a ni. Khatih lai khan khulaia chengho khan nasa takin an dodal a. Kuki te, Naga community atang te in dodalna nasa tak kha a awm a ni. Chumi a nih avang chuan inunau te, thinlung thenhran theih reng reng loh te thenhran duhna rilru putna hi keini Mizote hi chuan kan do tlat a pawimawh takzet a. Keini Burma ramri bul maia awm kan bialte a lo a ni a. Kan bial chhungah pawh khian khilam atanga lo chhuk kan u leh nau tam tak lo inbengbel tawh te, inbengbel mekte pawh an awm a ni. Chung mite chuan

Zo mipuite min rawn dawr a, 'kan in pui a ni' tiin an rawn chhuk thla a. Nel em emin awmhmun an rawn beng bel a ni. Chutianga kan miten, kan Zo hnahtlakten ngai em em a min rawn pan leh belh bera min rawn hman lai hian keini hian rilru dang pu a, khilai border hung tumna rilru kan neih hi a fel lo hlein a lang a. Kum 2007 vela resolution awm te kha a pawitak zetin ka hria a. Keini u leh naute hi then hran tumna awm lo sela a tha hlein ka hria a. Unau zaa kan awm a, inpumkhata kan awm zel hi a pawimawh tak zetin ka hria a ni. Chuvangin he resolution 'Zofate inpumkhatna daltu chu engmah tih ni lo rawh se' a tih hian a tichiang hlein ka hria.

Hun kal tawha then hran duhna rilru a lo awm te kha vawiinah hian paih ila, hun kal tawha then hran duh a thil kan lo tih tawh zawng zawngte kha inlamletin vawiina kan House Leader, kan Chief Minister zahawm takin Zo hnahtlak hmun hrang hrang ami te, unau zaa kan len theihna tur leh inpumkhatna tur atana hma a lo lak tawhna thin ang hian kan lo tih tawhna zawng zawngte kha thinlung takin hnawl ila, vawiinah chuan unau za inhmangaih tlang, thinlung inpawh tlang te hi pal hung hian min daidang lo sela, kan inpawhna te hi hmang chho zelin khawvel thang zelah globalization tih khawvel hmun hla a awm lo, tu pawh hi kan inpawh tih hun changkanga awm kan nih tawh avangin helai border hi hung ni lo sela, keini helama chengte leh khi lama chengte hian kan thinlung leh rilruah border a awm lo ang bawh hian kan inkarah hian border hung hi awm lo se tih kha ka rawn sawi duh a. Chuvangin he resolution- 'Zofate inpumkhatna daltu chu engmah tih nilo rawh se' tih hi ka rawn support a ni. Ka lawm e.

**DEPUTY SPEAKER** : A lawmawm e, tunge han sawi velehang? Dr. K. Beichhua ilo sawm ang.

**Dr. K. BEICHHUA** : Pu Deputy Speaker, ka lawm e. Opposition lam atanga kan din loh chuan tihtawp kha in tum deuh zel bawh si a, in tihtawp thut kha kan hlau ve bawh si a, chuvang chuan han ding ve ta ila, phak ang tawkin ka'n sawi ang a. Ka sawi hnu ah chuan min vaw let hrep



lo ang chu tih kha a hmasin ka sawi duh deuh bawk a. Ngenna ka siam duh deuh bawk a, he House-ah hian.

Awle, Zofate inpumkhatna daltu chu engmah tih nilo rawh se tih rawn puluttu, he resolution rawn chhawpchuaktu member zahawm tak Pu T. Sangkunga hnenah hian lawmthu sawi tur nge ni anga lawm loh tur nge ni tih hi a central idea ka la hriat si loh avang khan engemaw chin chu a central idea pawh kha ka man ve deuhin ka hria a. Chuvang chuan mover-in a rawn move a, ka thil lo hmuh chhuah leh a thil tumte ka'n hmuh danah chuan he resolution rawn puluttu hian harhtharna a chang ta mai hi lawmawm ka ti a ni. Zoram inpumkhatna, harhtharna Pu Zawma thusawi ngei a ni ka rawn quote ni.

Chulovah a pahnihaah chuan he inpumkhatna hi a ram neitu berin mawh lian ber kan lak a ngai a rawn ti bawk a, a dik hlein ka hria a ni. Chu lovah chuan inpumkhatna neih theihna tur central idea ber kha chu border fencing kha a niin ka hria a ni. Chuvang chuan thil dang kha chu sawi tur a awm lutuk lemin ka hre lova. Inpumkhatna thil sawi hi NGO ah te, pawl hrang hrangah te leh he House zahawm takah hi chuan a inang lo hlein ka hria a, NGO anga kan lo tih te, kan lo tihsual palhte hi chu thil ho deuh hlekah te pawh ngai ila, mahse, he Zoram rorelna sang ber, he House-a sawi sualte hi a hlauhawm em em a, tawngkam kan fimkhur hle a ngaiin ka hria. Kan tihsual leh tawng sual chuan a nghawng pawh a nat theih dawn avangin. Chulovah rorel hi kan rel dik loh phei chuan tunlai khawvelah chuan revolution te pawh hi a chhuak thut lovang tih pawh hi a sawi theih lova, chutiang a nih avang chuan kan fimkhur tlan a tha hlein ka hria a ni. Inpumkhatna turin thu kan sawi emaw kan tih hi inthen darhnaah kan chan tir thei a. Chuvang chuan member-te kan fimkhur tlan hle a thain ka hria a ni.

Awle, nichina member ten in rawn sawi tlangpuiah khan kan inpumkhatnaa thil pawimawh chu Indo-Myanmar boder fencing bak kha in lo sawi awm ka hre lem lova. Awle, kha pawh kha thil pawimawh tak a ni. Myanmar lama kan unaute leh hmun danga kan unaute mention kha in awm

mang lo tlat mai a, chuvang chuan a zuk point ber kha chu inpumkhatna ai mah khan kha resolution Indo Myanmar fencing 2007 demna kha a ang tlatin ka hria a ni. Chu chu Pu Deputy Speaker, point khatnaah ka sawi duh a.

Keiina inpumkhatnaa ka sawi duh chu mover-in a mawh phurtu ber chu Mizorama chengte hi kan ni a tih ang khan Zofate In pui ber Zoroma chengten inpumkhatna tura kan tih tur ni a ka hriatte lo sawi ve ta ila.

Pakhatnaah chuan kan inpumkhatna tha tur chuan sum harsa tak kara kan din lai, chhungkaw tin harsa taka kan din laia chhiah nasa taka tihpun hi ti lo ila kan inpumkhatna atan a va tha dawn em tih kha point khatah ka rawn sawi chhuak duh a ni.

Tin, point hnihnaah chuan a tu party pawh hian lo sorkarin rorel ila flagship programme eng engte emaw kan nei thei, chungah chuan inthliar hranna hi awm miah lo se. Ruling leh opposition thliar hranna awm lovin central sorkarin flagship programme tana sum Mizoram mipui tana sum min lo pek ang tak hian eng party pawh hian dawng thei ta ila. Opposition tana dawn harsa tak hian inpumkhatnaah hian harsatna min siam sakin ka hria a. Chu chu tih loh ni se tih kha point hnihnaah ka sawi duh a.

Point thumnaah chuan state dangte kan intehkhin fova, intehkhinna lai tur a awm a, intehkhin lohna lai turte pawh a awm. State tam tak puitling tak infrastructure puitling tawh leh kan hma kum tam tak lo kal tawhte nena intehkhin chuan kan tih loh tur tam tak a awm ang, kan tih tur tam tak a awm ang. Chung avang chuan state dangin an tia lawm tih a vawiina kan ramin chhiah tam tak kan lak kan lakte hi Zofate context-ah chuan a va chi loh em ! Engvang nge kan tih chuan Zofate anga thawh lawm thawh tam hi khawvel ramdangah hian an awm ka ring lo a ni. Chhiatni thatni thawh lawm a lo awm, Kohhran thawh lawm a lo awm, tlawmngai pawl thawh lawm a lo awm. Chutianga thawh lawm tam tak thawh thin kan nih laia thil rit tak chhiahin min han delh leh takah hian keimahni leh keimahni intodelh lohna leh engemaw harsatna avang hian inpumkhatna hi a siam lo ang tih hi rilruah lian takin ka

nei a ni. Chuvangin chhiah tihpun hi inpumkhatna a dal loh nan tih loh ni rawh se.

Point linaah chuan Zofate kan inpumkhatna khawtlang leh chhungkuaah tichhe palh thei thil Zu hi chu kan ramah hian zuar lo ila a tha awm mang e aw tih ka ngaihnan a ni.

Tin, a panganaah chuan, tupawh hi sorkar ta ila kan inpumkhatna tura tha deuha ka hriat chu sorkar hnathawkte hlawh hi regular takin pe chat chat mai ila, hlawh pek theih loh hi awm lo sela kan inpumkhatna hi a tha viauin ka ring a ni.

A point ruknaah chuan Pu Deputy Speaker, nangmahni pawhin border fencing alawm in khel in khel. 2007-ah border fencing resolution vang alawm in buai in buai. Chuvangin nangmahni thiltih chu ka sawi ve a ni mai alawm. Point 7-naah chuan kan inpumkhatna a thatna turah chuan sorkar hnathawk ho hian GPF te harsa lo tak hian withdraw thei ila. Tin, kan TA/DA te harsa lo te te hian la zung zung thei ila inpumkhatna hi a van tha dawn em tih hi rilruah ka nei a ni.

Tin, a point 8-naah chuan kan zirlaite hian a hun takah leh an chan tur dik tak te hian scholarship leh thil dangte chang ta se, a inpuia cheng Mizoram chhunga cheng hian hma la tu tur kan ni tih a sawi bawk si a, inpumkhatna atan a van tha dawn em tih kha rilruah a awm bawk a.

Tin, point 9-naah chuan sorkar hian motor te hi lei vak vak lo ila sum kan indaih deuh ang a, kan inpumkhat viau mai dawn lawm ni tih kha rilruah ka nei a ni. Chutiang chu a ni a, thil tam tak sawi tur a awm a, Pu Deputy Speaker, chu chu ka ngaihtuah dan a ni a, in ngaihnan theuh in sawi ve ang a. Pu Deputy Speaker, chuti a nih avang chuan vawiina he House zahawm taka kan ram roreltute hian chutiang hawi zawng chuan rorel ta ila, Zo hnathlak tumah pawh hi kan insawisel ka ring lova, kan va han inpumkhat teh lul dawn em tih ka rilruah a lian hle a ni.

Vawiinah hian he Zoramah tupawh Pathianin rorelna hi kan kutah a lo dah mai thei, chutih laia vawiina roreltute, naktuka roreltute zel turin kan hriat tur leh kan inpumkhatna tura pawimawh deuha ka hriat chu ram rawngbawlina kawngah hian mipuite hi No. 1-ah dah thei ila, indaih loh chang deuh pheih hi chuan roreltute hi inhrek deuh hlek ila. Arvind Kejriwal te tehkhin dawn ta ila chuan, anni chu kan ti mai thei, mahse kan intehkhinna tur point a awm ve a ni.

Khutianga Hausa tak leh intodelh tak an ni chung khuan anni chuan anmahni inhrekin, a car hman te khu simple te hmangin VIP light pawh vuah lovin khung te khu entawntlak tak a ni. Amah a inhrek na na na chuan economic lamah harsatna a lo zia a, an inpumkhat a. Chutah chuan ram mipuite pawh khu a thlawnin tui a pe thei a, tui a thlawnin an pe thei tlat a ni. (Deputy Speaker : I hun a tawp) Power te pawh an titlem zel a, tunah chuan Pu Deputy Speaker, khawngaihtakin vawiinah hian kan rilrua lian ber tur chu, vawiina ram rawngbawltu/hruaitute hi inhrek deuh hlek ila, chutiang chuan kan mipuite leh roreltute dinhmun a inthlau lutuk a. Kan mipuite dinhmun a hniam a, keini kan dinhmun a sang ta lua, kan mipuiten min hmu chiang a ni. Khawvel history ngaihtuah ila, revolution tam tak a chhuahna te pawh kha hengte hi a ni lawm ni tih te ka rilruah a awm a ni. Russian Revolution Bolsevic an tih te, French revolution kan tih te, Cuban Revolution kan tih te, Phillipine Revolution kan tih ang chi te pawh hi heng atang hian a rawn chhuak a, inpumkhat lohna a thleng a, revolution an tichhuak thin a ni tih hriain vawiina suggestion hi tha ka tiin lawm takin ka pawm ang tih kha Pu Deputy Speaker, ka rawn sawi a ni e, ka lawm e.

**DEPUTY SPEAKER** : Minute 5 chiah hun a la awm a, Pu K.S. Thanga khan minutes 5 chhungin i khung thei ang maw ?

**Pu K.S. THANGA** : Pu Deputy Speaker, ka lawm e, a hmasain kan din hram duhna pawh chawhnu lamah hian min hriatthiamna ka'n dil duh a, kan Finance Minister hovin Finance thil pawimawhah meeting kan nei dawn a, chawhma lam ka'n chuh hram hram a ni a. Meeting kha a rei dawn leh dawn

loh sawi theih a nih loh avangin. Tin, a lo rei deuh a nih pawhin kha a zo tep a, mahse min pek belh deuh mai turah ka ngai a.

Kan member zahawm tak Pu T. Sangkunga'n 'Zofate inpumkhatna daltu chu engmah tih ni lo rawh se' a tih hi ka'n support ve duh a. He resolution ka hmuh tirh hian ka lung lungte pawh an tileng ve a. Ti ve khanglang ila, kum 1980 chhoah College-ah te kan kal a, zirlai hruaitu kan ni a, MZP Headquarters-ah te hruaitu ni chho in Mizo Unification, Mizo Hnahthlakte inzawmkhawmna thuah hian a hruaitu, tha leh tui kan lo thawh ve nasa viau tawh a. Chutianga kan thawh lai khan sorkar dinglai te nen inhmuhfuh lohna awmchho zel avangin kei pheih chu vanduaithlak takin kum 1982 khan lu man te siam hial ka ni a, MNF underground a tel ve ni miah si lo khan an zinga exile, raltlan humhim ngai ang khan MNF underground hmuna Bangladesh-ah te thla 9 lai ka zuk raltlan ve leh a ni. Hun harsa leh hrehawm tam tak kan tuar a, chung hunlaia Mizo Unification kan sawi thin leh kan ngaihtuahna te vawiinah hian he House-ah ngei han sawithar lehna hun a awm hi kan member zahawm tak nula kan neihchhun Pi Awmpuii ang khan keipawh ka lungte a ti leng a, ka ngaihtuahna te a tithui hle a ni.

Khang hunlaia kan thian tha tam tak, kan hruaitu tam tak he hmuna awm ve tawh lo te an awm a. He House-a member lo ni tawh te, la ni ve kher lo te an ni. Chutiang chuan Bangladesh te hial kan zuk thleng a, khung Chhippui, New Lawngkawrh, khunglai tlangdung zawng zawnga Mizo hnahthlakte nen underground ho zingah kan awm ve avangin khatiang khan hun kan zuk hmang a ni a. India ram pawna awm an ni a, Bangladesh ram chhungah an awm a ni. Mahse kan Mizo nihna kha a lo thang lo hle a ni tih anni hote nena thla 9 kan chen ho chung khan ka zuk hmu a. He resolution kan hmuh hian khutilai Bangladesh border fencing kan tih hma khan hetiang lam te hi ngaihtuahna lo nei tawh ila chu tih te ka ngaihtuahnaah a rawn awm ve rum rum a.

**DEPUTY SPEAKER** : Ngawi rawh lawk, hei kan hun hi dar 1 a ri tlat mai a, a laklawh bawka, sawi zawh tir mai ang u aw.

**Pu K.S. THANGA** : Pu Deputy Speaker, ka lawm e, Minute 2/3 vel chiah a awm khan ka ding laklawh si a, helam hi tlemin an ti ang a, chawhnu lamah in titlai ve leh deuh mai a ni ang chu. House phalna-in hun tha min pe a, lawmthu ka'n sawi e.

Chutiang chuan kan mover khan a rawn phawk ril hle a, Bengkhuaia hunlai Zoluti te chanchin atang te leh thil hlui historical facts tam tak vawiinah a move-naah khan a rawn highlight a nih kha. Ka bial Sailam, (a hminga Bial neitu ka nihna angin) te saw Bengkhuaia hmun, Kohhran pui ber Presbyterian te leh sorkar ang te pawhin Art & Culture te pawh saw lungphun te a awm thep thup a, khatiang te rawn chhui chho kha a ni a. A thu hrimin unification kan tih hian hetilai Mizoram chhunga awm te chauh intih Mizona ang hi, hei kan thangthar leh lehkhathiam zawk te, mithiam zawk te an lokal zel a khawvel kan dai darh zel a, helai hi kan ngaihtuahna a zauh a ngai a ni tih hi vawiinah hian helai chhung, India ram chhungah pawh Mizoram state chhunga awm hi kan rilru a zauh a ngai a ni tih pawh hi kan hriat a tha hlein ka hria a.

Vawiinah hian Hmar, Mizo pa helai House chhungah hian kan awm a, Ralte Mizo kan awm a, Pawi Mizo kan awm a, Paihte Mizo kan awm a, Mara Mizo kan awm a. Chutiang chuan kan zavaia kal khawm khan Mizo hi a siam a ni tih hi kan hriat fo a tha a.

Hmanni khan kan thian pakhatin khilai Myanmar ram chhunga British hovin India ram an chhuahsan dawn a an rorel fuh loh avanga kan unau tam tak khi lamah tunah chuan international boundary hrangin an awm a ni. Amaherawhchu, vawiinah hian a nihna takah chuan khing khi he Mizoram-a kan rawn luh thlak dawna kan lokalna kawng a chambang te, tin, chu aia tlaiah chuan heta tanga han chho leha Mizoram tam leh harsatna avanga eitur chak la a kal te an ni. Chung kan Mizo hnahtlak, kan unau dik tak te chu heta an lokal hian tawngkam mawilo te, tawngkam tha lo te helai Mizoram chhunga lo awm ten kan lo cheh khum hi na an ti hle a ni tih hmannah khan mi pakhatin min hrih a.

“Ka pa hi Ngopa chhuak a ni a, tichuan tam avangin ka pu hoin kan chho va. Khilai Tahan velah awmhmun kan bengbel a. Keini ti hian kan lo puitling a, helamah kan lo chhuk thla leh a, ka pa chu lo chhuk thla leh tura kan sawm chuan, ‘khalaihan khan awm ta ila Burma putarah min lo ngai tawh ang a, thi pawh ni ila Burma putar thi ka ni ang a. Khalai Mizote khan, ka pianna ram amite khan tunah hian tawngkam tha lo tak takin helam mite hi tawngkam tha lo te kan chungah hian an hmang thin si a, engtin nge maw ka lokal ngam ang le,’ a ti a ni,” a ti a, a hrehawm ka ti hle a ni.

Chuvangin, vawiinah hian kan tawngkam hman te, hei kan ramah hian mi dik lo suahsualna leh thil tha lo rawn titu sumdawng tam tak an lokal a, chu chu tuman kan duh lo. He ram chhungah pawh chutiang mihring dik lo chu kan awm a, he ram pawnah pawh hian an awm tho a ni. Chu mite avanga kan unaute zawng zawng kan hnualsuat a kan thin hrik hi a dik lo a ni tih hi chiang taka hre ve tu niin ka inhria a. Kei Pathian zara ka dam chuan kumin ‘ber’ thla lamah emaw, khaw nawm deuh hunah, nakum kum thar lamah emaw hian khing kan unaute khi han tlawhchhuah a, Burma ramchhung Tahan leh khinglai vel te khi han hrut ve hrim hrim hi Pathianin rem a tih chuan a tum pawh ka tum nghe nghe a ni. Bangladesh lam chu Mizo hnahtlak chenna thui tak ka hrut ve tawh avangin khulam khu chu a tul ber lo vah ruat ta ila.

Chutiang chuan vawiinah hian hnam anga ropui nih kan duh chuan, hnam ropui nih kan duh chuan vawiina te tak te a kan ngaihtuahna awm hi rilru zau taka kan puan in kan zauh a, kan u leh naute mover-in a rawn sawi ang khan, nu leh pa chan changa kan lo huikhawm a, an khawhar ni te, an lunglen ni te a an lo kal a an belh tur kan ni tih hi kan hriat a pawimawh hlein ka hria a ni. Chuti ni lo va lo sawisel a, lo diriam a kan lo tih chuan he hnam hi engtikah mah a ropui ngai dawn lo tih hi ka sawi duh a ni. Chuvang chuan midiklo chu a dik lohna angin hremna pawh tuar rawh se. Kan ramah hian sumdawanna hmanga drugs emaw, thil dang dik lo emawa thil tidiklo te chu danin na takin hrem rawh se, dan a awm vek a ni. Mahse chung avanga mitha zawng zawng (technical Problem)... em em rual hian he

Mizoram chhunga awm te hian mawhphurhna kan zavai hian kan nei a ni tih hi kan hriat a pawimawh a.

International boundary fencing, border fencing kan han kalpui hi vawiinah hian environmentalist te leh ransa chanchin zir mite, hetiang lama mithiam te chuan a pawl an ti tlawk tlawk mai a ni. Sakei hi entirnan lo sawi ta ila, zan khatah 40 km, 50 km chunglam te vak thin a ni. Chutiang chu helai leh Bangladesh ram fencing ringawt pawh khuan ransa nungchang te leh an dinhmun hi a tichhe vek a, a tiderhawng vek mek a ni. Engpawh ni se, India sorkar thiltih a ni a, he state a awm te hian kan duh chuan thil tam tak India leh MNF inremna te pawh khan thil tha te pawh a rawn ken ve lai Article 371G-te pawh kha a awm ve a ni a. Chu chu a remna siamtute khan hman tangkai thiamna kha an lo nei taw lo em ni aw tih te ka ngaihtuahnaah a awm fo thin a ni.

Vawiinah hian kan inpumkhatna daltu, kawng chi hrang hrang a ni, thil pakhat mai pawh a nilo, thil chi hrang hrangah hian he Mizorama cheng, a neitute hian kan unaute hrsatnate hriain he ram hi Mizo hnahtlak zawng zawngten an Jerusalem an ti a, thlamuang taka an rawn hahchawlh a, thlanmuanna leh hlimna, an rilru hahna te an rawn tihzalen a, an rawn hahdamna hmun atana an hman theihna tur hian he ram hi kan siam pawh a ngai a ni.

Chuvang chuan, vawiinah hian kan inpumkhatna lam tichhe lo zawng hian kan zavai hian tan la ila. Border fencing te pawh sorkar anga kan do theih chinah chuan kan u leh naute nena min sat thla zawngin Tripura te, Manipur te, Cachar-ah te pawh kan unaute tam tak an awm. Khang zawng zawng pawh kha he resolution hian a huapin ka hria a. Khawchhak lam mai ni lovin, Bangladesh-te pawh a huapa ni tih hriain a neitu rilru puin, ram danga awm, khawhar taka min ngai em em a helai hi an Jerusalem anga rawn ngaitute thlavang hauh tur hian tan la in, he resolution hi kan zavai hian i support ang u tiin ka support-na thu ka sawi ve a ni e.



Pu Deputy Speaker, hun tha tak mai min pek avangin lawmthu ka sawi e, ka lawm e.

**DEPUTY SPEAKER** : Awle, kan chawl rih ang a, dar 2:00-ah kan thukhawm leh dawn nia.

### **2:00 PM**

**DEPUTY SPEAKER** : Sawihona kan chhonzawm leh ang a. Chawhma lam khan a move-tu nen member 9-in kan sawi hman a. Le, tunge han tan ang le? Pu R. Vanlalvena.

**Pu R. VANLALVENA** : Pu Deputy Speaker, ka lawm e. Kan resolution puluttu kan member zahawm tak Pu T. Sangkunga'n 'Zofate inpumkhatna daltu chu engmah tih loh ni rawh se' ti a a rawn move hi tha ka ti a. Hetiang resolution tha tak mai a pulut hi lawmawm ka ti a. Kan hma lamah khan thu ngaihnaawm tak tak leh thu tha tak tak kan ngaithla tawh a. A resolution-ah hian inpumkhatna daltu chu engmah tih ni lo rawh se tih a nih rualin kan inpumkhat theihna tur kawng sawi zau a remin ka hria, chu chu kan ram thang zel tur leh kan hmasawn zelna tur atan hian a pawimawh telin ka hria a. Chu tho chu kan member zahawm tak tak te khan an sawi zau a, a lawmawm ka ti a. Keipawh khatiang lampang kha han sawi zau a tulin ka hria.

Kan ram kan hnam hi helai (tuna kan awmna) thlang kan tlak atanga chhut hian hnam naupang tak kan ni a. Kan thlangtlakna kan history thui zawk chhui erawh chuan kan upa deuh pawh a ni mai thei nain, helai kan thlangtlak hnu atang hian kan chhui lo thei lova. Chuvang chuan kan history ziaktu kan mithiamte ziah hi hmuh tur leh chhiar tur tam tak a awm a, chu chuan ka rilru a luah thin. Tin, kan hnam kal zel tur atan pawh zau zawk leh tha zawk kan hriat a kan nunpui pawh hi a tulin ka hria a. Mizo history ziaktute ziah kan hmuh danin Burma ho hian keini Mizo ho hi 'Chin' min ti vek a, Bangladesh ho hian 'Khang' min ti a, British ho hian 'Lushai' min ti a, Bengali ho hian 'Kuki' min ti a. Chu chu keini Mizo hnahthlak hnam hrang

hrang miin min hriat dan a ni. Keimahni hian inhriat dan kan nei lova, miin ni a min hriatna hi kan pawm mai niin a lang. Chuvang chuan kan hmasawn zelna turah hian miin ni a min hriatna pawm ai chuan keimahniin ni a kan inhriatna kan pawm tlan theih tura hma kan lak a, chumi kawng kan zawh chu a tul khawpin ka hria a. Kan hun hmasa lam kha chuan Liana Sailo tlangval kha sipaiah zuk tang ta se Liana Lushai a ni a, Ralte pawh chuti tho. Chutiang deuh chuan British hovin min awp a, min influence em avanga British min hmuh dan ang hi niah kan han inngai mai deuh a. Chutiang chuan rei tak kan kal a, chu chu kan inpumkhatna daltu leh keimahni a kan hawi zauna tur min dai dangtu pawh ni deuhin ka hria a.

Mizo hnahthlakte hi hmun hrang tlang hranga kan awm hian kan awmna tlangin a ken ang zel hian kan hming, kan hnam hming te hi kan pu deuh mai niin a lang a. Thenkhatin Hlawngching an tih te hi thenkhat lamah chuan Hlychho an ti a, Chinzah kan tih te pawh thenkhat laiah Chozah an ti a. Chutiang chuan Chawhte te pawh khilam Manipur lamah te chuan Chhaite an ti a. Hnam khat vek niawm tak hi kan awmna tlang a hran avangin kan hnam hming a dang zel niin a lang. Biate hnam te pawh khi Manipur-ah chuan Kuki ni ah an inngai a.

Haflong-ah chuan Biate hnam tho hi Hmarah a then an awm a. Chutiang chuan hnam khat chi khat ni si hi kan awmna tlang a dan avang hian kan nih phung leh kan put dan, kan inhriat dan a dang deuh mai mai niin ka hria a. Kum 10 kal tawh hnu a vawikhat Manipur-a kan zin tumin Kuki pa upa tawh tak hi kan kawm a, an inah kan leng a. Chumi kum upa tawh tak maiin a sawi ka rilru a awm reng chu 'nangnin Sailo in tih hi keini hian Sihloh kan ti a, hnamkhat pumkhat kan ni a. Amaherawhchu, kan awmna tlang a dan avangin kan lam dan hi a dang mai mai a ni, chuvangin pumkhat, angkhat reng kan ni' tih hi a lo sawi a. Vawiin thleng hian ka rilruah a la awm a, a dik duh awm mang e aw ka ti a. Helai keimahni Mizoram kan tih kan state chhungah pawh chi khat, thlah khat ni awm tak kan awmna tlang a dan avanga hming dang hret hret te pawh hi kan awm a. Heng zawng zawngte pawh hi

pumkhat, thuhmun kan nih hi kan hriat zel a, chutiang zawnga tan kan lak chu tul khawpin ka hria a ni.

Han sawi zau deuhah chuan British hovin min awp laiin Rangoon atangin Chin Hills Regulation an siam a, chu chu khilai keimahni Mizo hnahtlak ho Chin-hovin an hman tur a ni a. India ram lamah Calcutta atangin Bengal Eastern Frontier Regulation an siam a, chu chu India ramin an hman tur atana tih a ni a. Chumi kaihkhawm chu vawiina ILP (Inner Line Permit) kan tih tak hi a ni a. India-in independent a lo neih khan, 26<sup>th</sup> January, 1950-a Indian Constitution hman a lo nih khan India indan hmaa dan lo hman tawh te hman chhonzawm zel theih/phal/remtih a nih avangin vawiin thleng pawhin ILP hi kan la hmang ta a ni a. Chuvang chuan Burma lam atanga Mizo hnahtlak lo kal te, hmun dang dang atanga Mizo hnahtlak lokal te hi chu ILP an ken kher emaw, keinin ILP kan lo phut kher hi a ngai lo niin a lang a ni. Chuvang chuan hmanlai British hunlai atangin vawiin thleng hian a ril zawka chhut chuan pumkhat, hnam khat, thlah khat kan ni a ni tih hi a chiang khawp a ni.

Amaherawhchu, kan awmna ber zawk keimahni min hrechiantu ber tura ngaih India hian min hre fuh chiah lo emaw chu aw ka ti a. Kan Constitution Scheduled Tribe List kan en chuan 'any Mizo' (Lushai Tribe) an ti, a bracket chhungah hian Lushai Tribe tih kha a awm tlat mai a. Tam takin an sawifiahnaah Lushai te chauh hi Mizo an ni tih theih, ngaihbel theih hian a awm tlat mai a. Helai te pawh hi thiah ni ta se emaw, thiah a nih loh pawhin hei hi min daidanguah tang lo se, helaia Lushai Tribe han kualkhung ringawt hi keimahni min daidanguah hmang lo hram hram thei ila thain ka hria a. Mizo hnahtlak zawng zawngte hi ka sawi tawh ang khan kan thenawm ramte Burma, Bangladesh, British hote leh Bengali hote pawhin min hmuh dan a hran theuh avang hian keimahni zawk hian chu min hmuh dan chu phelh ila. Helai eng emaw ziak ngaih kawih theih lo awm palh hi ngai kawi lo ila. Keimahni kan vai hian Mizo kan ni, scheduled tribe list-ah hian kan leng a ni tih kan rilruah hian chiang se a that ka ring a. Hetiang ziak mai mai hian min daidang lo se, kan vai hian pumkhat kan ni tih kan rilru ah nghet se a thain ka hria a.

Kan history thui deuh han sawi chuan entirnan, vawiin thleng pawha Mizoram chhunga awm Bawm kan tih te, Pang kan tih te pawh saw Mizo hnam Khawlhing te, Ralte te, Khiangte te an ni a. Pang kan tih te pawh hi chutianga hnam hrang hrang vek an ni. Chuvang chuan in la hrang emaw, han in ngur a, chutiang khatiang chu in ni han inti tur bik hi kan awm lo va, kan vai hian hnam khat kan ni. Vawiina kan hriat HPC Unit hruaitu lawk tak tak te pawh khu ‘eng hnam nge in nih’? tih hi ka ching a. HPC-a theihtawpa hma la a, tan khawhtute pawh khu Ralte te an ni ve tho a ni. ‘Chu HPC-ah i tang em em a, Ralte i nih chu’, kan han ti a, ‘nia, pumkhat vek kan ni alawm,’ hi an ti ve leh mai tho. Chuvang chuan keimahni min then hrangtu leh min daltu hi tlem te a ni a. Thui zawka chhut a, ngaihtuahna hman chuan Mizo hnahtlak hrang hrangte hi pumkhat, chi khat, in lungual tur kan ni tih hi kan rilruah lian se a tha in ka hria a. Chuti zawng chuan kan ngaihtuahna hi hmang ila. Hemi keimahni pawnlam lan dana intih Mizo viau lampang hi kan tih tur niin a lang lo va, kan thinlung chhungah Mizo kan nihna hi lian se.

Tin, kan hmalakna kawng tinrengah pawnlama kan lan dan ni lovin chhungrila kan tih dan leh kan nunpui dan zawk hian Mizo kan ni a ni tih hi phawk chhuak se. Pawnlam lan dana intih Mizo viau a, a taka Mizo inpumkhatna daltu nih leh lawi si hi thil awm thei a ni. Chutiang lakah chuan kan inven tlan hi thain ka hria.

Kan resolution move-tu zahawm takin mihring hi hung chi kan ni lo, ran chauh hung chi an ni a tih ang deuh khan kan inhung mai te hi a fuh lo va, hung chi kan ni lo va. Kan thinlunga inpumkhatna lian zawk kan neiha kan inkalpawhnate a zau a, inhriatthiamna nen kan inpumkhat hi a tulin ka hria a. Tun dinhmunah hian Bangladesh-ah te, Burma-ah te awm mah ila, hnamdang, ramdang kara kan awm na chuan kan thinlung hi daidang lo se. Entirnan Burma rama kan Mizo hnahtlakte an lo sual a, thil dik lo an lo tipalh a nih pawhin Burma mi an nih anga en lovin, an thiltih sual avang zawkin hremna te pawh hi pe ta zawk ila. Chutiang zel chuan India ram chhunga kan awm a nih pawhin kan sualna kha India ram chhunga kan awm vanga sual a hrem ni lovin keimahni sual leh kan thil tih dik loh avang zawkin in hrem ta zawk ila. Chutiang zel

chuan kan nih phung leh kan tawngkamah te pawh hian thahnemngai ta ila. Kan inlungual theihna tur in kan vaiin theih tawp chhuah ila tih hi Pu Deputy Speaker, kan sawi a ni.

Chuvangin, vawiina kan resolution ‘Mizo fate inpumkhatna daltu chu engmah tih ni lo rawh se’ tih hi kan zavaia lungual taka ka’n ram hmasawn zel nan, kan inpumkhat zel nan ka rawn thlawp a ni, ka lawm e.

**DEPUTY SPEAKER** : Le, tunge sawi leh ang, Pu R. Romawia,

**Pu R. ROMAWIA, MINISTER** : Pu Deputy Speaker, ka lawm e. Vawiina kan thupui hi a huapzau zawnga kalpui chuan huapzau tak thei a ni a, huapzim deuh tum pawhin a huapzim theih a. Amaherawchu, Zofate kan tih in a huam chin hi kan ngaihndan chu a inang tlangpuiin ka hria a. Kum 1903-ah G.A. Grierson-a ten Linguistic Survey of India-a report an pek khan keini ho Tibeto-Burman, a bik takin Chin te leh Lusei hote kha chu hnam in hnai zuala dah kan ni a. Linguistic lam atanga an thlir danah chuan hnam in hnai zual leh heng ho hi anni chuan hmanlai atanga vawiin thlenga thil la in chhawm zel, kan taksa bung hrang ‘mit’ kan ti emaw, ‘ka’ kan ti emaw, ‘lu’ kan ti emaw ‘ban’, ‘ke’ kan tih lam atangin an han chhut a. Tin, number chhiar dan 1,2,3,4, tih chhiar dan te, inlaichhinna te an han chhut a. Tin, hmanlai leilung siam tirh atanga awm ni, thla, arsi, lung, lui, tui tih vel atang ten an han chhut a. Chutiang chuan kan inkoh dan, mihring laichin unau hnai bik, ‘nu, pa’ tih ang chi te, Mama, Mami kan intih ang chi. Hetiang angte an han tih an han tih khan hnam lian tham tak mai hi thlah khat kan ni ti khan min han ti kha a ni a.

Tin, kan physical feature hrim hrim ah te thlahkhat kan nihna hi a hriat theih a, kan taksa pian hmangah te, kan thil ei duh zawng te.

Tunlai in missionary lo thlen ni sawi danglam te pawh a awm a, ka ngaihndan chuan Rev. William Williams-a te rawngbawl turin Khasi ramah an awm a, Khasi ram te chu hmeichhe lal na ram a ni a, Lushai an rawn thleng chu mipa lal zawkna ram leh hmeichhiate nena hnathawk ho dual dual kan nihna

lamah te, kan ei leh in lamah te, an rawn kal tlang ram lian pui pui ah te Bawngsa duh lo tlat te, Vawksa duh lo tlat ram te an ni a, keini kha chu a duh ram te kha kan lo ni bawk si a. Tin, kan thih te khan inhal te kan lo ni ve lova, inphum hnam te kan lo ni ve a. Chuvangin kan missionary lo thleng hmasate pawh khan Mizoram hi an ngaina a, missionary nih pawh kha nuam an ti a. William Williams-a haw thla hlim pawh khan Mizorama missionary hnathawk turin a zuk dil ta vang vang kha a ni a. Tin, Pu Buanga leh Sap Upa lo thleng hmasa te pawh kha Mizoram hian an lung a len tlat mai a, ei leh in lam ah, thil engkim ah hmel hmai te danglam mah ila kan culture kha sap te nen inhnaih deuhna lai kan lo neih man fuh khan Aizawl lamah Zosaphluia te lo awm hman tawh mah sela Lunglei lamah tal an lo kal leh hram hram ni te pawh khan a lang a ni. Chutianga thil thui tak han thlir khan keini heti lai hnamte hi hmun khat anga min lo en khan min chawikan kha an lo duh hle niin a lang a ni.

Tichuan, politics lamah chuan kan la naupan em avangin politic lama inhuikhawmna hna chak tak a awm thei lova, min hrechiangtute khan inawpna pakhat min dah te an han tum a, inhumhalhna bik te pawh min han pe a. Hnam lian te chimral a kan awm loh nan kan identity kha min vawnhimsak tumin Chin Hills Regulation te, Bengal Eastern Frontier Regulation-te, khatiang khan min hung hram hram a. Tin, inawpna lamah pawh kan ngaihthlak ang khan, Foreign Ministry lam atanga awp te kan ni a, a hnu lehah te pawh khan Governor-in-Council te awp chhoh zel kha kan ni a.

Chutiang tak chuan kan identity kha Sap ho khan min humhalh sak kha an tum ve hram hram niin a lang a ni. Mahse politics a lo lut a, inpumkhatna lamah hian kan kal chak har em em a, kohhran lamah erawh chuan theihtawp an chhuah thin a, chutiang chuan Tiau ral lamah te, Haflong lamah te, Saichal (tuna Bangladesh) lamah te hmun dang dangah kohhran lam chuan inzawmkhawmna kha an thawk ve zar zar a, hlabu pakhat leh Bible pakhat neiin kan awm a, inpumkhat nan hma thui tak pawh an la a ni. Amaherawhchu, vawiinah chuan kohhrante pawh hi an beidawng tawh niin a lang a, kan kalphung engemaw ni ni zo ta ka hre lova, Bangalore a ni emaw, Delhi a ni emaw Mizo kristian-ho inkhawm-ho theihna kan nei mang reng reng lo mai

a, chutiang chuan kohhran-te pawh an beidawng tawh niin ka hria a ni.

Unau kan ni lo ti ang zawng khan kan kal chho ta zel kha vawiinah hi chuan kan duh tawk a hun hle tawhin ka hria a ni. He House zahawm takah hian Mizo fate huikhawm zel hna hi kan thawh a tul hlein ka hria a ni. Chuvangin inthendarhna politics hi lo tawp tawh sela, inpumkhatna politics-ah hian kal ila, kei chu Mizo ka ni lo, chumi kan ni tih ang chi hi bansanin awm tawh se tih ka duh em em a ni. Chuvangin Art & Culture lam te chuan theihtawp kan han chhuah tang tang a, kan naute ho hnenah pawh Hausata, Pawi lal lung a ni emaw theihtawpin humhalh tur, Fanai lal Rorehlova lung a nih pawhin theihtawpa humhalh tur Siakzapauva Thado lal hmun hlui a nih pawhin theihtawpa hunhalh tur, tiin keini Art & Culture tal hian theihtawp kan chhuah loh chuan kohhranin inhuikhawm hna a thawk peih tawh silova, mahni denomination buaiin an buai tawh si a, Mizo buaiin an buai peih tawh silova.

Chutiang bawkin politics-ah chuan politician-ho chuan mahni tan a nih phawt chuan engemawah khan remchanna zawngin, 'chumi hnam chu kan ni, kan chipuite in ni,' tih ang tein kan kal ta vak vak si a. Art & Culture erawh chuan sapho ngei pawhin angkhat min tih, kan kristian-na lai lo awm bawk si ah te pawh keini talin kan kenkawh hram hram a tul a ni tiin kan naute ho pawh ka hrilh thin a ni.

Tun tumah pawh khan khiti lama kan unaute Chin leh Sangain? Governor-te pawh khan kan Chapchar kut rawn hman an duh ve em em tih kan hriatin kan Chief Minister hovin lokal ngei rawh se kan ti a, khiti laia Indian Ambassador-te pawhin an remti em em a, mahse anmahni sorkar lamah harsatna an neih avangin min rawn hmanpui thei ta lova pawh kan ti khawp a. Amaherawhchu, rilru lama thui tak inpawhna kan nei hrim hrim kha a lawmawm kan ti a. Chutiang chuan inpawhna tha zawkte pawh kan zawng zel turah ka ngai a ni.

Kar leh maiah Zokhaw tharah Border trade te (boder-te pawh kan ti lo thei rih lova sorkar hrang hrang te kan ni a.) pawh chu kan han hawng dawn a, chungah te pawh chuan inpawhna tha leh zual te pawh beisei ila. Chutiang a nih mek laia inlak hranna politics emaw, heti chin hi in hung ang aw, Tuirial chhak lam khi chu develop ve lo mai ang, Mizoram-ah chhiar lo mai ang tih ang chi hawi zawnga ngaih theih ang, Bangladesh border hung anga hung ve han tih mek zel kha, kei niin ramlai lui a kan ngaih te ramri lui a ngaih ngheh tlat ang zawnga awm te pawh kha a fello kan ti a. Mahse he House zahawm takin resolution, ‘thiat ni leh rawh se’, zuk tih kha kan intiat vek si a, House hmasain a lo passed tawh kha keini a hnunung hian, “thiat ni rawh se”, tih ringawt pawh a nih si loh avang khan ‘a Sakhi dai rawng hel deuh zawng kha Zofate inpumkhatna daltu hi engmah tih ni lo rawh se’ ti zawng tala kan thelh hi a ngai ta niin kan hria a.

House zahawm tak resolution kha ‘hung ni rawh se’ ti a ziakin a awm nghet tlat mai a, kha kha ‘thulh ni leh rawh se’ kan ti phal tawh si lova, chuvangin ‘inpumkhatna daltu engmah tih ni lo rawh se’ ti tawp phawt mai ila, tah chuan khang umzuina zel turah pawh House hmasain hung tur an ti tawh alawm, thuneitu lianin an tih pawhin he House hnunungin inpumkhatna tichhe tur zawng a nih theih avangin an phal lo a lawm tih tur tal te pawh hi zawn ngai tawhin ka hria a. Chutiang chuan kan resolution puluttu pawh hian chutianga rilru thui tak neia a tih inin ka hria a. Chuvang chuan inteit tetna, chi bing politics duh tawh tawh ila. Khawvel hnam tur an inzawng khawm a.

Crimea te meuh pawh Russia kha an lo ni a. Khuti lai Ukraine lamah rin chhuah an lo ni a, anmahni Crimea te Russia nena awmho leh duhte pawhin an kal a. Tin, Berlin bangte pawh a lo chim tawh a. Tin, North Korea leh South Korea te hungna bangte pawh khi eng tik niah emaw chuan a la chim leh mai dawn in a lang a. Chutianga in hungna bang, lo indaidan tum anga hmalakna te pawh kha awm tawh lo se tih a duhawm hlein ka hria a.



Chuvangin, Tiau luite pawh khi kan thinlung hian ramri luiah pawm lo sela, ram lai luiah te hian pawm ve hrim hrim tawh se a thain ka hria a. Chutiang a nih avang chuan heti laiah Zofate inpumkhatna daltu, tichhe theitu ang chi reng reng hi chu engmah hi tih loh ni hram hram teh se tiin resolution kha han phuah chhuah a ni a.

Tin, chumi rual chuan kan opposition lamte khan inpumkhatna lampang a rawn tihte kha chu tuna kan hman mek, kan la hman leh zel tur a ni a. Keimahah pawh phawn ngai a awm a nih chuan khang te kha chu kan pawt phawng zel tur pawh a ni a. Amaherawhchu, YMA-in khawhar in ah thingpui an han sem a, min pek kim vek pawh an duh a, a rualin kan dawng thup thei lo va. A dawng hmasa a awm loh theih loh va, a tlar hnung lam chu a dawng tlaiah pawh kan awm lo thei lo ang deuh tepawh kha a ni ve tho va.

NLUP kan ti emaw, thil dang dang kan han ti emaw, tun hmaa kan hotu hmasa pawhin a fatu hlui tawngkam te pawh a hman lar viau tawh ang te kha awm lo thei lo a nihna lai chin pawh kan inhriatthiampui a tha a. Amaherawhchu, discrimination ang chi, Zofa dik tak si, kan unau, kan thisen zawmpui te rahbeh tum tlatna ang chi emaw, “Anni chu kutdawahh siam ang aw, keini erawh chu ding chhuak ila,” tih ang chi te a awm a nih chuan heng te hi chu tih loh tawp tur, kan Kristianna atang pawha kan tih loh tawp turah ka ngai a.

Chuvangin, Zofate inpumkhat tura kan beih mekna a la kal chho a, a la kal zel a, a la kal zel dawn a. Chutih lai chuan party tin ten kan ngaihtuah pawhin, “Hei hi daltu a ni thei dawn em? Hei hi thil tha lo zawk ah, negative approach a ni em?” tih te erawh chu thliar thiam hram hrama kan kal a tha hlein ka hria a. Chutiang chuan Pu Deputy Speaker, he resolution hi ka support a ni tih ka rawn sawi ve a ni e. Ka lawm e.

**DEPUTY SPEAKER** : I hun i hmang pel daih a, ka lo ngaithla tui lutuk a, ka rawn khap lo che a ni. Le, tunge han sawi leh ang le? Aw, Pu Lalrinmawia Ralte.

**Pu LALRINMAWIA RALTE, MINISTER :** Pu Deputy Speaker, hun min pe a, ka lawm e. Kan resolution, East Tuipui bialtu MLA zahawm tak Pu T. Sangkunga'n "Zofate inpumkhatna daltu chu engmah tih ni lo rawh se" tih hi ka thlawp thu sawina hun tha tak ka nei hi ka lawm a. Nichinah khan a move pah khan kan Mizo history ngaihnaawm tak a rawn sawi a. Ka rilrua lo lang a awm ve a, keini khawthlang lama kan lal ropui ve Saithaha Palian lal, lal Suktlaa, hei hi British-in an khawih hmasak ber, an run hmasak ber a ni a, kum 1844-ah an run a ni. Lal Suktlaa hi a sual leh a fel thu khawi dangah mah hmuh tur a awm hran lo va. Amaherawhchu, British hovin an record-a chiang taka kan hmuh theihah chuan April 16, 1844-ah Syhlet District, British awp ram chhungah, Manipuri hnam awmna khua a run a, lu 22 a la a, sal 6 a man haw an ti a. Chutih lai British policy-ah chuan, "Hei hi hrem lohvin a chhuak tur a ni lo" an ti a, an rum viau a ni. Capt. Blackwood-a command-na hnuaiah Syhlet Light Infantry Company pali (4) lai an rawn tir lut ta a. Tichuan, Lal Suktlaa hi an man ta a ni. Hei hi kan chhiar dan common deuh a ni a. Dam chhung lung in tang turin an hruai thla ta tih hriat a ni.

Mahse, a karah hian thil pakhat awm a awm a, chu chu vawiina kan resolution kan sawi lai pawh hian ka rilrua lo awm chu, ziaka a lan danin Paitu an ti a, Pautu a nih ka ring a. A hming erawh chu a vai hming angreng viau a. Engpawh nise, Lamir Singh an ti a. Hei hi Lal Suktlaa laichin hnaite a ni. He Pautu lal hi British ho khan hmanruaah an hmang ta tlat mai a. Tichuan, tawng lettuah leh guide-ah kha Pautu Lal Lamir Singh-a kha hruaiin Lal Suktlaa hnenah hian an inhruaitir a, tawngte a let a. "Engpawh nise, kan hnenah lo chhuk thla la, ngaihdamte i dil a, i in-surrender a nih phawt chuan kan ngaidam ang che," tiin a khua atanga bum chhuakin Lal Suktlaa hi British-ho hian tenawm takin dam chhung lung in tang turin an hruai thla ta a ni.

Amaherawhchu, Mizo lal tam ber, kha tih lai khan eng lal pawh nise, Thangluah Lal pawh ni se, Zadeng lal pawh ni se, Sailo lal pawh ni se, Ralte lal pawh nise, anmahni lalna tlang theuhvah an hmelma thuhmun lakah an intelkhawm tlat avangin hetiang a Lal Suktlaa an hrem hian British laka Mizote tanrualna chhete mahin a tichhe lo va. An tanrual chhoh tlat avangin rin aia rei

British-ho hian min bei ta a ni. 1844 atanga min awp chiah, 1890 inkarah hian kum 46 zet a tla a ni.

Khatih lai khan hnam mawl kan ni a, engmah ralthuam tha pawh kan nei lo. Amaherawhchu, kan inpumkhatna leh mahni lalna tlang theuhva an lungualna avangin Mizote kha an tlo viau a ni. Nichinah a move-tu member zahawm takin a sawi ang khan kan history-ah hian heng hi kan chhiar thleng thin lo va. 1864-a TH Lewin-a'n Rothangpuia khua leh tui run tura a thawh chhoh thu te, 1823-ah daih Arakan area-a Zo hnahtlakte British-in an run thute kan chhiar thleng thin lo va. Chumi ka sawi duhna chhan chu, mover zahawm takin a sawi ang khan, "Kan Mizo history hrim hrim pawh hi rewrite a ngai, ziaak that a ngai," tih hi mi tam takin an sawi thin a ni. Tripura lama Rivung lal ropui tak takte thiltih te, hnam dang laka an zuk chet lenzia te kan history-ah hian chhiar tur a awm mang lo.

Tin, Chittagong Hill Tracks lampang leh Mizoram chhimthlang lama Thangluah lalho chanchin te, tin, sawtah chhim lamah Lai ram leh Mara rama kan lal ropui tak takte chanchin te hi kan history-ah hian kan hmu tel lo, a tlangpui thu in. Heng atang hian inpumkhatna tur hian "Tih loh ni rawh se," tih hrim hrim ai mah hian tih tur pawh hi kan la ngah hian a hriat a, Pu Deputy Speaker, chu chu ka'n sawi lang duh hrim hrim a ni.

India ram history ziahtute chuan Kumpinu sawrkar India rama a chak em em nachhan kha an chhut thin. Thil lungchhiatthlak deuh chu 1857 Sepoy Mutiny-ah pawh British-ho hian India mite hneh nan chuan India mi bawk, India hausakna hmanga chawm, India sipai an hmang tih a ni, a dik chiah a ni. Khang lai khan Punjab-a Sikh-ho te, India rama Maharaja lian zawng zawng deuhthaw hi an lamtangah an pawt bet tlat a. India hnam kha tangrual thei lovin an ek phel darh zo va. Ngaih dan inang lovin, duhdan inang lovin an siam a. Chuvang chuan British ho kan hneh dan chu tha rum tel lovin, non-violence in a hnu kum 90-ah, indopui 2-na hnu ah, kum 2-naah India zalenna hi kan hmu chauh a ni. Ralthuam kan chelek chu 1897 a ni, 1947 chu ralthuam kan chelek atanga kum 90 a ni, a rei lutuk. Chuvangin tanrual loh leh

inpumkhat loh pawl zia chu India hi khawvela experience nei tha ber te zing ami a ni. Tin, keini Mizo Zo hnahtlakte pawh hian hei hi tunah hian dik taka sawi duh chuan kan tawng ta mekin a hriat a ni.

Pu Deputy Speaker, High School kan kal lai te, College kan kal ve lai chanchin lam sawi tur ni lovin, chung hun lai atang tawh a thian zahova kan sawi thin leh tun thleng pawha ka vei awm ve chu, Zo hnahtlak tu pawhin an chibil tawng, an hnam tawng kan zingah an hmang a. He lai a Mizoram laili a British hun atanga sorkar ro inrelnaah development-ah pawh a hmunpuia cheng Lusei tawng hmang ho hian, “Mizo emaw ka ti a, hei chu Pawl a ni a; Mizo emaw ka ti a, Mara a ni maw,” tih ang chi tawngkam hi kan hmang tlat. Nichina mover-in a sawi ang khan hei hi chu kan sim a ngai a. Zofate inpumkhatna daltu chu engmah tih nilo rawh se. “Mizo emaw ka ti a, Paihte a ni reng si a,” tih hi tih tawh loh ni rawh se, tih te hi kan resolution hian a fun telin ka hria. Pu Deputy Speaker, chuvang chuan hei hi lawmawm ka ti.

Zo hnahtlak an ni vek kan tih si chuan, Mara lal chanchin te, an hnam chanchin te. Tin, Christianity a luh dan te, Roginald Lorrain-a luh dan chanchin ngaihnaawm tak te pawh hi, kan school-ah te pawh Kohhran hrang hrangte pawh hian kan hriatpui ve a tha lawm ni? Keimahni chauh, central Mizoram leh Mizoram hmar leh a ram laili history zawng ringawt atanga kan in teh luat tukna atang hian “Khawthlang ho,” tih te, “Hmar thimpui, zangkhaw bungbut hnan,” tih tawngkam te, “Chhimlam, chhimkun,” tih tawngkam te hi a lo chhuak a ni. Heng hi Zofate inpumkhatna daltu a nih avangin tih tawh loh ni rawh se tih hi kan resolution-in a fun telin ka hria a, ka support em em bawka a ni.

Chuvang chuan eng tawng pawh hi hmang ila Mizo tawng vek a ni. Mara tawngte pawh hi a tawng thiamten min lo nuihzat lo ula. Ka ti thin a, han chhui chian hi chuan a inang, a inzul deuh put mai a, ka ti a, “Natlama”, han tih te pawh hi ‘i tha maw?’ Han tih nen hian kal puata ngaihthlak chuan a inang lutuk ringawt. ‘I tha maw?’ ‘I dam maw?’ tihna tho a ni a. Thingpui te

pawh 'thaupi' an ti a, a inang em em mai a. Saw laiah MDC thlan lai khan kan va campaign a, kan candidate pakhat hming chu Beirahmo a ni a, engtihna nge ka ti a? Lalramhmua tihna a ni a, a inang em em mai a. Tikhan engemaw ti tak chuan inzawmna kan nei teuh a. Mara unau te bik tawngte hi a hrang em em a kan hriat lai hian ka phak tawk a ka chhui ka chhui hian a inhnaih riau hian ka hre lehzuat thin a. Ngeiawm deuh ka tih bawk chu "Eng a tih hmang chin," tih tawngkam kan nei tlat te hi a dikin ka hre lo. Hei hi Lusei tawng hmang ho thil tihsual lian tak a ni, "Eng a" a tih ve loh avang ringawt a 'Mizo i nilo' kan tih chuan Mizo hi khawiah nge a awm? A tlem lutuk dawn a ni.

Chuvangin American hovin tunhma a an coin-ah te pawh an lo dah thin, 'tam tak atanga pakhat lo chhuak,' an tih Latin tawnga an coin-ah te pawh an lo ziah, an great seal-ah te pawh an dah ang chi deuh khan Mizo chu a bik sawi tur awm lo, tuna Zo hnahtlak kan tih zawng zawngte lungruala kan inpumkhatna hi a hming chu Mizo a ni tih hi ka hriatthiam dan a nih avangin Pu Deputy Speaker, hei hi hlu ka ti a. Naga hote pawh tu bik nge Naga tih kawh tur an awm miah lo ang chiah hian, he Mizo-na zawk hi pumkhata kan pawm tlan theih chuan tawngah te pawh a hlawm lian ber lusei tawng hmang ho hi Mizo tawng kan siam theih tak takna tur chuan a dang hi kan pawm a ngai zawk. Chuti ni lova nangni chu Mizo in ni lo tih nan a Lushai tawng hmang ho tan khawh nan kan hmang a nih vaih chuan inpumkhatna hi kan hlatin ka hria a.

Thangthar kan fing telh telh ang a, inpumkhat hi a hla telh telh zawk ang tih hi a hlauhawmin ka hria. Chuvang chuan khatiang chi tawngkam te te, thil lian pui pui ni lovin, chu chu entirnan, tuna ramri hung han tih ang chi te, resolution neituin a rawn sawi ang khan, ni e, khawchhak lama kan unaute rilru a tina hle ang. Chitagong Hill Tracks-ah Palian lal hote, Thangluah lal hote, Rivung lal hoten 1800 hmalam daiha khaw ropui tak tak an zuk dinna ram te pawh hung hnan a ni ta mek a tunah hian. Engpawhnise, kan dan zawh loh hi lo thleng pawh ni se, kan tih theih hi awmin a hriat a, heng ang te a lo thleng a nih pawhin, loh theih loha a lo ti te a nih pawhin, ngawi renga kut

kuangkuah a thlir ni lovin. Chutianga kan ti a nih vaih chuan Zofate inpumkhatna daltu, titu zingah kan tel dawn a ni a.

Chuvangin tupawh lo sorkar se, he House-ah hian tupawh lo thu se, kan inpumkhatna daltu ang chi reng reng hi chu pawl khawpa a thlen hi kan rem tih loh hi a dikin ka ring a. Chu chu Pu Deputy Speaker, kan sawi kai duh a ni. ‘I dam em?’ kan ti emaw ‘na dam maw?’ kan ti emaw ‘i dam maw?’ kan ti emaw ‘na tlamma’ kan ti emaw ‘nadam mai’ Ralte ho phei chuan an ti a. Khatiang tawng engang pawhin lo inbia ni ila, kan Mizo hnam ropui tak tawng vek a ni tih ah hian kan chian ngaiin ka hria a. Tawng thu ah hian kan inpumkhatna tichhe zawngin pawl kan khawih nasa riau hian tlanglawn deuh a sawi chuan ka hriat ve tlat avangin, inthlahrung lo deuhin ka’n sawi ve ta bawrh bawrh a ni.

Chuvangin Pu Deputy Speaker, lam hnai te te, mi zawng zawngin kan tihhlawhtlin theih mai niin ka hria a. Hnam hmangaihtu ber ni a inchhal leh hnama chiang bera inchhal chung a, “Mizo emaw ka ti a Paihte a ni reng si a; khalai ami kha, hmanni ami kha Mizo a ni na nge ? “Ni love, a ni kha chu khawchhak Pawl pa a nih kha”, tih mai mai ang chi te.

Tin, khawchhak unau, Chin Hills lam atanga sumdawnge an lo kal a, kan in tualzawlah a pangngaia be ve thei reng siin “kekawlte i zuar em?” lo tih elhsen ang chi te hian kan unau, kan thisen zawmpui, kan laihruoi zawmpui, kan hnampui kan Mizopui thinlung hi a tina thin tih hi kan hriat ngaiin ka hria a. Heng hi chu chhung tinin kan practice thei niin ka hria a. Khatiang kan tih thinna khan kan inpumkhatna hi a tak takah chuan a tichhia a ni.

Chuvang chuan Zofate inpumkhatna daltu reng reng thinlung kan tihnatna ang chi hi chu ramri hung a ni emaw, tawngkau chheh thu ah a ni emaw, engmah hi tih nilo rawh se tih hi tha ka ti a, thinlung takin ka pawm a ni (Deputy Speaker : I hun chu i hmang zo, i pel tawh). Awle Pu Deputy Speaker, ka lawm e

**DEPUTY SPEAKER** : Awle, tunge han sawi ve ang le?  
Pu Ngurdingliana.

**Dr. NGURDINGLIANA** : Pu Deputy Speaker, ka bula member zahawm takin a rawn hrut ang kha chuan ka hrut thiam ve dawn miah lova, common deuh keima experience atangin rawn sawi mai ka tum a.

A hmasa in vawiina resolution tha tak mai sawiho theia ka tel ve pawh hi lawmawm ka ti a, chuvangin ka thlawp thuin hma ka rawn hruai ni sela. Tuna kan member zahawm takin a sawi laiah khan ka'n cheng duh bik a, Tet te atangin phaiah te lehkha zirin kan awm a, kan mindset hi thlak a ngaiin ka hria a. A bik takin Mizoram atanga College a ni emaw, University a kal emaw, heng fresher social kan han neih te hian North East atang hian kum 1-ah vawi 1 te kan lo nei ta a. Kan thian pakhat Mizoram atanga ka kalpui (kan pahnih chauhin Mizoram atangin kan kal a) chuan Manipur-a Zo hnahtlak hnam hrang hrangte kha anmahni tawng khan an inbe mai a, Kukiin Kuki, Gangtein Gangte tawngin. Khatiangah khan ka thianpa Mizoram atanga ka kalpui kha a thin a rim ta thut mai a. "Mizo in ni lawm ni, Mizo tawngin tawng rawh u" a ti a. Khap hman loh khan an insual chu a ni der mai a. A mindset kha a dik tlat lo. Chutiang chuan Mizo inkhawmnaah te pawh an inthlahrun phah a. Anmahniin College Campus-ah emaw, University Campus-ah emaw Inkhawm/Fellowship te pawh an neih phah hial a ni. Chuvangin nakin zelah kan tu kan fate pawh khawi khawiah emaw an kal ang, Mizo kan ni tih hi Chiang sela ka duh a ni.

Vawikhat experience ka neih pakhat chu, ho te mah ni se kan sawi ang a. hotuten 1993 inthlan khan JDU nen niin ka hre ta, ka sawi sual loh chuan, Congress kha kan thawkho a. Brig. Thenphunga Sailo kha, vawiinah member a ni ta lo a, Aizawl North II-ah a ding a, a election agent-ah min hmang a, kan thawhho avang khan, chuan DC atanga form a lo ziahah khan Ngurdingliana Sailo tih kha a lo ziak a. An inah ka kal a "Ka pu Sailo ka ni hleinem, Paihte alawm ka nih" ka ti a.

“Ngurdingliana Paihte tih ai chuan Sailo kha a mawi zawk hrim hrim” a ti fiamthu a. Ka han kal leh ngat a ka han ziah that tir leh a. Kha, ho te in engemaw mi sentiment va hurt te pawh kha a awl em em a. “Sailo chu a chanve chu ka nia, mahse a pumpuhlum chu ka ni lo” ka zu ti ve leh ngat a. “A tha alawm, i lungawina a nih chuan” a ti a. Khatiang khan hmun dang dangah engemaw kan tawngkam, kan kam chhuak hian mi rilru a lo tinain a lo khawih thei tih hi keini member-te chuan kan hriat sa mah ni se ka’n sawi lang duh a.

Tin, zau zawka han thlirin hnam kehchhiatna hi chu chi hrang hrang a awm thei a. Political discrimination a ni emaw, economical discrimination emaw a ni thei. Russia, a hun laia super power kan tih pawh a kehchhiatna, a darhna chhan chu kan hre vek, a history. Discrimination engkimah a tam a, religion pawh a ni thei a. Khatiang khan Russia ram ropui tak kha tunah chuan USA nen an inkar a hlat zia chu, defence chungchangah a ni emaw, economy chungchangah a ni emaw, inthlau tak an ni tawh a ni. Chu chuan a kawh chu hnam, ram a heu zawnga a kal a nih chuan a tawpah chuan kan chan tur chu retheihna, tunhma kan ram hausak lai ang kha vawikhat mah kan umpha dawn tawh lo tih hi a chiang a. Vawiinah resolution tha tak member zahawm tak Pu Sangkunga’n a rawn putluh hi, nichina kan ngaihthlak ang khan border fencing piah lamah tawng thu hlaah pawh i huam tir ang u tih ka’n sawi duh a.

Tin border fencing hi a chhan chi hrang hrang a awm thei a, security vanga fencing tih ngai te. Amaherawhchu, hetiang fencing tihna hmun apiangah hian ramin a than tur angin a than loh phah a. Vanneih asiamin Jammu & Kashmir-ah leh Arunachal Pradesh leh China inkarah, khimi border-ah khian ka han kal tawh a. Pakistan rama kan han kal chuan an lo hung vek mai a, a bul zawng zawng kha mine bomb ang hi an dah vek mai a. Kawng pakhat chiah hi a awm a, lei sei deuh mai hi a awm bawk a. Pakistan kan tlawh ve duh avang khan kan va dil tir a, Army-te kha flag keng chung khan an va kal a. Chuti lai area zawng zawng chu engmah thil chinna tur pawh a awm lo, bomb khan a khat vek mai a ni. Chutiang bawkin khitah China-ah,



Arunachal Pradesh nena an inri na karah, fencing thui deuh mai hi a awm a. Chutah pawh chuan kan va kal leh nghe nghe a. Khatiang khan agriculture lamah pawh nasa takin a tuar phah a. Hemi hi security thil vang a ni mai a.

Tin, nichina kan ngaihthlak ang khan animal migration thleng hian a khawih danglam a ni. Chuvangin motion hian zau deuh maiin a rawn huap thei hi a lawmawm ka ti a. Kan han sawi ang khan tumah Mizo bik kan awm lo. Keini pawh hi tawngthu chhe loah kan unau kan thahnem a, kan mo te chu a then Ralte an ni, Chhakchhuak an ni, Sailo an ni, Pawih an ni, kan zavai khan Mizo kan ni mai, tawng dang kan thiam chuang lo. Chuvangin, he motion hi ka sawi uar ve thiam lova, ka thlawp thu Pu Deputy Speaker, ka rawn din pui ve a ni e.

**DEPUTY SPEAKER** : A lawmawm e. Awle, tunah Pu John Rotluangliana.

**Pu JOHN ROTLUANGLIANA, MINISTER** : Pu Deputy Speaker, ka lawm e. Vawiina kan resolution “Zofate inpumkhatna daltu chu engmah tih nilo rawh se” tih awmzia ah hi chuan kan inpumkhatna daltu ti an awm tawh hmel niin ka hria. Tin, hetilai tualchhung te neuh neuh kha chu kan Resolution rawn puluttu hian a tum ni lovin ka hre deuh a. A chhan chu unau pawh kan inngeih hleinem le, tualchhungah chuan le. A hnam leh khatiang neuh neuh ni lo khan, thenawm khawvengte nen pawh kan inngeih lo. Amaherawhchu, heti laia a rawn tum zawk chu Zofa, keimahni ramchhunga awm lote nen pawh hian kan inpumkhatna dal thei hi chu tuman siam ni lo rawh se a tihna zawk niin ka hria.

Chuvang chuan Pu Deputy Speaker, nichina ka hmaa thusawituten an han sawina ah khan he Zofate inpumkhatna dal tur awm zawng hian sawrkar hmasaah khan resolution alo awm tih an sawi khan, he resolution hi putluh a ngai leh ta a nih hi tih zawk kha a ni. Hetilaia India ram chhunga awmte tan chuan engmah khati laiah khan sawi leh tih tur a awmin ka hre lo. Keimahni tualchhungah pawh sawi tur a awmin ka hre lo. Tin, hetilai Manipur lama awm

te, Halflong tlangdunga awm te nena kan inkarah engmah sawi tur a awmin ka hre lo. A pawimawh zawk lai chu kan lo chhuahna lam, khawchhak lam atanga kan u leh naute lo kal ve theihna tur daidang zawnga he House zahawm taka resolution kan lo pass mai kha a paw em a. Hei hi chu i keng tlang zel ang u tihna lai zawk kha niin ka hria.

Khawchhak lampang khi kan original-na zawk a ni a, kan lo chhuahna ram zawk a ni a. Kei pawh hman deuh khan Tahan thleng ka han kal a. Khiti lam hrim hrim han kal khian lung a leng ve ringawt mai a ni. Khiti laiah kan pi leh puten an lo tih “Rih lipui khi thlafam leng kaina” an ti a. Kan thlarau pawh khiti lamah khian kal tlatin kan ngai. Run lui kan han hmu te chu a engamah hma khan kan lung a leng ve ringawt. Silchar tlangdung ai chuan lung chu a tileng a ni. Kan chhuahna lam a ni. Chuvangin, khiti lama kan Mizo unaute khi heti lam ai chuan an lo la Mizo zawk daih mai ka ti nghe nghe. Mikhual chhawn chungchangah te an fel em em a, ei leh in, riabuk thlengin Mizo takin tlawmngaihna nen min thleng a. Chuvang chuan khiti laia kan Mizo unaute nen zalen taka kan inkalpawh theihna thin kha ‘border fencing tih ni rawh se,’ tih kan lo pass kha a ni heti lai ami hian a rawn tum zawk chu ni. Hel kual hel kual pawh a ngaiin ka hre lo kei chu.

Zofate inpumkhatna tura daltu awma hma an lo la kha a paw em a ni tih kha sawi tlang law law ila thain ka hria. Zep tur pawh a awm lo. Resolution hial an lo pass alawm. A sum leh pai lo kal tur tih chungchang chu nichinah khan kan member zahawm takin a sawi tawh. Khati lam piah lamah khan, keini kan lo chhuahna ram lama kan unaute nena han inkalpawh thei lo tura hmalakna a awm erawh hi chu a paw tih zawk lai kha a ni. Chuvang chuan, tunhnu ah hi chuan heng hi tih tawh loh ni sela.

Vawiinah Burma sorkarte pawh khian democracy lam hawiin hma an la ve mek a. Kumin 2015 tawp lam hi an inthlan an nei dawn. Full democracy an neihna hi keini Zoram ami te pawh hian kan nghakhlel a nih hi. Tahan tlangah te pawh kan han kal a, keimahni Mizo dik tak vek kha a ni. Burma mi kan tih ang te kha hmuh tur an awm lo reng reng. Chuvang chuan khiti lama kan

unaute nen khian zalen taka kan inkalpawh a, zalen taka kan awm hi ram dang, sorkar dang ni mah ila, politics avanga animahila, kan thinlung hian, kan Mizo-naah hian border a nei lo a ni tih kan hriat a pawimawh. Engmah kan thinlung hian indaidanna a nei lo reng reng. Run lui mai mai khian min then hrang lo, kan thinlung a in zawm tlat a, thlah thuhmun kan ni. Chuvang chuan, khiti lam atanga lo chhuak kan nihna ang khian, khiti lama kan unaute nen khian zalen takin Zofate hi kan inpumkhat a pawimawhna lai zawk hi a ni Pu Deputy Speaker, ka sawi duh lai chu.

History lampang te kan sawi dawn a nih chuan sawi tur tam tak a awm ang. Hmanlai, lal lal lai tih piahlahmah pawh khan a awm ang. Amaherawhchu, tuna ka sawi duh lai tak zawk chu Mizo Mizo na lai, kan thinlung inzawmna lai tak daidang thei zawng hi chuan tan kan lak loh a, hma kan lak loh hi a pawimawh a. Kan hma lo lak tawh sa pawh kha vawinah hian nawhreh theih ni lo mahsela i chhunzawm lo ang u.

Sorkar Danah chuan km 16 chauh permission lak ngailo a inkalpawh thei a ni. Amaherawhchu, sorkar Dan piahlahmah hian thinlung in hriatthiamna atangin km 100 tel pawh kan inkalpawh thei alawm. Nupui pasal inneih pawlh kan ni, tihdan phung engkim inang kan ni. Chuvang chuan, hetilai resolution-in a tum zawk ni a ka hriat chu Pu Deputy Speaker, Zofate kan lo inpumkhat nan, khawvel ram dangah awm mahsela Zofate kan ni kan in tih tlatna tur, kan inpawh tlatna tur dan pin a lo awm tur hi kan ngaih pawimawh lai tur chu a ni.

Tin, a bik takin, kan Mizo unaute, Burma rama awm te khi khawvel ram dangah pawh hian keini ai hian Mizo nun hi an la keng nung zawk zel a. Hman kumah khan Melbourne-ah ka zuk kal ve a, Australia ramah, chuta min lo welcome a, Mizo ho, Mizo society a lo awm te chu khiti lama kan unaute vek kha an ni a. An president phei chu Zokhawthar ami a lo ni a, chaw eiah te min sawm a, Mizo 75 lai a lu nungin kan awm ve an lo ti a. Bul lo tan a, engkim, society te, biak in a inkhawm te, Kristian-na lo kengkawhtu te pawh chu khiti lama kan unaute vek kha an lo ni. Chuvang chuan, anni nena kan inthlunhran theihna tur zawnga hma lo lak awm hi a paw

ka ti a. Chuvang chuan, vawiina kan resolution in a rawn tum tak, Zofate inpumkhatna daltu chu engmah tih ni lo rawh se a tih hi a fuhin ka hria. ‘Engmah tih ni lo rawh se’ he resolution hi Pu Deputy Speaker, ka rawn thlawp a.

Fimkhur a ngai a, hetilai kan member pui ten an sawi tual chung eng eng emaw te kha chu thuhra ni rawh se. Khawvel ram danga kan unau te nen pawh hian, Bangladesh ram a ni emaw, Burma ram a ni emaw, kan thinlung hian border nei lo sela, i insuihkhawm tlat ang u tih kha ka rawn sawi ve duh a ni, ka lawm e.

**DEPUTY SPEAKER** : Hun in hmang thiam khawp mai. Aw, Pu Lalruatkima.

**Pu LALRUATKIMA** : Pu Deputy Speaker, ka lawm e. Vawiinah private member resolution, member zahawm tak Pu T. Sangkunga resolution “Zofate inpumkhatna daltu chu engmah tih nilo rawh se” tih sawiho hun a ni a. Sawihona hrang hrang te han ngaihtlak in a bengvarthlak khawp mai a, a lawmawm pawh ka ti a. Chutihlai erawh chuan a thu hi a ulh hret em aw ka ti a, sawifuh pawh a har deuh chu kan ti tlang niin a lang a. A thu ‘inpumkhatna’ han tih pawh kha ziak zawm awm tak kha a in zawm lo a. Inpumkhat kan ngaih zia ti lang tu te pawh ni nghe nghe se a tha in ka ring. Mizo tawng, word khat ni si kha ‘inpumkhatna’ tih ang deuh a chhiar tur a ni awm e.

He resolution hi ka rilruah a awm fova, kan member zahawm tak hian min lo thehluh khalh a. Kan sawi ho kan sawi ho tawh thil a ni a, keini aiin a bengvar zawk nite pawh in a lang a. A thu a ulh deuh tih lovah chuan Zofate inpumkhatna zawnga hmalak hi chu tute pawh in kan duh leh kan lunglenna lam, kan ngaihtuahna kan suangtuah ram a ni tlang vek tih hi chu kan han sawihona atang khan a lang thei in ka hria a ni.

Tin, chumi piah lamah chuan kan hriat angin chhinlung chhuak Zofate hi India ramah te, Burma-ah te, Bangladesh-ah te thendarh kan nih avangin kan awm darh a. India ramah pheï chuan state hrang hrangah a bik takin Jampui (Tripura) lamah te, Halflong, (Assam) lamah te, Meghalaya-ah te leh Manipur-ah te kan awm darh a. Burma lam leh Bangladesh bika awm te hi international boundary in min daidang mahsela kan cultural boundary erawh hi chuan min daidang lo a ni tih chu a hmutute leh a hretu vek te kan ni awm e. Chuvangin ka ngaihtuahna a awm fo chu ‘ram chuan ri a nei a, amaherawhchu, hnam erawh chuan ri a nei lo’ tih hi Zofa zawng zawng te hian kan hriat a thain ka hria a. Kan hun kal tawhah te tihfuh te, tihfuh tawk loh te pawh mimal ang te, sorkar ang te pawhin kan nei ang. Kan Zohnahthlakte rilru tihnat chang te pawh kan nei fo ni te pawhin a lang a. Mimal, pawl leh sorkar ang te pawhin. Vawiinah erawh hi chuan inpumkhatna lam hawi zawnga keimahni hian ngaihtuahna thar, rilru thar kan put hi global village a awm tawh te tan hi chuan a tul khawp in ka hria.

Chutah chuan political boundary chu chuti maia tihdanglam theih a ni lo a, amaherawhchu, thinlung lam inzawmna tal kha chu engtiklai pawhin kan vawn nun reng a tul a ni. Kan hriat angin 1800 tawp lamah khan sap ho in ziak dan pawh awm mumal lovin min awp bet a, kum 70 chhung zet mai min awpbet a nih kha. A hnu ah kan duhthlanna ni lovin 1947-ah min kalsan a, India sorkar hnuaiyah tun thleng hian kan la awm a ni. Chumi hnuah chuan Lushai Hills tih te, Mizo District Council tih te leh Mizoram, chutiang chuan kan lo awm chho ta a ni a. British in min awp lai khan divide and rule hmangin a then Burma lam ah, a then Bangladesh lam ah te, a then India lam ah te, chutiang chuan unau te pawh min thendarh a nih hi. Chuvang chuan sorkar pathum hnuaiyah thendarh ni mah ila, Pathianin min pek ram hi luah ho thei lo mah ila, engtikniah emaw chuan rorelna pakhat hnuaiyah awm hi kan hmalthir a ni tlang vek a ni.

Chuvang chuan, kan suangtuah ram, kan beisei ram hi engtingge a lo thlen ang tih tuman kan sawi thei lo. India Constitution hnuaiyah awm kan ni, India ram chhungah nge, chutiang chuan rorelna pakhat hnuaiyah nge tuman kan

hre lo. Amaherawhchu, chhinlung chhuak Zofa zawng zawng te hi unau kan ni tih in hrerengin, in suiikhawm leh zai i rel ang u ti a Capt. L.Z. Zailo in hla hmanga a lo aupui tawh kha hre reng in, kan thinlungah hian, Zofate thinlungah hian vawiin thleng hian a mit lova ni. Chuvang chuan sap ho khan Chin Lushai Conference, Kolkotta-a an buatsaihah te pawh khan, ‘heng mite hi unau, thlah khat, chhulkhat chhuak an lo ni reng mai, chuvang chuan kan lo then darh hi kan lo ti dik lo a ni’, te pawh an ti a nih kha. Chumi hnuah Mizo Union Party khan ni 22.4.1947-ah Mizo hnahtlak hnam hrang hrang 47 list te pawh siamin memorandum te pawh an lo thehltut a, chutiang chuan 1965-ah MNF te pawhin Mizo hnahtlak te inpumkhatna turin memorandum te pawh siamin hma la in an lo buatsaih a ni.

Tin, ZORO kan ti a, chutiang chuan ZORO te pawhin 1995-ah UNO-ah te lehkhah thehlutin vawiinah khawvel in awpna lo danglam ta zelah hian UNO chuan ni 13.9.2007 khan “UN Declaration on the Rights of Indigenous People” tiin tual khat chhuak hnamte anmahni puala rorelna pakhat hnuai an awm theihna turin zalenna dar a lo vaw ta a ni. Chutiang chuan kan hmabakah hian engtin emaw he hnam hi ala awm dawn. Chumi hunah chuan lungualna zion a Zofate kan len theihna turin vawiinah hian politic thil ah hamthatna zawngin kan in sawichhia a ni maithei, mahse engtik niah emaw chuan Pathianin Zofate hi min la hruai khawm ka ring tlat a ni. Chutih lai chuan Zofate hi khawvelah hian nuaih 60/70 vel zet mai kan awm a. Kan luah chin ringawt pawh hi nuaih 1456000 sq km zet mai a ni.

Khitah Chin Hills atangin Kabo Valley atangin khutah Sakhon Chitagong Hill track thlengin kan luah chin ram a ni, Hmar lamah Loktak dil thlengin, chutiang chuan Zofaten kan luah a ni. Chutah chuan kan thinlung lam a inbuatsaih si loh chuan khang thil zawng zawng kha political boundary kha lo danglam palh ta se engtinge kan awm ang tih hi vawiina kan ram hruaitute hian ngaihtuahna kan hmana, mipui kan lo zirtir hi a hunin ka hria a ni.

Vawiinah hian kan nomenclature-a Mizo emaw Zomi kan ti emaw, Zo emaw ah hian i buai lovang u. Politic avangin harsatna te tawk thin mah

ila, chutiingin ram pathum ah then darh ni mah ila, thinlunga kan inpumkhat a, ramin ri nei mahse hnamin ri a neih loh avangin Zofate hian insuihxawm lehna turin ngaihtuahna tak tak kan hman hi a tulin ka hria a. Kan resolution kan han ngaihtuah a, inpumkhatna daltu nilova, theihtawp chhuaha, keimah mimalah, kan chhungkua ah, kan pawl ah chutiang chuan ngaihtuahna thar kan hman a tulin ka hria.

Kan resolution neitu khan a sawi a, a lunglenthlak khawp mai, kum 1999-ah Gangte Youth Association te YMA-ah an chhunglut a. Chutih rual chuan kan unau Gangte Students Association-te MZP-ah. Khatih lai khan kan resolution neitu hi Central YMA President a ni a, kei MZP-ah President ka ni bawk a. ‘Mizo kan ni kan hmel a tha, kan tum a sang bawk si’, tiin, insuihxawm lehna zai rel in hla kan sa mup mup a, a ropui a ni. A hnu lawkah Darlawng unau te nen Young Darlawng Association te YMA-ah inchhun finin, inpumkhat na turin theihtawp chhuahin pawl hrang hrang ten ke kan pen a ni.

Chutiang chuan kan kohhran te pawhin Manipur lama kohhran hrang hrang te nen thawkho in Zo hnahtlak hrang hrang te nen theihtawp chhuahin tan an la a, kan inzawmkhawm mek a ni. Chuvangin Zo hnahtlak hnam hrang hrang te hi engtik niah emaw chuan rorel na pakhat hnuaiyah chuan kan la awm dawn tih hi a chiang em em a ni tih a hretute kan ni. Chuvang chuan political party hrang hrangah te, pawl hrang hrangah te kan awm ang, keini pawh MNF party-ah kan ni. MNF party chuan Zofate rorelna pakhat hnuaiyah awm tura hmalak te, tin, inpumkhat tura theihtawp chhuaha tan lak zel hi kan thupui leh kan thil tum a ni.

Chutiang chuan kan duhtusam angin vawiinah kan kal lo mai thei, zawi zawiin mite thinlungah a lut zel a, eng party-ah pawh kan awm a ni mai thei. Zofate kan nih chuan Mizo hnam anga kan dinchhuah na tur te hi kan ngaihtuah tlang vek a ni. Chuvang chuan nichinah khan kan sawi taawh a, ‘Indo Myanmar border fencing tih ni ve rawh se’ tih thiahna tur a ni kan ti. Khatih laia boruak kha kan ngaihtuah lo mai thei. Khatih laia boruakah khan Central YMA a kan awm ve lai a ni a, ruihhlo tawlhluhna, crime chi hrang

hrang kha khilam atangin kan unaute nilo atang pawhin tam tak a rawn lut a ni. India sorkar-ah Ministry of Home Affairs in Indo-Pakistan te, Indo-Bangla border fencing a ti mek a, a hmachhawp chu Indo-Myanmar a ni. Chutah chuan kan hriat angin ni 20.11.2012 khan Secretary, Border Management, Ministry of Home Affairs ho in Aizawl-ah pawh Myanmar border hung dan tur te an rel a nih kha.

Amaherawhchu, vawiin thlengin a tak chu a la awm lo, a ramri kan hriat danah pawh khan Burma nena kan inrina kha 404 km ni a kan hriat laiin an ni proposal-ah vethung chuan alo ni hauh lo mai, 173 km chauh a ni. Amaherawhchu, vawiin kan thu leh hla avang hian an ti lo ang, an ti lo turah pawh ka ngai a ni. Chuvang chuan kan unau te nena kan inpawhna hi khawiah pawh ni se kan unaute nen inpumkhatna thil tha tam tak kan duh laiin tha lo tam tak a rawn thlen ve hian kan inpumkhatna pawh hi min dal thei a ni. Chutih lai chuan keimahni pawhin kan en dan alo danglam thin avangin inzir tur tam tak kan ngaihthlak tawh ang khan a awm a ni. Chuvang chuan kan tawngkam ah te, kan nunphung ah te fimkhur ila, Capt. L.Z. Sailo ten an hmu hman tawh lo, an hmu phak tawh lo. Amaherawhchu, an chi tuh rah kha Zofate thinlungah hian vawiinah chuan a nung reng a ni. He hnam hi a la ding chhuak ang, political boundary in he hnam hi min thendarh mahse kan culture te kan thinlung lam kan inpawhna erawh chu min then darh thei lo.

Vawiin thlengin Chapchar Kut-ah te pawh kan unau thenkhat te pawh an rawn tel thin. Chutiang chuan festival chi hrang hrang Zofest kan tih ah te u leh nau hlim takin kan han inhmu khawm a, a then Bangladesh atang te, a then Burma lam atang te, chutiang chuan khawvel hmun hrang hrang atangin Zofate kan in hmu khawm zel a ni. Thangthar khawvel-ah tunlaih Mizo Nationalism hi nasa takin a awm a ni. India ramah ngei pawh kan hria a, kan hnam hi lo ding chhuak ve se, he khawvelah hian he hnam hi hnam anga min recognize ve na tur in kan ti, chutiang chu kan duhthusam vek a ni.



Chuvang chuan keini pawh hi kan tanrual lohva, keimahni leh keimahni kan in seh a, kan intih kan intih chuan kan House Leader zahawm takin a sawi fo, chhak lamah sakhaw lian takin min hual a, thlang lamah sakhaw lian takin, chutiang chuan sakhaw lian tak tak te, hnam lianpui pui ten min hual velna karah hian he hnam hi kan dinchhuahna turin Pathianin hun tha min pe ang, danglam em em mai chu Mizo hnahthlak ho zawng zawng te hi Kristian vek kan ni te hi kan danglam em em na chu a ni. Pathianin min hung bik a, chuvang chuan Pathianin he hnam hi a hre reng a ni. (kan ti tawp dawn hnai ang e, Pu Deputy Speaker,) Chuvangin Ministry of Home Affairs pawhin ni 19.1.2015 khan protected area chungchangah 16 km zalen taka kan in kal pawh theih thin kha rawn ti thar leh in, kumin Dt 31<sup>st</sup> Dec, 2015 thleng atan a rawn pawt sei leh a ni. Chutiang chuan kan unau te nen khian in pawh taka, Burma lam a ni emaw, Manipur lam an ni emaw, Jampui tlangdung an ni emaw, Halflong – Shillong thlengin kan inhmuh khawmna tur, Zo-Fest ni mai lo Zofate inhmuhkhawmna lian, Mizo Convention emaw, Zofa Convention pawh ni rawh se, chutiang tepawh chu kan sawrkar hian kan ngaihtuah a, inlungualna zion tlanga kan len theihna turin, he hnam anga kan dinchhuah theihna turin, theihtawp chhuaha tan kan lak a tul a. Chuvangin kan resolution pawh hi keini tih awm tak zawk a ni a, min lo tih khalh ta miau mai si a, chuvangin a thu hi ulh deuh hret mahse tha ka tih thu kha ka rawn sawi ve a ni e. Ka lawm e.

**DEPUTY SPEAKER** : Awle, phar te kha in la awm a, kan hun neih dan hi han en ula, dar 4:00 pm-ah kan ban a ngai a, tunah hian dar 3:15 pm a ri tep a. Opposition group leader hi ala din duh hmel bawk si a, chutah hrilhfiah ngaite a awm hmel a, concern department, Home Department Minister la sawm leh a ngai bawk a. Tichuan, House Leader-in sawi duh a neih chuan, chungte chu loh theih loh a tih ngai a la ni a, a move tute tih a ngai bawk a. Pu Lalrobiaka a phar, Pu Josepha'n a rawn ti bawk a, Pu Ngunlianchungan, pathumin an phar a, khami zawng khan sawi ula dar 4:00 pm chu kan hawlh rawk mai dawn a. Insumtheihna thlarau in nei thei em? In insum thei mai em? Pu Ngunlianchungan tawi te, Aw, House-in kan remtih chuan dar 4:00 pm pawh kan pel thei tho a. awle, Pu Ngunlianchungan.

**Pu C. NGUNLIANCHUNGA, MINISTER** : Pu Deputy Speaker, thusawina hun min pek avangin ka lawm e. Hei vawiinah hian Pu T. Sangkunga MLA zahawm tak resolution, 'Zofate inpumkhatna daltu chu engmah tih nilo rawh se,' tih hi a ropui ka ti a. Vawiinah hemi sawi ve theia he House zahawm taka bial mipuite duhsakna leh Pathian khawngaihna changa ka awm hi ka lawm takzet a ni. Pu Deputy Speaker, sawitu tam tak an awm tawh a, la sawi duh pawh an awm a, helai inpumkhatna chungchang thu ah hian sawi duh tam tak ka nei ve a.

Chumi hma chuan, nimin piaha helai House-a zawhna kan chhanna chungchang kha social media velah thil a darh nasa hle a, tlema han sawifiah hmasak lawk ka duh a. Khawngaih takin Pu Deputy Speaker, i phalnain, vawk note chungchangah khan

\* Speech not corrected.

**DEPUTY SPEAKER** : Tuna a sawitur chu Resolution a ni a, mahse khami lama hun a hman duh chuan a resolution sawina hun kha a hek ve thung dawn a ni.

**Pu C. NGUNLIANCHUNGA, MINISTER** : Pu Speaker, duh duh sawi kha a ni a, khalai kha tlem han sawi fiah thain ka hria a, kan thupuia kan luh hmian thuhmahruaiah ka'n sawi ang e.

Pakhatnaah chuan AH & Vety Department-in ram dang atanga vawk chi kan lakluhna tur chungchanga a manah khan mi tam takin kan hrethiam lo niin ka hria a, kha kha ram dang atanga vawk lakluh kan tum ber a chu, vawk chi tha kan ramah a vulh ve theih a ni, chumi vulhna atan chuan kan ti a.

Pahnihnaah chuan zawhna supplementary-ah te pawh a awm a, vawk hi zawrh leh tur a ni lo a, a chi thlahtu tur atana lakluh kan tum a ni. He programme hi 2012-2013 atanga hmalak tan a ni tawh a, memorandum pawh kha dt. 12<sup>th</sup> October, 2012-ah Law & Judicial Department hnuaiiah sign a ni

a. A ziakin a question neitu kha kan la chhang dawn tho a, mahse mipuiahan sawifiah hrim hrim a tha ka ti a, Pu Deputy Speaker. Agreement kha kum khat a nung a ni. Amaherawhchu, health protocol leh thil dang dang buaipui mek reng a nih avangin kum khat chhung ni mah sela, inhriat thiamnain ala nung a. Tin, kha pawisa kha engemaw avanga remchang ta lo a nih chuan, refund/withdraw leh theih a ni. Kha pawisa ₹ 50 lakhs kha, kan sawi tawh ang khan, accounts stamp charter bank, GN, bordaroi Rd, Ambri-ah dt. 28<sup>th</sup> 2014-ah deposit a ni a, he pawisa dah hian pung a neilo a ni. Interest a awm lo, khalai kha ka'n sawi fiah duh a. Tin, dt. 10<sup>th</sup> February, 2015 khan Government of India atang pawhin hmanna chhanna a kan sawi tawh ang khan, UK first secretary, British High Command office-a Mr Antony Copper-a chuan health protocol kan hmuh theihna tur hian theihtawpin hma min lakpui a ni.

Tin, vawk chi tha chi hi kum 1999-ah khan sawrkar hmasa khan a lo lalut tawh a, chutah chuan vawk note 120 an lo lalut a, 1999-ah khan ₹ 65,000/- in an lo lalut tawh a ni. Vawk note 120, kum 16 liamta ah khan ₹ 65,000/- in a lo lalut tawh a, tunah chuan mawngping kan la lut dawn lo a, vawkte mawng pan deuh kha a ni mai a, khalai kha chu. Tichuan khalai khan pawisa thlengna hi ₹ 65,000/- a lakluh leh tuna ₹ 98,000/- chu a hlawk fe zawk a ni, a man a ₹ 40 a ni. Tunah chuan ₹ 60 chuang alo ni tawh a, khatih hun lai aiin a tlawm fe zawk a ni. Khata kan hmanna tur a kha UK atanga Boeing, thlawhna thlawh man te, embankment charge, quarantine a thlakhat chhung a awmna tur te, feed, a chaw man, thla khat chhung a chaw man tur te, labour cost, thla khat chhung labour-in a lo enkawlina man tur te leh custom leh excise duty tur te leh a lo thlenna, Delhi-ah nge a thlen dawn a Mumbai-ah a Chiang chiah rih lo a. Chumi atanga Aizawl thlenga rawn phurhna tur, truck-a an rawn phurh luhna tur a ni. Ruahmanna hi a puitlin hun chuan Selesih-ah vawk chi sawngbawlina bun a ni a, hemi hi kan tipuitling thei a nih chuan North East state hrang hrangah hian inpumkhatna lehzual, vawk kah raina zirna hmunpui a ni dawn a. Hei hian Mizoram mai pawh nilo, North East thleng pawhin a nghawr dawn a ni.

Tuna kan vawk lakluh mek te hi AH & Vety Department-in ramdang atanga a chi tha lakluh zel a ni a. Kan sawi tak ang khan 1999-ah te leh hmalam deuh ah te pawh lakluh tawh thin a ni a, khami avanga kan vawk, zo vawk kan tih, 'Tuikuk bik', ti a thenkhatte pawhin an sawi thin ang, Tuikuk bik ta phe chu a ni lo ang a. Kan Zo-vawk, indigenous pig breed kan tih kha tunah phe chuan a awm tawh meuh lo a ni. A bo kan hlauh avangin AH & Vety Department hian Lunglei-ah khuan a hranpa liau liauin khang ang kha a bo loh nan kan ti a, kan la vulh hram hram a, (Deputy Speaker : A sei mah mah tawh a) a zo tep. Chuvangchuan Pu Deputy Speaker, helaia thil kan ruahman hi kan hre fuh tawk lo deuhin a lang a.

Vawiinah thuhma ka sawi duhna chhan chu vawk vulha eizawngtuten vawk chi tha an lo nei ang a, Selesih atangin kha vawk kan lakluh kha a chi kan la ang a, vawk pakhat atangin cheng tamtak, vawk tam tak kan kap rai thei dawn a ni. Hei kan hriat theuh angin vawk vulha eizawng kan ni a, vawk pawl tir manah vawk pakhat a no pakhat zel hlauh a ngai a, khami hunah khan chuan, tunah pawh hian kan kalpui mek reng tho a, vawk kan kah raiah hian pakhat kah raiah ₹ 400 kan la. Tunah hian VFA sawrkar hna la hmulo train chhuak tawh si te pawh khang ang vawk kah raiah khan kan chhawr mek a ni. Tichuan vawk pakhat khan cheng tam tak man chi a thlah anga, Zoramah hian vawk chi thain min luah leh dawn a ni tih kha thu hmaah ka sawi duh a ni.

Pu Deputy Speaker, thil pakhat nichina Art & Culture Minister-in Lai lal a tih Dosata a tih kha Hausata tih tur a ni a. Lungtian lal a ni a, Hausata Chinzah lal, pakhat kha Dokulha a ni a, Dokulha te phe chu Andaman-ah a huaisen avanga tang lo haw tawh lo kha a ni nghe nghe a ni.

Vawiinah he resolution hi kawng chi hrang hrangin kan ngaithla a, ka thenawm pa, ka constituency thenawm Saiha lam khan GP Fund te, thil dang dang kha a sawi a, a leng vek tho baw k a, chuvang chuan, vawk note chungchang pawh kha a len avangin thuhmaah ka'n sawi mai a ni. Ramchhungah leh rampawnah Zofate kan inpumkhatna tura dal thei tur engmah

awm suh se tih hi a ropui ka ti takzet a. Sorkar hmasa lam khan lo ngaihtuah famkim sela chuan Bangladesh nena kan inkar border fencing te hi lo tih lek loh tur a ni. Kan unaute tam tak Bangladesh-ah khuan an awm a. Chinzah te, helai Mzorama hnam chi hrang hrang Hlawngching te, Khawhling te, Ralte te, Khiangte kan tih te, chutiang chuan Sailo te pawh Bangladesh-ah khuan khu kan constituency-ah phei chuan inthenawm deuh mai kan nih avang khuan an tam em em a ni.

Hmanni deuh lawk pawh khan Lawngtlai-ah Lai International Leader Meet an ti a. Chutah chuan Bangladesh atangin Kohhran hruaitute pawh an rawn tel, chungah pawh kan unaute an ni a, tawng khat hmangin kan inbe thei a ni. Kan unaute nen kan inkarah hung hnan an han ni hi a pawh takzetin ka hria a. Tin, a kal lehzal turah kan hotu, kan member zahawm tak takten an sawi a, khawchhak lam te pawh hung tura he House zahawm takah hian pass alo ni tawh a. Kha kha a thiah theih loh a nih pawhin hung loh hram ni sela. A bikin keini chhim lamah sawn kan Lai area-ah phei chuan Pang khua a awm a, luiral kan kai chiah a,

\* Speech not corrected.

**DEPUTY SPEAKER** : Minute 10 i hmang tawh a, tihtawp tum tawh la.

**Pu C. NGUNLIANCHUNGA** : Pu Deputy Speaker, Thau khua te, Bungtlang te, Siallam te a awm a. Chulaiah chuan keimahni unaute vek an awm a. Khi nen khian han inhung ta ila, kan inkar a chhe hle ang, kan inngai hlein ka ring.

Tin, 2013-ah khan Pathian leh kan hotute duhsaknain Indianapolis-ah CYO General Conference-ah khuallianah min sawm a, ka zuk telpui ve a. Chutah chuan, Chin ang khan an inpumkhat vek a, chu conference-ah chuan Mara pa in Lai tawngin paper-a present a ni. Chutiang chuan, US-a awm ho te, Maryland-ah te kan kal a, engkim Chin hote leh helai atanga kan Mizo unau awmhote nen pawh inkawmna te kan nei a, inpumkhatna tha tak kan nei a. He

Zoram hi an Jerusalem a ni. Chutiang a nih lai chuan hun kal tawh ah te Burma mi hnawhchhuah tur tih te, chutiang chuan nangni chuti khati, nichina ka hmaa kan minister zahawm takin a sawi ang khan, eng a ? ti thei lo chu kan han enhran ang chi te kha awm tawhlo sela.

Tin, nikum lamah khan, sorkar hmasa lamah khan Mizo means and a Lushai tribe tih te pawh kha he House-ah hian kan Home minister zahawm tak putluhin amend turin he House hian a lo pass tawhin ka hria. Khangte pawh kha chak lehzuala tihpuitlinna turin he sorkar hian hma la sela, chuan he Zoram chhunga chengte leh ram pawna cheng kan unau thisen khat, chhulkhat kual ho hi inpumkhatna tha tak kan neih chhoh zel theihna tur atan he House zahawm takah hian he resolution hi karawn support a ni e, ka lawm e.

\* Speech not corrected.

**DEPUTY SPEAKER** : A lawmawm e. Pu Joseph Lalhlimpui'n sawi ve leh sela.

**Pu JOSEPH LALHIMPUIA** : Pu Deputy Speaker, ka lawm e. Insumtheihna nei deuh i zawn kha chuan ka lo insum deuh mai a, amaherawhchu hei hun min pe leh a, a lawmawm khawp mai.

Kan resolution 'Inpumkhatna daltu chu engmah tih nilo rawh se' tih hi Pu Deputy Speaker, ka support a ni tih tawitea rawn tarlan ka duh a. Hei a lunglenthlak khawpin ka hria a. Naupang te lehzual zirlai kan nih lai atanga kan rilrua kan vei Mizoram rorelna sangberah resolution pass tura hetiang putluh an ni ta hi a lawmawm in ka hria a. M.A. kan zir ve lai khan Mizoram University kan la neih loh avangin 'All Mizo Post Graduate Students' Union kan ti a, post graduate zirlai zawnzawng Mizo te inhlawmkhawm na ah khan General Secretary mawhphurhna te kan chang ve a. Chumi hma chuan vawiina kan member zahawm tak kan group leader Pu Vanlalzawma hi MP a nih lai a ni a. Mizo hnam inpumkhatna chungchangah ah hian vawi engemaw zat Shillong-ah seminar te kan lo nei ho a ni. Chutiang in lehkhabu te kan lo

siam thin a, vawiinah helai hmuna kan han sawiho leh thei te pawh hi a lawmawm hle in ka hria a ni.

Hun reilo te ram roelna ah kan awm chhungin ka experience tlemte ka sawi duh a, Pu Deputy Speaker. Kum 2010-ah khan Tripura-ah Gospel Centenary lawmna ah minrawn sawm ve nawlh mai a, ka zuk tel a. A bik takin Zampui tlangdung Mizo te an ni a, Tripura rama Chanchintha thlen kum 100-na kan lawm a ni. Chutah chuan, kan Kohhran hruaitute leh khawtlang hruaitute nen kan inkawm a. An thil sawi vawiina ka rilrua awm reng leh nichina kan member thenkhat ten ‘kan putluh tur niawm zawk tak in pulut a’, an tih kha kan putluh tur a nih zia a taka ka hmuh tawite ka sawi duh a. Zampui tlangdunga Mizo hruaitute leh kan Kohhran hruaitute nena kan inkawmna a an sawi chu hei hi a ni. Sorkar term hmasa hun hmasa zawkah khan khulai Zampui tlangdungah Mizo ten harsatna tam tak an tawka, chung an harsatna te chu khatih laia sorkara kan rama kan hotupa ber Chief Minister hnenah an han thlen a.

Khatih laia kan Chief Minister chuan ‘mi rama awm te chu a hrehawm dawn tehluh nen, Mizoram chhungah hian lo pem chho vek mai rawh u’, a ti a, an rilru a nat thu an sawi a. Chumi hnuah chuan vawiina ka House Leader zahawm tak Pu Lal Thanhawla Chief Minister a rawn ni ve leh a. Zampui tlangdung a zuk tlawh a, an harsatna an sawi a, ‘khuti lai rallehlama khua te khu kan pi leh pu te huna kum za tam kan lo awm tawhna a ni a. Amaherawhchu, helai buaina, hnam leh hnam inkara intihbuaina avangin tunah chuan kan chhuahsan a lo tul ta a’, an ti a. Kan House Leader zahawm takin a awmna hmun atangin IR battalion duty tur a tirh tur thu leh Mizo hnamte, Mizoram pawnah pawh a ven tur thu a sawiina an thlamuanpui zia an sawi a. Chuvangin, Pu Deputy Speaker, vawiinah hian hnam inpumkhatna atana hetiang resolution ropui tak hi a pulut tu party dik takin kan pulut niin ka hria a, chulai chu ka experience tawite ka han sawi ve duh a ni.

Tin, pakhatih chuan Nagaland-ah, thingtlang khaw hmasawna inpumkhatna zir turin kan hotuten min tir a. Chumi tum chuan road show an

neihna ah kan tel ve a. Chu road show-ah chuan Naga hnam peng hrang hrang Naga ram pawn ami, state thenawm ami te, ram pawn ami te, Bangladesh leh Myanmar ami te, lam mi engemaw zat an lokal a ni. Nichinah khan kan Art & Culture Minister zahawm takin Chapchar kut-ah te pawh Myanmar lama kan Mizo hnahthlak unau engemaw zat lo kal an chak a, sorkar pawhin hma a la a, mahse a remchan loh thu te pawh a sawi a. Ka rilru ngaihtuahna ah chuan heng kan tih leh hunah pawh hian a sorkar zawng chiah lo pawh hian hmalakna awm sela, a nawlpui deuh a thalai rual, lam rual te, zaithiam te, engemaw zat te pawh hi kan inpalai tawn thei ang tih ka ring a. Tin, kan House Leader, kan Chief Minister hmalakna in kum 2010-ah khan Lunglei High Power Committee kaltlangin an nei a, thalai lamthiam leh zaithiam engemaw zat Tahan-ah sorkar in a tir tawh bawk a ni. Chuvangin, vawiinah hian a puluttu tur, hnam inpumkhatna puluttu tur party dik takin he resolution hi kan pulut niin ka hria a, ka'n han tarlang a ni.

Mizo-te hi hnam feeling aia veng feeling, hnam bil feeling leh kohhran feeling te, party feeling te kan la na em aw tih ka ngaihtuah fo thin a. Hei hi Pu Deputy Speaker, kan rama rorelna sang berah ram mipui in eng rilru puin nge kan aiawha roreltu ten thu an sawi, an chai tih an sawi lai hian ka rilruah a lian em a chu chu ka sawi duh a ni. Hnam anga kan rilru kan inpumkhatna leh kan tantlanna aiin a veng bil ang te, a chi bil ang te emaw, chutiangin, a kohhran mal ang te leh party mal ang te a feeling hi kan nei lian mah mahin ka hria a. Hei hi hetiang zawng ai chuan a Mizo hnam pumpuia tan kan lak hi a pawimawhin ka hria a. Chuvang chuan, sawi tur tam tak a awm ang a, ka sawi lovang a.

Tripura-ah Mizo thlangtla hmasate lal ropui tak tak an awm a. Reng lal ropui takte pawhin Raja nihna hial an pek te an awm a. Chutiang chuan Mara area piah lamah te pawh Chinzah lal ropui tak tak an awm a. Amaherawhchu, nichina kan hotuten an sawi tawh ang khan India in independence a hmuh dawnah Geological Survey of India hotuten ram chin, state chin bithliah tura an tih ah Mizo hnahthlak kan Mizo lal engemaw zat te chu Tripura state-ah rin luhte an ni a. Tin, Chinzah lal khaw engemaw zat te



chu Burma ramah te rinte an ni a. Chutiang chuan, political-ah inthliarna leh indaidanna tam tak kan nei a. Amaherawhchu, tunah chuan kan rilru, taksa leh kan ngaihtuahna te a la dang lova, kan hotute khawchhak tlang dunga kal chuan Myanmar khaw engemaw zat atangin hruaitu leh mipui engemaw zat te an lo kal zel a ni. Chutiang chu kan rilru a nih avangin, vawiinah hian a veng bil te emaw, a hnam bil te maw rilru put ai chuan Mizo anga rilru kan put len zel hi a pawimawhin ka hria a. Chulai chu ka han tarlang ve leh duh a.

Tin, Pu Deputy Speaker, tum khat chu lehkhabu tlangzarhna-ah min sawm a. Vawiinah pawh khan a ziak chungchang te, a tawng chungchang te kan sawi a. Ka phak ang tawkin Mizo tawng hman fimkhur a tul zia ka sawi ve a. Kan thangthar leh zual ten Mizo tawng kan thiam tawh loh zia te ka sawi a. A hnua kan senior pastor lo ding chuan Mizo tawng hi a la tawp lova, 'is being build a ni, a insiam mek a ni. Chuvangin Mizo tawng dik tak hi fix sen a ni lo,' a ti a. Ka ngaihtuahna a kal thui viau mai a. Vawiina kan sawi tak ang khan Lusei tawng hman lo zawng zawng te hi hmun thenkhatah chuan Mizo ni lova ngaihna te kan nei a, khatiang rilru kha pu tawh lo ila. Kan awmna ram azir in chhim leh hmar ringawt te pawh hi tawng inanglo tam tak kan nei a ni. Bazar a ka kal te pawh hian ka sawi thin a, chawhmeh lam dan inanglo te hi kan ngah em em a ni, chumi avanga Mizo lo kan ni chuang lo a ni. Mizo tawng te pawh hi an siam mek a ni tih te kha kan upa ten an sawi dan a ni a. Ka rilruah a lian hle a, chungte pawh chu ka han sawi duh a ni.

Nichinah khan zirna chungchang te pawh an han sawi a. Zirilaia Mizo tawng siamtu leh endiktu te pawh hi hmunkhat ami mai ni lo, Mizoram chhungah pawh kan hotuten hmun hrang hrang ami kan lawrkhawm a ngai a ni an ti a. Chutiang Board te pawh chu tunah hian kan hotuten an siamtha mek a ni. Helaia tih dan ringawt kha Mizo tawng dika kan pawm a nih chuan chhak, thlang, chhim leh hmar lam ami te tan harsatna a awm thei a. Chuvang chuan Mizo tawng kan zir tur pawh hi fimkhur takin, zau tak si a kan ngaihtuah a ngai tih kan hotuten an hriat avangin, vawiinah inpumkhatna chungchang kan sawiho na ah chungte pawh chu sawi a rem a, ka han sawi a ni. Pu Deputy Speaker, hun tam tak ka la lovang a, inpumkhatna daltu chu

engmah tih loh ni rawh se tih hi vawiinah hian ka support hle a ni tih ka han tarlang a ni. Ka lawm e.

**DEPUTY SPEAKER** : Hun i hmang dik chiah chiah e.  
Pu Robiaka i lo ko ang.

**Pu LALROBIAKA,** : Pu Deputy Speaker, ka lawm e, vawiinah hun tha tak kan nei tlang a. Kan sawina atang khan harh tharna kan chang ta ni hial te in ka'n hre deuh a, a lawmawm ka ti hle a ni. Sawi tur tam tak ka nei nachungin, ka sawitur tam tak ka hma ami ten an swi tawh a, hun te a tam tawh lova, ka sawi tam lovang a.

Kan hriat ang khan member zahawm tak Pu T. Sangkunga'n resolution tha tak mai a rawn putluhna chhan hi thil tha lo lo awm tawh vang a ni tih hi hai rual a ni lova. Chutih rual chuan kan opposition member te pawhin hai lovin, an mahni ta ni awm taka rawn sawi te pawh an han awm hi vawiinah hian lawmawm ka ti viau a ni. Harhtharna chikhat chu kan chang tawh hrim hrimin ka hria. Chuvang chuan an chungah pawh lawmthu ka'n sawi duh a ni. House lo awm tawh 2007-ah khan kan hnam tan pawl kan lo sawi tawh a. Chu chu engtin emaw tala kan tihthar dan tur ngaihtuahin kan member zahawm tak Pu T. Sangkunga hian a rawn chhawpchuak ta a ni a. A lawmawm hle a ni tih kha ka'n sawi duh a.

Tin, term hmasa lamah khan language avanga harsatna kan tawh te leh hmun hrang hranga kan awm avanga kan tawng kauchheh inanglo te avanga hnam kan nihna angah te in unauna kan tlakchham tak zia te uar takin ka lo sawi tawh a. Vawiinah hetiang hun tha tak mai kan han nei a.

Tin, opposition lam atang pawha ruling ni awm taka, ruling rilru put hmangte pua harhtharna an rawn chang leh zel pawh hi a lawmawm ka ti tak zet a ni tih ka'n sawi duh a. Chutih rual chuan, vawiin chu kan ha tial angreng khawp mai a. Hetiang kan sawi dawn vang hi nge ni. Chutih ruala ka rilrua lo awm ve mai mai chu Aizawl a chanchinbu lar tak in a rawn chhuah

thin “ha tial ber ber te hi ram hmangaih ber ber te an ni kher lo”, tih kha ka rilruah a lo awm a. Engpawhnise, ram hmangaihna te, heng zawng zawng hi thinlunga awm a ni. A tialna lam emaw, kan ram awmna hmun a dan emaw vang a ni lo. Sap thufing chuan ‘blood is thicker than water’ a ti a. A Mizo tawng chuan tui mai mai ai chuan thisen chu a tak zawk a ni an tihna ni tur a ni. Chutiang chu a ni a, vawiinah hian Burma-ah awm kan ni emaw, Bangladesh-a awm kan ni emaw, Tripura-a awm kan ni emaw, kan nihna, kan identity, Mizo kan nihna hi khawvel awm chhungin a awm dawn a ni tih hi kan hriat a tha. Chutih rual erawh chuan ka’n sawi duh chu Pu Deputy Speaker, vawiinah helaiah a Jerusalem nghaktute hian kan hriat loh tam tak an sawi tawh zingah khan, kan unaute thlavang kan hauhna ah te kan tang tawk lovin ka hre thin a.

Amaherawhchu, vanneihthlak takin ka hmaa sawitu in a sawi tak ang khan kan Leader, kan Chief Minister zahawm tak hian nasa takin thlavang a lo hauh sak thin a. Khawchhak-ah a ni emaw, Tripura-ah a ni emaw, Manipur-ah a ni emaw ‘ka mi leh sa, ka Mizo puite in khawih emaw, in tina emaw a nih chuan a tawp thlengin ka tang dawn a ni’ a han tih te khan a tithlamuang em em a ni. Tripura-ah hian 2010 khan Tlangsang khuaah Mizo khawmpuiah amah ngei zuiin ka kal ve a, zuitu nih a nuam hle a ni. A tlangpui thu in Mizo khulaia awm te khu politics ang chuan communist an ni a. Mahse, ‘keini chu communist kan ni, mahse Mizoram-a Congress sorkar khi kan support a ni’ an ti tawp mai a ni. Chutiang khawp chuan ngaihndan an nei a. Chutih laia ka rilrua awm chu kan mi leh sa te hi na zawkin an thlavang kan hauh tur a ni. Burma ami pawh Mizo a ni tho, Australia ami pawh Mizo a ni tho. Chuvang chuan, Mizo kan nihna angin Mizo blood a nih avang khan an thlavang kan hauh thiam tur a ni. Chu chu vawiinah hian kan rilru ah awm thar sela ka’n duh a.

Chutih rual chuan kan hnam pui tam tak vawiinah hian kan hnam a inchhiar ta lo, Mizo a inchhiar ta lo hi tam tak kan chan tawh a ni. Tunlaia North East Ambassador an puan thar Manipur nula Mary Kom pawh hi Mizo thlah chikhat a ni an ti a ni. Tin, Tripura te pawh tunhma a lar em em tlang

mi hruaitu thin B.K. Hrangkhawl, B.K. hi Bijoy Kumar Hrangkhawl a ni a, a Mizo-na lai a tlem tawh hle a ni. Chuvang chuan a Jerusalem, Aizawl-a awm te hian tih tur tam tak kan nei a ni. Chuvang chuan heti zawng hian ngaihtuahna nei ila. Unau chhul khat kual kan ni a, kan zavai mai hian Tripura ami, Manipur ami, Burma ami chhiat tawh emaw, harsatna an tawh pawhin Mizo an ni tlat. Chuvang chuan, kha zawk kha a pawimawh lai a ni tih hi ka rilruah a awm a. Chungte chu ka'n sawi duh a ni a.

Tin, kan hriat angin sum ngainatna avanga hnam te pawh hralh duhte hi awm theih a ni. Vawiinah hian chung zawng zawngah chuan a bik takin helaia awm te kan fiah tlangin ka hria a. Hemi hmang hian Mizo mipui te, kan zavaia inthurual zawka tan la turin ka'n chah duh che u a ni.

Tichuan, a tawp berah chuan Zofa-te inpumkhatna daltu chu engmah tih ni lo rawh se. Kan inpumkhatna daltu, Mizo te tan a thil thalo hi engtin mah tih ni lo sela. Kan zavai hian inthurualin, nasa zawkin hmalthir neiin i kal ang u tih ka rawn sawi rualin he resolution hi ka rawn support a ni e. Ka lawm e.

**Pu VANLALZAWMA** : Pu Deputy Speaker, ka lawm e. A hmasa in vawiina kan kawr tial hak chhan hi kan sawi lawk ang a. Kan member pakhatin, 'kan resolution sawi tur hi Mizo thil a ni e, a theih chuan i ha hram ang u,' a ti a, thuawih deuhin ka'n rawn ha a. Pu Thana hian a nei ve lova, kan thianpa hian, 'ka pe ang che' a ti a, a ken sak a, ti hian an nei ve zui ta a ni a, Mizo thil sawi na a nih dawn avangin tih kha a ni ringawt a. Tin, keima mimal tak pawh hian hak nuam hi ka ti ve deuh reng reng a. Kum 1999 tawp lama mipuite leh Pathian duhsaknaa MP ka nih dawn pawh khan oath taking-ah khan ka zuk ha deuh kher tawh a. A chhan chu keini hi kan hmel te kha a Mizo loh deuh na lai te pawh kha a awm deuh mai thei a, chuvang chuan khang te pawh kha a tulna lai te pawh a awm ve thin a. Chumai chu a ni tih kha ka'n sawifiah duh a.

Vawiinah resolution tha zet mai Pu T. Sangkunga'n an ti chho hi a lawmawm hle in ka hria a. "Zofate inpumkhatna daltu chu engmah tih nilo rawh se" an ti a. He resolution ka'n hmuhtirh phata ka rilrua lo awm chu 'Pu T. Sangkunga kherin engati nge a putluh aw' ka ti a. A ruling lama kan hotute hian ngaihtuahna thui tak neiin an tih tir a ni ang e tih ngaihtuahna a awm a. Chu pawh chu nise a lawmawm tho va. A chhan chu kan hre vek a zep thu a awm lova, hei YMA ah te kan inzui nasa a. Mizo II han tih angah te Pu T. Sangkunga hmingte alo lang tel a. Chutih laiin hmanni lawkah Saikhumphai kangah te pawh campaign lai te pawh khan a lut ngam chiah lo deuh ni te pawh khan ka'n hre deuh a. Engpawhnise chung zawng zawngte kan thawidam tel thei a nih chuan a tha tho ka ti a, he thil hi a lawmawm hle in ka hria a.

Nichina kan ngaihtlak tawh ang khan he thilah hian sawi tur tam tak a awm thei a. Chutih mek lai chuan kan sawi uar em em political unification han ti ta ila, politics-a inpumkhatna a tha em em a. Chutih rual chuan point dang deuh hlek cultural unification te pawh a rawn lang tel a. Tin, vawiina ka rilrua lo awmah chuan tawng lama kan inpumkhatna, language unification kan han tih ang chi te; tin, kohhran/sakhuana lama inpumkhatna kan han tih te, tin, economic unification kan han tih ang chi European Union te an han ti a, 'Common currency hmang ang u,' an ti a, Europe ho in inpumkhatna tha deuh an lo neih te kha ngaihtuahna ah chuan an lo awm a.

Vawiina ka lawm em em na pakhat ka'n sawi hmasak duh chu tawng lama kan inpumkhatna hi kan thawhchhuah dan, a lo vir luh dan hi Pathian remruat pawh niin ka hria a. Heng Korean film te leh film dang dang Mizo tawng nalh zet maia tuten emaw an lo let te hi tawng lama min phuarkhawm tu tha em em mai a ni tih hi kan hre tlangin ka ring a. Manipur lamah te leh khitah Tiau ral lamah te kan film lehlin tha tak tak hi an en nasa em em a. Chu chuan tawngkhat hmangin min lo hlawmkhawm chho mek a. Tunhma deuhin hun kal thui tawh deuh ah Chanchin Tha dak hmangin tawng lamah kan lo in hlawmkhawm tha em em tawh a. Tun hnaiah khawvel thil taka ngaih theih a nih rual in heng film tha tam tam ti mai ila mawi em em a an lo

letling te hi tawng lama min sui khawm tu leh min phuarkhawm tu tha deuh a ni tih vawinah hian sawi lan ka'n duh a.

Chutih mek lai chuan political unification kha kan vei tlang hle a, a tha khawp mai a. Tin ka'n sawi ve duh chu hetia hmun thuma kan chhuah nachhan hi, a then hian min awp hmasa tu British ho dem deuh ngawng ngawng ang zawng hian sawi a awm thin a. Amaherawhchu, history kan han en chuan a ni chiah in a lang lo a. British ho khan administrative convenience atan, inrelbawl na awlsamna tur atan min lo then darh hi ni berin a lang a. Hnam kawlhse an ni ti a rin hran ai mah khan in awpna atana remchanna awm avangin min rin hrang a, chu chu independence te kan lo neih chhoh khan, kha kha a lo kal ta zel a, tuna kan ramri hi a lo piang ta ni mai in a lang a. Chuvang chuan a titu hmasa lam te kha dem em em lutuk hleih theih pawh ni in ka hre lo a. Chuvangin khati chung chung hetia intih khawm na tura rilru kan han pu hi a tha khawp mai a.

Tin, political unification tur hian ralthuam leh tharum thawhna lam hman chi ah pawh kei ka ngai lova. Amaherawhchu, Manipur-ah, te Tripura-ah te leh khumi Delhi-a Janakpuri lama Burma lam refugee awmkhawmna lama ka kal ve tuma ka sawi ve fo thin chu 1988 te khan USSR kan tih te a keh ang tih hi tuman an sawi thei lo. Mahse 1989 kum tawp lamah leh 1990 kum a rawn nih chhoh chuan USSR kan tih khu a darh huk mai a ni. Chutih lai chuan hnam hrang in hlawmkhawm nachang hria kha chuan independent an puang sung sung a independent an ni mai a, ram tam tak a lo piang chhuak a.

Amaherawhchu, khatih lai khan Chechnya kan tih ho khan a nachang an hre ve lova, Russia anga an in hlawmkhawm leh tawh hnu ah an bei leh tak tak a, kan hre vek, thisen engzatnge a luan, tun thleng pawh a a beidawn thlak zia khu kan hmu a. Khatiang deuh hlek khan India ram hi eng thleng nge a awm pumhlum dawn kan sawi thei lo reng reng. Eng pawh nisela, kum 20 a ni emaw, kum 30 a ni emaw, 50 a ni emaw, 100 emaw a ni thei. Chumi hunah lo keh darh palh ta ang sela Mizo hnahtlak ho in hlawmkhawm tur ang zawng hian rilru lam inpawhna, cultural unity kan tih ang chi te, tawng

lama inpumkhatna lo neih ruk hi a tha a ni tih te hi Churachandpur-ah te leh Tripura lamah te ka sawi ve thin a. Chung chu kei ka ngaihtuah dan tak tak hi a ni a. Khami tura tharum hmanga beih tur pawh a ni lo, mahse khatiang khan India pawh hi a awm palh thei tho a ni. Chumi hunah chuan Mizo hnahtlak ho hi, ‘ti chin hi aw,’ ti a in hlawmkhawm hlak thei tura kan lo inpumkhat hi a tul hle a ni tih sawina hun remchang he House zahawm takah ka neih avangin Pu Deputy Speaker, ka lawm tak zet a.

Tin, kei ka tih ve thin danah chuan Churachandpur-ah te pawh ‘Aizawl in lo zin ang a, in tawng a awn hret ang a, tuten emaw hei chu Mizo emaw ka ti a an lo tih pawhin huatthu ah la vak teh suh u, khatia lo titu kha Manipur-ah vawikhat mah a lo la kal lo a ni tih hre nghal ula, Aizawl a la pel thui lo a ni tih hria ula, thinrim zawngin ngaihtuah suh u. Aizawl-ah khuan thil hi kan ngaihtuah thui vak lo a nia,’ tiin ka hnem ve thin a. Chutih mek lai chuan Delhi tlangah khuan Mizo te pawh kan ni tho, ‘Mizoram atanga lokal ka ni ti ila, Mizoram chu khawiah nge? Nepal-ah em ni,’ tih hi kan tawng kumkhu dawn. Tam takin hre mahse a hrela hi kan tawng kumkhua ang. Thinrima lak khan kan hah thlawn mai mai. Chutiang deuh hlek chuan kan Zohnahtlak unau te pawh ‘Aizawl-a in lokal a, an lo ti deuh hu hu a nih pawhin hei chu a la zin tlem deuh a nih hi ti ula thinrim reng reng suh u,’ kan inti ve thin a. Chuti zawng deuha in zirtir te pawh chu a tul tho in ka hria a. A chhan chu Aizawl-ah hian thil hi kan ngaihtuah thui lo ang reng a, tawng a lo awn hret a nih chuan kan melh hu a, kan hawi deuh ho mai a. Tawngkaa kan ti lo a ni pawhin kan body language-ah khan mak kan ti tih hi a hriat nghal a ni. Chu chu Saiha lam leh Lawngtlai lam unau te pawhin in tawng tho in ka ring. Chuvang chuan thinrimah i la lo ang u tiin vawiinah te pawh in zirtir zel hi a ngai khawp in ka hria a.

Tin cultural unity chung chang kha chu kan nei tha khawp in ka hria a ka sawi thui vak lovang a.

Tin, thil pakhat economic unity kan tih te pawh kha nichin khan arawn sawi vak a, a dik riauna lai kha a awm a. Sum leh pai dinhmun a lo

in thlah lutuk hi chuan inpumkhat hi a lo harsa em em a, kan in an tlan them them lai hian kan lo inpumkhat thei a ni . Chutih lai chuan veng te pawh kan lo inpumkhat theihna em em chu kan society-ah hian thil te hi kan intawm hnem a. Vai ramah hi chuan an society-ah hian thil an lo intawm tlem em em mai a. Keini ang vengah te hi chuan thlanmual kan intawm a, hall kan intawm a, kohhran kan lo intawm hian min lo inti pumkhat em em mai a, a tha ka ti a. Chutih mek lai chuan tun ni 2/3 lek chhunga thil thleng pakhat ka rilru khawih deuh mai han sawi lan pawh tula ka hriat chu nichinah kan sawi lang zeuh zeuh tawh a. Sakhuana lama kan inpumkhatna, kohhran feeling hi kan la na si a. Chutih mek lai chuan a ngaihtuaktu te rilru kha ka hrethiam em em a, kan kohhran rawngbawltu pawimawh deuh mai pakhat MPSC member-a han tihluh te kha rilru tha tak ngaihtuahna atanga lo kal ni a ka hriat lain a leh lamah chuan tun ni 2/3 vel a social media vel a lo lang han en hian inpumkhat lam aiin inpumkhatlohna lam a thleng thei em aw tih ngaihtuahna a kal a. A chhan chu kohhran kan la na hlawm bawk si a. Entirnan Mosolman te pawh an lo ni ve tho va, Irag leh Iran indo vakna chhan kha chu Mosolman theuh theuh Shia leh Suni ho innawr mai mai kha a ni a.

Tin, tuna bomb puak vak vak te pawh hi Mosolman theuh theuh si a ki hrang deuh innawr te pawh kha a ni a. Heng hi kan ramah pawh thil hlauhawm awm thei te pawh a ni a. Heta kan chhehvel amite huikhawm a, helai a centre-ah hian khang vel boruak avang te khan in unau lohna te pawh kha a chhuak palh thei ang em tih ngaihtuahna te pawh kha a awm thei a ni.

MPSC member kan ruata kha a fel em em ang a, a tha em em ang a, fair takin a thawk thei ang tih pawh ka ring tho va. Amaherawhchu, chutih lai chuan a denomination te deuh tan hian interview nikhua te hian engemaw hi a awm thei ang em ? Tin, tunah phei chuan khawlai ti ti han ngaihtuah phei chuan ama awmna denomination-ah pawh hian ngaihtuahna hi a phir deuh niin a lang a. Heng te te te pawh hi uluk deuha ngaihtuah a va ngai em tih hi vawiinah hun remchang a awm bawk a, kan sawi chhuak duh tlat a. A chhan chu a lairil ti mai ila, Aizawl khawpui hi kan pawimawh si a. Zo hnathlak zawng zawngte Jerusalem-ah kan inchhal a, chumi inchhal zel thei tur



chuan keimahni kan inpumkhat hi a tul hlein a tha hle si a, chungte chu vawiinah tam tak sawi tawh hnuah sawilan loh thenkhat leh ka rilru kap deuh kan sawi lang ve ni sela, Pu Deputy Speaker, hun tha tak min pek avangin ka lawm e.

**DEPUTY SPEAKER** : Awle, a lawmawm khawp mai, kan sawihona duhtawh dawn tawh ila, hei dar 4 kan pel lo thei dawn lova, engtinng e House ngaihdan lak ka duh a, kan chawl zawk anga kan lut leh dawn nge a zawh thlenga kal tlang mai? Aw, kal tlang mai ang u aw.

Awle, tunah chuan kan resolution chungchanga hriat tur pawimawh te a awm thei a, chuvangin a concern Minister Home Minister zahawm tak Pu R. Lalzirliana lo sawm ila.

**Pu R. LALZIRLIANA, MINISTER** : Pu Deputy Speaker, hun min pek avangin ka lawm a. Hei member zahawm tak Pu T. Sangkunga resolution “Zofate inpumkhatna daltu chu engmah tih nilo rawh se” tih hi resolution tha tak niin ka hria a. Engtinng e hetiang tih nachang te an rawn hriat tih te ka ngaihtuah a, a lawmawm khawpin ka hria a. Inpumkhatna hi a pawimawh a, ram leh hnam tan thil pawimawh berte zing ami niin ka hria a.

Keini Mizo, Mizorama awm Mizo hnahthlakte phehi hi chu inpumkhat lo tham pawh kan ni lova. Mi nuaisawm chuang awrh chauh kan ni a. Chuvangin kan ram kan hnam ding chhuak tur chuan inpumkhatna a pawimawh a. Political party-ah pawh inpumkhatna tel lo chuan an nghet thei lova, an keh reng a. Tin kohhran-ah pawh chutiang tho chu a ni a. Society-ah pawh inpumkhatna, tanhona tel lo chuan a chak theih loh. Pawl ho zawng zawngah hian tanhona, inpumkhatna hi a pawimawh hle a.

Tin, inpumkhatna hi chakna bul a ni tih kan hria a. Khawte tangrual aiin khaw lianpui tangrual lo hi an hlauhawm lo zawk, an chaklo zawk a ni upa te pawhin an lo tihte pawh hi a taka hretu vek kan niin ka ring. Thingtang pakhat a mal chauha a awm chuan ulhtliah a awl em em a, Pu

Deputy Speaker, an han telkhawm erawh chuan elhtliak zo an awm lo ang hian keini Mizo kan nihnaah pawh hian kan tanrual a pawimawh a. Nichinah kan ngaithla vek tawh a. Hnam tribe, sub-tribe angin chi tam tak kan awm a, khatiang kan tawng leh kan chingkim in an lohna avang mai a Mizo nilo anga inchhuah te hi a hlauhawm em em a. Tuna kan ngaihthlak tak ang khan kan Oposition Group Leader-in helaia a resolution neitu an sawi te pawh kha thutak a nih ngai chuan khatiang te pawh kha a tih tawh loh tur zia, a lo ti tawh a nih pawhin a tih tawh loh tur zia entirna atan hetiang resolution a rawn move leh pawh hi, a lo tih a nih pawhin politics a awm hma pawh a ni ang a. Politics-ah chuan tan ho a pawimawh zia, chu chu chakna a nihzia a rawn hmu thar niah ka'n ngai mai a. A ti a nih pawhin ka'n ti chauh a nia.

Tichuan, Mizote hi tunah Bangladesh-ah te, Myanmar-ah te, India ram state thenkhatah te thendarhin tunhma atangin kan awm a. Hman deuh khan Tripura-ah ka zu kal a, khulaia kan Mizo ten an lo sawi chu, Pu Hawla chuan an thlavang a hauh nasat zia te an lo sawi a. MNF Chief Minister kha Tripura Zampui tlangdungah a lo kal ve a. Kan thlavang hauh tura lo kal tura kan lo beisei lai khan-Ngawi rawh u, tih dan chu ka hria alawm, 'Khilai Zawlnuam velah khian ram awl tam tak a la awm a, khilaiah khian lo pem chho mai rawh u' min ti a, 'kan thinlung hi a na ngawih ngawih a ni' an ti. Chuvangin Zoram chhungah chauh hian Mizo kan nihna ang hi inhriatpui lovin, hmun danga Mizo awm zawng zawngte pawh hi kan manganna leh kan lungngaihna te, kan lawmna te intawmpui tur hian kan inchah nawn leh duh a ni a.

Mizo hnahtlak Mara, Lai, Pawi, Ralte, Hmar, Kuki, Gangte, chi tam tak an ni, sawisen an ni lovang . Chutiang ang te pawh chu kan tawng a hnan avang hian emaw, kan chenna a hnan vangin emaw in en hnan loh a pawimawh hlein ka'n hria a. Juda te hi khawvelah thendarhin an awm a ni tih kan hria a. Hmun tam takah rei tak tak an lo awm tawh a. Pi leh pu hun atang tawhin an lo awm tawh a. Amaherawhchu, Juda an lo nihna ah khan an inpawm vek mai a ni. Chu chu keini pawhin kan tih tur niin ka hria a. 'I rah chin apiang chu i ram a ni zel ang' tih kan hriat fo tawh thin ang hian, kan

rah chin apiangah hian Mizo takin aw, kan tih theih zel hi a pawimawh a. 'Mizo takin aw' tih hi chuan kan rilruah thil chhia lam a ngaihtuah ngai lo. Thui tak kan pi pu te nunmawi, tlawmngaihna, hmangaihna leh miretheite dawmkan tum nun kha, 'Mizo takin aw' tih hi chuan a rawn keng tlang nghal niin ka hria a. Chuta tan chuan a mawhphurtu lian ber chu keini Mizoram state chhunga cheng bikte kan ni tih kan inhriat fo hi a pawimawh hle a.

Chutiang a nih lai chuan, nichina an sawi tawh ang khan ni 16.3.2007-ah khan Pu Lalchandama Ralte MLA in Session a rawn hman vawikhatna ah 'Border fencing hi Indo-Bangladesh chauh nilovin Indo-Myanmar border pawh fencing ti turin central sorkar-ah nawr ni rawh se,' tih hi resolution-ah a rawn move ta mai a. Hei hi Pu Deputy Speaker, i vei lama kan thut lai kha a ni a, kan hrethiam lo em em a ni. I dinglamah emaw, i vei lamah emaw kan thut hian kan ngaihdan hi politics-ah tlang rangin kan kalna tur kan chian avangin ngaihdan kan nei tawh a. Tunah hian kan la thlak lo reng reng a. He resolution hi ka'n ngaihtlak kual vel khan a sawitute pawh khan, he resolution pawh hi nuaibo thak ni rawh se, kha chu sorkar hmasa-ah tih tawh a ni a, sorkar thar hian he resolution hi tha a ti lo a ni. Zofate inpumkhatnaah Zofate inunauna daltu lian tak a ni tih hi kan resolution hmasa zawk hian a entir a ni. Hmanah rambuai laiin Myanmar-ah kan kal a, kan tawmbuk tha tak a ni, hahchawlh nante pawh kan ramhnuai unaute pawhin khilamah an lo hmang tawh thin. Khilam kan han beih leh takah khan loh theih loh in khilam kan chhuahsan a ngai ta a. Kan chhuahsan tak avanga he thil hi tih duhna rilru nei ta mai nge kan nih tih te pawh hi ngaihtuahnaah awm theiin ka hria a. Chuvangin i hmangaihna hmasa kha i ban tak avangin demna che ka nei tiin khilama kan unaute khian min ti ta se tan ngaihna a vang viau awm mang e aw ka ti a.

Tin, politically-in emaw, ram tinah 'Mizo takin aw' kan tih rual rual khan ramri hunga indaidan kan duh tlat chuan khawvel ram dangte pawhin Berlin wall-te kan hria a, Korea-te pawh kan hria a. Khatiang an lo duh tawh loh hnu, vawiinah hian keini'n tih thar leh kan tum a nih chuan kan ngaihdan hi kan thlak a pawimawh hlein ka hria a. Chutiang a nih lai chuan kan unaute

nen hnam anga Mizo bik riau anga kan insawi lai hian kan unaute nen indaidanna nasa tak Berlin wall ang mai in inhung ila kan ti a. Chutiang a nih rual chuan tunah pawh hian economics lamah kan inunauna tur, kan inrual khatna tura sorkarin a ngaih NLUP te pawh retheite dawmkanna tura kan ngaihte pawh kha tunah hian tihtawp tuma hmalak a ni leh zel te pawh hi inunauna, tanrualna tha kan neihna tur atan hi chuan a diklo in ka hria a.

Tin, Pu Deputy Speaker, tuna kan resolution ‘Zofate inpumkhatna daltu chu engmah tih loh ni rawh se’ tih hi kan vawn ngheh tlat a pawimawhin ka hria a. Zofate thendarh zawnga politics khelh tum te pawh kan awm mekin ka hria a. Tuna political party ding thar lo awm leh Revolutionary party an ti emaw ni, hetiang te pawh hi kan ram atan hian a tha ang em aw! tih te ka ngaihtuah a. A chibil ang pheii chuan, miten an chhut chuan a hlauhawm viau mai thei. Tin, chibil behchhana politics khel a, Zofa, Zoram tak tak ngaihtuah lova mahni pumpui tanghma chiah ngaihtuah a, mahni sahmim tihpuar tum, MLA nih tum chibil anga politics khelte pawh tunah hian kan piang mek a ni.

Tunah hian hmar lam area-ah party thenkhatte pheii chuan V.C-a min thlan tlin chuan, majority kan chan chuan Autonomous District kan pe ang che u ti a under current-a khel mekte pawh hi an awm ni a hriat a ni. Hengte hi kan ram kan inunauna, kan tanrualna tikehtu, kan ram muanna tichhetu tur an ni tih te hi kan zavaia kan hriat a pawimawh hlein ka hria a ni. Kan thlalaiten nasa zawka Zo Re-unification an ngaihtuah lai mek leh hmanni lawkah pawh khan Zo Re-unification Global Net work hovin Zokhawtharah inpumkhatna atan khatiang khan khawmpui lian an han nei a, a nuam em em a ni.

Myanmar te, Bangladesh atangte leh U.K. lam atang ten an lo kal a, India ram state tinah Zo hnahthlak unaute an lokal khawm bawk a. Kan Opposition Group Leader-te nen hian kan han kal a, a hlimthlak a ni. Chuvangin kan ram, kan hnam min thendarh thei interek hranna chibil anga awm thei te hi tih loh a thain ka hria a. Tuna kan resolution ‘Zofate inpumkhatna daltu chu

engmah tih nilo rawh se' tih hi ka support a ni tih ka rawn sawi ve a ni. Ka lawm e.

**DEPUTY SPEAKER** : Tunah chuan kan House Leader-in sawi tur a nei em, lo sawm ila.

**Pu LAL THANHAWLA, CHIEF MINISTER** : Ka lawm e, Pu Deputy Speaker, sawi tur tul zawng zawng chu in sawi tawhin ka hria a. A tul vaklo te pawh kha kan sawi thova. Vawkte foreign atanga lakluh a mawng ping, pinglo tih thleng khan Zofate insuihkhawmna atana tha tur a ni a. Tin, Zofate lungrual nan chhiah tihpun vak nilo se tih te, scholarship a hun takah lak ni se, sorkarin motor lei teuh lo se tih te a ni a. Mahse, Zofate insuihkhawm nan tha viau mai theiin ka ring a, kan intlan pawh zung zung theiin ka ring a, awm teuh mai selangin tih te ka lo ngaihtuah zawk a. Tin, sorkar hnathawkte TA/DA te pawh a hun takah pek theih ni se, tih te hi Zofate inlungrual nan hmanraw tha a ni tur niin a lang a. Tin, roreltute hi inhrek deuh se, Kejriwal-a te an rawn sawi a, Kejriwal-a khu Zofate insuihkhawmna atan enge a tangkaina dan tur ni ang aw tih te ka ngaihtuah nasa a, ka ngaihtuahnain a phak vak lova. Engpawh nise member-ten thahnemngai taka an rawn sawi avangin a tha ni ang e ti mai ila a tha ang.

Zofate insuihkhawmna kan sawi a, tunlai tak phei chuan politics-ah intlansiak nan kan hmang ta lehzual emaw ni chu aw ka ti a. Mizo hnam (Mizo Nationalism) te kan ti a, Indian Nationalism-a in surrender tawhte a sawi tam tam kan han ni lehzual a. Engpawh nise a tha vekah ngai ila. Mahni ngaihdanah 'Right' kan nei a, kan sawi thiang a. Engpawhnise Pu Deputy Speaker, ka hmuh ve dan chuan Zofate hi khawiah pawh awm ila chhulkhath kual kan ni a. Bangladesh-ah, Burma-ah, khawiah pawh awm ila, Manipur-ah, Assam-ah. Tripura-ah. Amaherawhchu, Zoram pawn ami te hian insuihkhawm hi duh hle mahsela khami atana hma la tu tur chu keini hi kan ni a. Zoram kan tih chhunga chengte hi kan ni a, anni hian engtinng e min hmuh tih hi a pawimawh khawpin ka ring a. Nichinah khan Opposition Group Leader te pawhin an rawn sawi tawh a, Mizo dik tak pawh a ni lo ang, Mizo tawng a

pai te kan ti mai mai a ni, Mizoram chhunga awmte hian. Helai hi an Jerusalem kan ni kan ti bawk si a, Pu Deputy Speaker, chuvangin, Zoram kan tih bik chhunga awm te, a bik takin tute emaw tawngkam, mahse tha vak lo “Eng a” ti chin te hi a bikin an pawimawhin ka hria.

Mizoram chhungah pawh khatiang kha kan nih chuan pawnlam ami te hi engtin nge kan beisei theih ang aw tih te min ngaihtuah tir a. Entirnan- tumkhat chu hei kan hotupa Pu Zira ho hian MLA kha he House-ah hian 6 chauh kan awm a ni. Ani chiah hi hmar lam ami a ni a, chunglai chuan mi tam berin hemi House chhungah ngei pawh Mizo II ti te in an in au a ni. Kha kha helaia kan ngaihtuahna a nih miao si chuan engtinngemaw Zoram chhung chu sawi loh Zoram pawn ami te khan helaia insuihkhawm a, rorelna pakhat hnuai a awm te kha an chak ang aw tih te min ngaihtuah tir a. Chuvangin, hei hi kan thinlung tak taka kan vei a nih chuan Pu Deputy Speaker, keimahni Zoram chhunga awm, ram leilung fa te hi eng chi pawh ni ila, kan rilru hi kan siamthat a, kan inzir phawt a tul a. Chuvangin, eng dialect pawh lo hmang sela Mizo an nihna kha a bo chuang lo a ni.

Hmanah Manipur-ah kan hun hmasa-ah, engemaw lai khan Chikim Kut an nei a, ( sawlaiah pawh sawn insuihkhawm saw an duh em em a ni.) tah chuan Chief Guest-ah min sawm a, ka va kal a, chutah pawh chuan ka thusawi hmian Mizo tawng tam tak zingah Lusei tawng kan tih mai, vawiina Mizo tawng kan tih tak chauh hi ka thiam a, chumi tawng chuan thu ka sawi dawn a, he Mizo tawng hrethiam ve lo chuan min lo ngaithiam mai dawn nia tiin thupha ka chawi lawk a, an hlim hle a ni. Chutiang chuan, keimahni zawk hian ngaihtuahna thuk zawk neia kan dawm thiam a ngai a, helai hmun atang ngei hian tumkhat chu Tahan piah rak thleng khian Mizoram a ni tih kha ka sawi a, ngaihthlak nuam an ti hle a ni. Khatiang kha kan rilru-ah awm se ka duh a. Tin, duhna tak tak rilru kan neih hi a ngai khawp mai.

Nichinah khan an sawi a, a lawmawm a, Tripura-ah Zohnahtlak awm ten min rawn sawm hmasak ber tumin kan hotute nen kan zuk kal a, chutih lai chu November thla niin ka hria. NLFT helho te khan ‘Krismas hma in

vaibelchhe 2 chhiah in rawn chhung tur a ni,' an ti a, an lo ngui khawp mai a, Krismas dawn e ti lovin an hlau hle a ni. Khatih lai khan an lian angreng bawka. Mahse, ka kalna khua apiangah khan 'he ram hi Pathianin Zofate min pek ram a ni a, engti kawng zawng mahin kan chhuahsan dawn lo a ni, midang in awm ve duh a nih chuan tha takin awm ula, chuti nilova helaia kan Mizo puite hi in lo vau a, sum leh pai te in lo lak sak mai mai dawn a nih chuan khawchhak lamah khian Mizo tlangval a nuai sawm tel kan awm tih hria ula, anni ho hi chhan in, an thlavang hauha kan rawn chim thlak chuan in chak lo ang. Chuvangin, helaia Mizo awmte hi lo vau lo ula, Pathianin helai ram hi Zofate min pek a ni a, engtiklai mahin kan chhuahsan dawn lo,' tiin vantlang inkhawm apiangah ka sawi a, 'Tin, hei hi kan ti tak tak dawn a ni tih in lo hriatna turin ka haw hun hian ramri-ah Mizo tlangval sawm tel ka hnutchhiah dawn a, chu chu in lo hre dawn nia' ka ti a ni.

A chhan chu, khulai khu kan ram a ni a, Pathianin min pek a ni a, Zofate an awm a, an taima em em a, an changkang a, Civil Service-ah te leh ei leh bar zawna kawngah pawh sorkarin enkawl tha vaklo mahsela sorkar tanpui ngai vak lovin Mizofa dik tak niawm takin soekar dip lo vin an khawsa thei a, an entawn tlak hle a ni.

Tichuan, kan haw hmain kan IGP te hnenah Mizo tlangval rawn thawn thla turin kan ti a, Kawnpui-ah ramri-ah camp nei in an awm a. Haw pahin fuihna thu te kan inhrilh thei a ni. Tichuan, anni hnenah pawh 'mi ram a ni a, mi state a ni a, uniform nena in vah in vah a rem lo mai thei. Amaherawhchu, bazaar ni-ah te leh puipun nikhua-ah te civil dress in kal ula, in silai te hi ak lang palh thin ula, mi tamna lai deuhah te thlauh palh der thin ula, tichuan tute nge in nih an hria ang a, helaiah helho, Mizote lo tibuai thin tu te leh midang reng reng an lo tihbui thin te pawhin an lo thlamuan phah ang e' ka ti a. Chutiang chuan an thlamuan phah hle niawm takin kan hotute zuk kal leh ten an sawi thin a, a lawmawm ka ti a.

Kha kha hmui chauh nilovin, a taka kan tih dan tur niawm tak a ni a. Chutiang chuan tunah hian keimahni helai an Jerusalem tia kan chhala awmte

hian kan rilru put phung kha kan siamthat hmasak a, chu chuan kan thenawm ram hrang hranga kan Mizo hnahtlak awmte hi a hip khawm a, appealing deuh a kan siam hi a pawimawh hmasa in ka hria a, chu chu ka'n sawi duh a ni. Tin, Naga unaute khu an thiam hle a, kan tluk lo emaw chu aw te ka ti thin a. Anni khu khawtinah an tawng a hrang a, Naga ram pawnah chuan Naga vek an ni Shema, Ao pakhatmah an awm lo reng reng, Naga an ni thap mai a ni. Mahse Naga ram chhungah chuan vawi hnih vawi thum ka zuk kal tawh a, vawi khat pheii chu thla khat deuh thaw ka cham a election avangin. Naga ramchhungah erawh chuan Naga an awm miah lo, Shema te, Ao te, Angami te, Lotha te, Konia te an ni leh vek a ni. Mahsela an unity kha a tha tho a, Naga ram pawnah pheii chuan a tha leh zual a ni. Chutiang chu an ni a, khung atang te pawh khuan in zir ve a tul hle a. Keini chu Pathian min siam dan a special bik a, tawng khat hi kan hre vek a, anni chu an in hre miah lo a ni. Chuti chungin an unity a tha em em a. Tin, Burma ram lampanga an unau awm te pawh an hauh na viau a ni. Chuta tang chuan zir tur kan neiin ka hria.

Tin, helai tualchhunga awm te hi kan pawimawh zia hi kan in hriat nawn fo a tha a. A chhan chu Manipur-ah tum khat chu inthlan laiin kan High Command in Observer turin min tir a, Congress party kha kan chak ta a. Chumi tum chuan an local arrangement-ah sawn a changin tlang mi, a changin phai mi, Meitei in Chief Minister chhawk tur tih te pawh a lo awm ve a ni awm e. Naga ho saw chu an tangrual a, Naga an ni vek mai a ni, chi hrang hrang kha an awm miah lo, Naga an ni thap mai a. Chuvang chuan tum hnih tum thum Chief Minister an chang tawh a ni. Chumi tum chuan Zo hnahtlak 13 lai kan awm ve a, Paihte, Hmar, Kuki an ni hrang nuai mai a, Naga unau te ang khan unity an nei ve thei lo a ni. Chumi tum chuan Naga unaute ang khan unity nei ila chuan 13 emaw lai kan ni a, Leader kan nei a, Chief Minister pawh kan chang ve thei tur a ni a, mahse kan chang thei ta lo a ni, pawika ti hle a, a lungchhiat thlak a. Naga unaute chu Zeme, Rengma, engmah an awmlo reng reng a, Naga an ni thap mai a ni. An tawng an in hre miah lo, keini chu Kuki, Paihte, Hmar, Lusei kan awm a, mahse kan tawng kan in hre vek a, mahse Mizo kan awm ta miah lo a ni. Chuvang chuan Chief Minister



nihna te kha kan hloh ta a, kan chan ta a ni, hei hi thudik a ni. Chuvangin kan thiam loh hi kan thiam ve a tul hle in ka hria a.

Tin, hemi keimahni Mizoram chhunga awm te hi kan pawimawh zia entirnan chuan kan hun hmasa lamah khan Paihte unaute an inti thiam lova, an in leh lo an in hal sak a, an in nuai a, an in that a, harsatna nasa tak an taawk a ni. Tichuan, inpui nu leh pa nei a an in hriatna chu Mizoram tho a ni. Kuki te pawh Mizoramah an rawn tlan chhia a, Paihte unaute pawh Mizoramah an rawn tlan chhe tho a ni. Sialkal tlangdungah a sang tel a sang tel camp kan lo siam sak a. Puanthuah kan pe a, eitur kan pe a, damdawi kan pe a, officer pahnih pathumin an enkawl a ngai a. Kuki unaute khutah Rengtekawnah an lo tlan chhia a, anni pawh chu kan lo enkawl a ngai a. Tichuan an tang na hle a, a leh lam leh lam khan min rawn hmu thin a, kan hotute an hmu thin a, ralthuam te min dil a ni. Mahse ‘sawta thisen in in chhuah pawh engtih thu loh, helai atang chuan keini chuan a ralthuam zawng chuan kan tanpui dawn miah lo che u, ei leh bar leh chenna kan pek che u bak hi chu kan ti thei lo a ni,’ kan ti a. Tichuan a hrang hrangte pawhin kawmna kan nei a, ‘sawlaiah Pathianin ram min pe a Meitei te, Ralleng ten min itsik a, an fuihpawrh che u a, an in sual tir che u a. Hetianga mi dangin duh duh a fuihpawrh thei a in awm hi a vanduai thlak khawp mai. Sawlai Meitei sorkarin a ngaihsak lo che u a, Churachandpur-ah LP School-ah refugee tam tam an awm a, ei leh bar tur pawh an pe thei lo che u a, an pe duh lo che u a ni a. Chutiang in nih lai chuan an fuihpawrh che u a, in ram, in in leh lo, in khua leh tui in chhuahsan a, annin an rawn luah zel dawn a nih chuan hei hi chu in sim vat a ngai a ni,’ kan ti a.

Tin, Manipur sorkarin Churachandpur-a School-a tlan chhe ho te kha buh leh bal, ei leh in tur a pek loh avangin Aizawl atangin truck trip eng emaw zat kan thawn phei thin a ni. Chutiang chuan kan lo enkawl tawh thin a, khatia an awm reng kha chuan sawlaiah kan ram kan chan zel ang tih kan hlauh avangin kan hotuten thiam takin Peace Delegation an tir phei ta a ni. Nichinah khan kan ngaithla tawh a, Kuki unaute zingah pawh hian Chawngthu an tam a ni.

Tin, Kom kan tih Mary Kom kan tih te kha Kom Chawng-thu kan ni an in ti a. Hmanah an upa Bangalore-a Bible let a kal ho Kolkata Airport-ah kan inkawm a, sam ala zial ngauh nghe nghe a, mahse saptawng te engkim a thiam a. Chu nen chuan kan in kawm a, a tir chuan vai tawngin ka va bia a, mahse min han hriat khan, 'keipawh Lusei tawng ka thiam asin,' a ti a, Lusei tawngin kan inbe ta a. 'Engnge i nih a, tunge i nih,' ka tih khan, 'Kom ka ni a, Manipur-ah khian tlem te kan awm a, Mizoram-ah chuan Chawngthu in in ti a,' min ti a. 'E! a ni maw ka pu, keipawh hi ka nu hi Chawngthu asin, ka pu hi Chawngthu a ni a, Durtlang Lal khawchhiar thin a ni a, i hre hial ang em aw,' ka ti a. A sentimental ta viau nghe nghe a ni, khatiangah kha chuan kan lo in hnaih zia kha a chiang khawp a. Chuvang chuan han in la hrang thei tak tak pawh hi kan ni lo va. Kuki unaute leh Paihte unau te pawh hi an han inbei nak nak tak nain, tawngte pawh an intawm deuh vek a ni. An buai reng chuan kan ram kan chan hret hret ang tih kan hlau va. Kan hotuten thiam takin (interruption) Pu F. Lawmkim Singson Kuki pa a ni a; tin Pu H. Zathuama Paite pa khami te pathum kha kan hotuten an tir pheih a, ramhnuaiyah an bihrukna ah te luhkhung zelin remthu an va sawi thei a, chutiang chuan mahni khuaah theuh an haw leh thei a ni. Kan sawi chhuahna chhan chu kan thiltih tum ka sawina a ni lova, Zoram-ah hian Inpui neiin an in hria a, nu leh pa an neiin an hria a, thlamuang taka raltlan nan an hmang a ni. Keini zawk hi chutiang nih tling zawk hian kan awm em tih hi kan inbihchiang zawk tur niin ka hria a ni.

Kan ngaihtlak tawh ang khan kan tawng te pawh a lo hrang a ni mai thei, dik tak chuan Lusei tawng hmang in ti te pawh tam tak ah chuan Lunglei leh Aizawl te chu a hrang daih a ni. Kan awmna a zir zel te pawh hian kan lam dan te, a hming kan vuah te pawh hi a lo hrang a. Aizawl-ah hian Pu Mahima hian Nuhnun rawn zawng se hria an tlem viau mai thei a ni. Chuvangin hengte hi in enhranna tur a ni lova, min thlahtu a zir te in kan tawng hi a hrang mai a ni tih hi kan pawm dan nisela, inpumkhatna kan tih hi hma kan sawn thei in ka ring a ni.

A chhung ami te kan inenhran chuan pawn lam a mite kha kan beisei thei ang em tih hi kan ngaihtuahna ni se ka duh a ni. Tin, eng kum nge tih ka hre ta lova, Mizo Society of America tih te khan an kum 25-na lawmnaah khan minrawn sawm a, kan zuk kal a kan hotute rem tihna in. Chutah chuan Mizo organization, Lusei tawng hmang lem lo mahse Mizo organization chi hrang 13 te nen kan inkawm a ni. Hmun hrang hrang atang khan an lo kal a, chutiang chuan Mizo nih hi an duh vek, mahse, keimahni hian Mizo nih tir hi kan thiam ang em tih hi kan ngaihtuah fo tur zawk a ni a. Sorkar ang pawhin theihpatawp ka chhuah a, eng eng emaw Zofest, chumi khami buatsaih te pawh kha harsa chung chungin a tulna ang ang in an duh ang zat pe thei lo mahila kan theih ang ang in kan tanpui ve thin a. Nichina kan Art & Culture Minister zahawm takin a sawi tawh ang khan tuna Chapchar Kut kan han hmanah te pawh khan khilama kan Zo hnahtlak Chief Minister te pawhinrawn tel ve an duh a. Anmahni thu ringawtarawn kal ai chuan ‘formal invitation minrawn thawn ula’ an ti a, formal invitation te kan han thawn a, an sorkara a awlaina tur zawk te a nih theihna turin. Mahse a tawpah chuan a remchang thei ta lova, an lo kal thei ta lo a ni. Chuti chungin chhim lamah chuan Lai ram te, Mara ram ep ah te kawng kan siam reng reng in border-ah kan tawp mai lova, tunah pawh sawn kawng sial lai mek kan nei a. Chungah te chuan a hawn nikhuaah te pawh keimahni lam ai mah hian an phur zawk a.

Tin, khilamah an sorkar te India sorkar ang te an lo ni ve lova, development kawng hrang hrangah te an chak vak lova, chuangin kan unau thei hi kan theih ang angin kan han kep chho ve zel a. Tun April thla chhung hian Vuangtu-ah te, Haka-ah te, border a inkalpawh thlenga laih te hi Government of India phalna a lo ngai a lo ni a. Mahse, kan hai der a, a remchanna lai apiangah kan lai zel a. Tin, Assam Rifle te pawh in a vengtu an nih avangin ‘hei hi a rem lo, phalna in nei lo’ te pawh an ti a. Mahse, ‘kan ram chhung a ni a, kan duh na laiah kan lai ang chu,’ te kan ti ve mai a, kan lai ve mai zel a. Chutiang chuan insuihkhawmna lam hawi hi chuan kan theihtawp in kan sorkar hotute pawh hian an thawk ve a ni tih te ka’n sawi tel duh hrim hrim a.

Tin, Lungreng Project hi MIFCO kutah kan dah a, engtikah nge an thawh tan theih ang ka hre lova, ka'n sawina chhan chu hemi hi kan khuah chuan mega watt 815 pe chhuak thei tur a ni a, Burma ram zau tak a chim dawn a ni. Chuvang chuan tuna an Ambassador hmasa kha zinah kan sawm a, a lo zin a official te nen. Bay of Bengal lama chhuahka kan neihna tur te helicopter in kan va tir pheih a, Lungreng chungah te kan thlawh kual tir a, kan mithiam ten an hruai a. Tin, Border Trade kan neihna Zokhawthar-ah te kan han hruai a, an hlim khawp mai a, an lawm em em a, an phur hle mai a. Lungreng Project te pawh chu a phur khawp mai a, chutiang chuan kan theih ang ang in anmahni official te pawh kan sawm in kan lo enkawl a. Tin, tuna kan D.C. hma ami vai D.C kan neih lai khan Mizoram sorkar remtihna in Burma sipai officer ho spoken English an zirtir thin a, an lawm khawp mai a Burma lam hotute pawh, chu chuan thui tak khilailah khian in laichinna te pawh min neih tir phah a. Tin, Burma lamah Zokhawthar-ah te khian kum eng emaw zat atang tawh khan power kan lo kep ve a, chung te pawh chu an han hriatin an lawm khawp a.

Chuvangin, heng angte hi theihpatawp kan chhuahna chhan chu kan sawrkar leh khilaila ramri, Zohnahthlakte luah chinah tal khian Burma sawrkar te nen inlaichinna tha kan neih theihna a nih takin tiin kan hotuten ngaihtuahna thui tak neiin chutiang chuan an kal a ni. Tin, hei kan vannei hle a, a tawpna tur atan Pu Deputy Speaker, Zohnahthlakte hi khawiah pawh awm ila, Pathianin Lusei tawng kan tih mai hi hre thlawt lo hi chu a siam miah lo ni awmin ka hria a. Ka kal zau hle tawh a, Champhai atangin Zimta-ah, Zimpui-ah, Laitui-ah, Tuidil-ah, Tiddim thleng, lo sul haw te nen kan intawk a. Mahse inhriatthiamna khawp chu kan inbe thei deuh zel a ni. Chutiang ang chu kan ni a.

Hmanni lawkah Haflong-ah kan zuk kal a, MZP ten Zofest an buatsaihnaah. Chutah pawh chuan Mizo chi tin deuh thawh Biate, Vaiphei, Kuki, chutiang khatiang an lo awm a. Chungte nen pawh chuan kan inhre thei vek a ni. Hei hi Pathian-in special taka min siamna niin ka hria a. Tin nichinah MLA zahawm tak Pu Ruatkima'n a sawi tawh ang khan Pathian lakah hian

kan special hle a. Keini hnam chiah hi khawvel sakhaw lian ber ber pathumin a hual beh tlat a siam awm chhun kan ni. Chuti chungin, Thlarau Thianghlimin minrawn zawng chhuak a, minrawn ko va. Khawvel zawng zawnga kala thil siam zawng zawng hnaena Chanchin Tha hril tura kohte kan ni a. Tichuan, helaiah a dawng hmasaten kan Mizo hnahtlak puite hmangaihna nen Chanchin Tha dakin an zawng chhuak a. Chutiang chuan tunah hian kan tawng inhriatlohna te pawh kha Kristiannain, Bible pakhat rei tak kan intawmnain min phuarkhawm nan a hmang hle a. Tin, kan culture te, kan awmna hrang deuh mah se a inang deuh vek zel a. Hengte hi hnam anga kan danglam bikna a ni a.

Tin, Mizo zawng zawng thinlungah hian engtikah emaw kan la insuihkhawm ngeiin rorelna pakhat hnuaiyah kan la awm dawn a ni tih hi a awm vek emaw chu aw tih mai turin sawtah chhim tawpah Mire te chu an huatthu suhah Mizo-ah chuan hnufual berte zing ami an ni ang tih turte pawh ringtu awm thar, MNF unauten ringtua an lo siam te an lo kal a. Chungte pawh chuan an thawnthu-ah khan khatiang insuihkhawm kha an nei vek tho a ni. Chutiang chu a nia, Khampat bungpui ang deuh hian. Chuvangin eng emaw taka Pathianin min duante kan ni a. Chuvangin, a remruatna kan nghah thiam a, a remruatna lo thleng thuai tur awm anga keimahni zawk helaiah Zoram kan tih bik chhunga a dahte, vanneihna tinreng dawngtute hian kan thiam phawt chuan engtik niah emaw chuan Lal Isua duh loh zawng, ralthuam cheleka tharum thawha thisen chhuah kher lo hian unification neiin rorelna pakhat hnuaiyah kan awm ang tih hi chu Mizo zawng zawng thinlungah beiseina a awm ang hian keipawh beiseina lian tak ka nei a. Chumi chu kan thlen theih nan erawh chuan hemi Zoram chhung bika keiniho hian kan thiam hle a ngai a. Chuvangin, thiam hle tur pawhin party angte leh Zoram chhunga Mizote kan nihna ang hian kan tihtur hi kan hriat a pawimawh a. Chu chiah chu kan inlungualna leh insuihkhawmna, chhul khat kual kan ni; hmui ah mai ni lovin thinlung taka kan pawm a, khati zawnga kan thawh theihna tur atan hma kan lak hi a kawng niin ka hria a.

Chuvangin, he resolution duhawm tak Pu T. Sangkunga'n a rawn putluh hi, a tawngkam chu a ulh deuh a nih pawhin a hriatthiam theih tho va. "Zofate inpumkhatna daltu chu engmah tih ni lo rawh se," tia a rawn putluh hi a lawmawm ka ti a. A chhan chu he House-ah hian a dal zawngin resolution a lo awm tawh a, khami resolution paih zawng resolution thar awm kha a dik si lova. Chuvangin, hetiang hian mawi hnai takin thu a rawn phuaha a rawn pulut hi a lawmawm ka ti a. He House hian lungrual takin kan pass ngei ka beisei a ni. Ka lawm e.

**DEPUTY SPEAKER** : Awle, tunah chuan resolution neitu Pu T. Sangkunga wind up turin kan sawm ang a. Pass rawn dil nghal sela a tha ang e.

**Pu T. SANGKUNGA** : Pu Deputy Speaker, ka lawm e. Vawiinah ka resolution "Zofate inpumkhatna daltu chu engmah tih nilo rawh se" tih support zawngin member zawng zawng deuh thawin kan sawi a. A dodal zawnga rawn sawi pakhat mah kan awm loh avangin lawmthu a hmasa berin kan sawi duh a ni.

Tin, kan thusawi hrang hrang atang leh kan hnam inpumkhatna chungchanga kan kal duh dan han thlir vang vanga lo ngaihthlak atanga pawimawh tak ni a ka hriat chu inthlan (N.G.O. inthlan) thleng hian kan hnam inpumkhatna hi a tichhe tel a ni tih a hriat a, rei tak chhung i veilam ami kan opposition group leader Pu Vanlalzawma te, Pu Ruatkima te nen YMA-ah kan thawk hova, kan inngaina khawp mai a. Mi pakhatatah chuan Pu Zawma hi motor pakhatatah ka chuanpui tam lawt lak a ni a. Inkawm ngeih tak kan ni. Tun thleng hian Estimate Committee-ah te, Subject Committee II-a kan han kal chhuah pawhin motor pakhatatah te kan chuang dun leh thin a, thiante nuih te pawh hi a za deuh hlek a. Pu Ruatkima motor-ah te pawh hian ka chuang hnem hle bawk a, chutianga inkawm ngeih tak chu kan ni a. Amaherawhchu, Pu Zawma he resolution an hmuh phat a, a thinlunga lo awm hmasa ber a sawi kha Mizo II a ni a, chu chuan inthlan in mihring a effect theih zia a ti lang. Pu Beichhua thinlunga lut hmasa ber hi chu ni se ka hrethiam khawp mai a. Ka

rilru a lo lut chu Julia Ceaser-an ‘Brutus nang meuh pawhin maw?’ a tih kha ka rilru ah a lo lut a, vawiin thlenga kan thiantha berte, pu te mitmei pawh ven a ngai deuh em aw tih khawpa ka thian tha in a thinlunga lo lut hmasa kan ngaihtuah khan, inthlan leh pawl hian rilru a lo ti danglam thei mang e. Pu Bechhua rilrua lo lut hmasa ber a ni bawksi lo a tih kha ka rilru ah an awm phawt a.

Tin, vannei ka inti a, nizanah pawh Mizo II hi ka sawi ang em ka ti rilru a ni. MZP Conference-ah thu ka duhtawka sawina hun min pe a. A hnukung lamah Mizo II ka sawi dawn a kan ti chu a ri hak mai a. Mahse, kan sawifiah chuan min chibai laih laih mai a ni. Chuvangin he House meuhah Mizo II sawi a min puhna sawi fiahna hun remchang mi rawn siamtu thiantha Pu Zawma ka lo nei kha vannei ka in ti ta em em zawk a ni. He thu hi inthlan effect kan tihna chhan chu All India Radio-ah thusawi turin YMA President tinglo taka ka nih lai khan min sawm a, Mizo Hmar kan ti kher ang a, kan thian pakhat A.I.R. a thawkin ka thusawi record turin min rawn sawm a, ka sawi a, ‘I thusawiah tha ka tih ber pawl a ni,’ a ti a. Khatih lai khan television hi a la tam lova, local channel te thingtlangah pheichuan a awm lova, congratulate tu telephone-ah ka ngah ve khanglang khawp mai a.

Khatih lai khan Mizo II tih hi a lar viau tawh a. Kan hriat theuh angin radio-a thusawi chuan kan thu sawi tur khawla chhut chhuah hi kan chhiar chhuak tawp mai thin kha a ni a. Ka thu sawi tur ka pek, ka chhiar chhuahah Mizo II a tel miah lova, a hnu a han ennawn pawhin. Radio-ah khan a record-tu pawhin pakhat mah kha an hmu lo bawksi a. Amaherawhchu, an play nawn leh dawn khan thil dang an lo record hnan a. Central leh thingtlang YMA hruaitu khami ka thusawi ngaithla reng reng khan Mizo II ka sawi kha an hrelo bawksi a. CCC-ah te kan khel a ni. Mahse YMA inthlan kha a lo hnaisi, min beih nan Mizo II a sawi min ti tlat mai a ni. Mizo insuihkhawmna atan hian Leader te inthlah zia nichin khan kan ngaithla tawh a. Chutiang bawksi chuan YMA hruaitu atan thlan ka nih phatin Manipur-ah kan kal a. Tuna an sawi tak Kom an ni emaw, Vaiphei an ni emaw, Paihte, Kuki a ni emaw an hruaitute zawng zawng ka hmu chhuak vek a ni. ‘Insuihkhawm ang u, Mizo hi hnam tlemte kan ni,’ ti a YMA hruaitu kal kual awm chhun ka

nih ka ring a. Ka President lain Manipur-ah Gangte kan la lut a, Tripura-ah Mualthuam kan la lut bawk. Manipura kan unau Kuki & Paite indo khan tlai dar 4 hnulamah khawlaiah an awm ngam tawh lo an tih lain hun kan nei tlem si a, zan dar 10 thlengin khawlaiah an helte kan tlawh kual a, inrem turin kan ti a.

Khatianga ti kha kan hruaitu dangte an awm lovin ka hria. Amaherawhchu, thil pakhat media in thil a lo tihtheih tawh zia hi ka ngaihtuah bawk a ni. Chanchinbua khatianga Mizo II a sawi ti a YMA O.B. a mi paih tumtu ten an chhuah kha chuan mi reng reng hian Mizo II sawi hmuh hian min hmu vek mai a ni, tih ngaihna a awm tawh lo reng reng. Chuvangin kan House Leader ka chhunna ber chu ka insawifiah peih lo kha nita berin ka hria a, a sawifiah pawh hi ka peih tawh lo reng reng a, sawi mah ila an awih lovang. A record tu lah chuan, 'kei Hmar pa Manipur atanga lo kalin khang kha sawi ni la, engahnge radio-ah ka tih chhuah ang le? A haw ber ka ni ang chu,' a tih pawh kha han sawi chhuak mah ila miin an awih tawh lo reng reng. Chuvangin, insuihkawm lam an sawi chuan, midum zinga a neite ber ang mai hian ka thu ngawi hle hle ringawt mai a, tihngaihna a awm tawh lo reng reng.

MLA inthlan dawnah vanneihthlak takin candidate a ni mai awm mang e tih atang khan khi lai bialah chuan thla 3 hma lam atang chuan Mizo II tih leh Saikhumphai haltu tih kha a ri vut vut mai a. Kan pute pawh an zam a ni. Thla 3 vel motor nen an thutchilh tawh bawk si a. East Tuipui bialah ka din loh phah thelh a ni. Saikhumphai hal kha Central YMA chuan ni 3 hnu velah kan hre chauh a. Mahse, ka inah Congress Block 2 hruaitu te nen chaw kan han eikhawm a, Khawbunga kan Unit President chuan MNF hruaitu 1 phone in a bia a. Hei Pu T. Sangkunga kan candidate a ni dawn awm e, an la puang chiah lo na a, an ti chu rang fahran mai hian, ngaihtuah lawk miah lovin "Saikhumphai haltu kha maw?" a rawn ti nghal zat thei mai a. Ka rin aiin an lo inzirtir tha fe mai a ka ti a. Chhoh kha ka chak phah a ni.

A chhan chu khatiang ang hnam inzawmkhawmna tur, keipawh Pawih hnam, hman lawka ka pute Burma ram atanga lo chhuk an ni a,



chhungte pawh a zahve Burma lama chho leh an ni a. Khang han sawi fiah kha chhete mahin ka huphurh lova. Tin, Saikhumphai ka zu tlawh loh chhan pawh kha, han sawi ila. Ka chhungte pawh Vanzau-ah pakhatmah ka la hmin thei lova. Khawlian, Farkawn leh Khawbungah te party dang pawh an ina ka luhna apiang ka la emaw ka tih lai khan, khawte ah chuan party-ah an ruh em em a. Saikhumphai kha ka bial khaw 26 zingah a te ber an ni. An han ruh em em khawp a. Kan thiante leh lam ami lah khan Saikhumphai hi an chhuahsan lo reng reng, a vaia lak an tum avangin ‘Concrete in kan sak sak vek ang che u’ an ti mai a. Khawte deuh zawng zawng kha Model Village-ah kan puang ang che u, an ti vek bawk a. Khalai biala Hindi/B.A chung lam zawng zawng kha chu sorkar tuka Hindi Teacher a appoint vek tur kha an ni a, Matric chunglam pass kha chu LDC leh zitirtu a dah an tiam a. Thutiam an chak ropui mai si a. An sawi dan chuan, Khawhmawr bera MNF campaigner lo tum hmasa apiang hian, ‘Mizo-II titu kha a ni a, in thlan tlin vaih chuan Burma ramah a um haw vek ang che u tih kha, an thlen in an luh hmian an sawi deuh vek a ni,’ an ti a khatiang khawpa ropui kan khin dawn avang khan hmin tur chuan loh khawte ai chuan hmin theih khawlian lamah tan ka la a ni. ngam loh vang a nilo.

Mizo-II hi Aizawl lamah ka sawi hria an hmuh loh hnu khan Manipur YMA in radio-a sawi an hria a, an haw khawp mai an ti a. Chutih laia Manipur group YMA President chu K. Lalrinliana, tuna MPC, Manipur President ni ta hi a ni a. TV.-ah an thu thehdarh chu a lo hmuh ve leh ka office-ah a lokal vang vang a, ‘Ka pu, a zialo lutuk T.V-ah kan lo hmu a, Manipur YMA in Mizo-II a sawi an hria a, an thin a rim lutuk an ti a, kei kha President ka ni a, Manipur YMA Mizo-II i sawi hria an awmlo reng reng. Hria ni ila, kan innel em em a, kan rawn chhuahchhal em em ang che,’ a ti a. Kha a thusawi pawh kha ka pindanah a tawp leh der a. ‘kan inah lokal la, i sawilai tak hi T.V. camera a lak ka duh,’ ka ti a. Ka bulah a thu a kan record ta a. Ka dinna biala an sawi chuan kan phawrh dawn nia, ka ti a. Video in kan record a. Khatiang sawina hun vawiina ka neih nan Pu Zawma’n a rawn kam keu a, kan Dy. Leader in a rawn fiamthu zui bawk a. Khatiang

huntha min pe a, hetiang House chhung meuh a in explain na hun ka nei hi lawmawm ka ti a.

Kum 1998 MLA thlan pawh khan khilai Biala kan khingpui te khan 'Kan tlin vaih chuan in tinah sapthei chin tur kan rawn pe che u ang a, a khur laihna te, a zamna te, khehna khawl te, engkim kan rawn pe che u ang a, in tin in gypsy var in nei vek dawn, in in bulah garage tur lo ruahman vek rawh u,' tih vel kha an sawi a. An sawi anga an tih tak siloh avang khan an thu sawi reng reng kha hrilhfiah a nuam ve tlat mai a ni. Chung kan sawi theihna chu ka thianpa Pu Zawma zar a ni a, ka sawi tum reng reng loh insawi fiahna tur malsawmna ka dawngin ka hria a, chuvangin khatiang boruak hnuaiah khan kan han awm. Khilai Constituency-ah MLA inthlan tawh zawng zawngah Pathian zarah vote inthlahna ber, in hnehna record sang ber kan han siam theihna pawh kha, khatiang ke neilo dawt an sawi thin vang kha niin ka hria a. He House chhunga awm tho Pu Ngunlianchunga pawn Mizo-II hi a helh deuh thinin ka hria. A ni hma ah pawh khatianga han hrilhfiah chian theihna kha a awm chuang silo a, ka thianpa Beichhua pawh khan hartharna a chang em ni rawn tih zauh kha, kha kha a kawc niin ka hria a. In ngaina deuh ni mah ila, thiante Assembly a thutna in ang lo a kan han thu te leh political party inthlan mai nilo YMA inthlan pawhin mi a khawih zia ka hria. Pastor te pawhin tehkhin nan te Mizo-II hi an hmang a ni. Thianten T.V-a Mizo-II a sawi an tih lai tak kan en ho pawhin ka explain ngailo reng reng, ka peih tlat lo. A chhan chu mi kha ka convince chuang dawnin ka hre tlat lo, media in mi a hneh tawh laklawh, sut leh har dan pawh ka hriatchian phahin ka hria a tunah hian ka lawm hle mai.

Tin, hei tawite han comment leh ka duh chu, Mizo te hi kan Mizo fir lutuk niin ka hria a, a bikin Lusei (Mizo) tawng hmang te hi, Naga-te chuan Expansionist idea an nei a, Kom hnam te pawh tihluhna in an la tlat maia ni. An depa mi reng reng te kha Naga in nih loh chuan, an ti tlat. Kan Mizo hnahtlak engemaw zat Mizo Union list a awm ngat ho hnam 47 zing ami te pawh kha tunah khian Naga kan ni an titlat mai a ni. Chungte ka luhchilha Mizo in ni ka tih pawhin Naga ho an hlau tlat. Keini chuan tawngpai deuh kha chu Mizo-ah kan pawm thei tlat lo mai a,

chuvangin kan Mizo lutuk hi a buaithlak in ka hria, Israel deuh mai an ni a, Bible-a kan hmuh angin hnam dang kha chu thah vek tur an ti fo mai. Israela kan zuk kal ve chuan Bengurian Airport-ah kan han tum a midum sam kir, sipai duty in min lo chhawn a ni. Sunam lalnu thlah te an ni an ti. Chung ang te chu Mizo in kan pawm theih ka ringlo reng reng, an sam a kir chep mai a, an dum em em mai a, mahse zana thlawhtheihnain Africa atangin an phur a, kan unau Israel in ni, serh in la tan te an ti a. Keini chuan Mizo dik tak tawng pai deuh chu nuhzatah kan neih si a.

Hetianga kan Mizo unaute kan tih hi kan inpumkhat theih lohna niin ka hria a. Hnama fir lutuk chu Persi ho khu en rawh u, India chhiarpui apiangah an tlem hrat hrat hi. Naga te chuan an farnu in hnamdang an neih chuan Naga an ni mai a ni. Persi chuan an unau in hnamdang an neih vaih chuan an phal lo a, an tlem tial tial reng a ni. Chuvangin fir lutuk hi chu tlem tial tial na a nia. Mizo fir lutuk lo ila, nichina kan House Leader leh sawitu dang zawng zawngin an rawn sawi ang kha a tha, sawi nawn a ngai tawh lo, kan tih mai tur niin ka hria a.

Tin, a dawt leh ah chuan Mizo history kha rewrite kan sawi hlawm a a lawmawm hle mai. Pu Zothangliana YLA President a nih lai hian kei Central YMA President ka ni a, ‘YMA te, YLA te, MTP te hi in unau ang u, i thawk ho ang u’, ti turin Lawngtlai-ah kan thawk phei. Lawngtlai-ah District Council Hall-ah kan meeting a, ruah a sur nasa si a, an CM Pu Rohnuna khan chaw min eipui a. Kan theih tawpin unau kan nih kan va sawipui a, chuta MTP Secy. in a thusawi ka rilrua thi theilo chu, ‘A Pu Sangkung, Mizo history K.Zawla ziah te, Liangkhaia ziah te ka chhiar, Mara hi Mizo list-ah a tello reng reng,’ a ti tlat mai a ni. Ka lo hre der mai silo a. Ka haw a, history ka keu nasa a, Mizo list-ah Mara ka hmu ta reng reng lo mai a. Pu B. Lalthangliana hi ka han phone a, a ni a ziak zau deuh ka ti a. Pu Thangliana, ‘History-ah hian Mara hi Mizo-ah kan lo telh na nge’ ? ka ti a. Pawi, saw lama Lai te kha chu Mizo hnamah kan telh a, mahse Mara kha an lo telh miah lo. Pu Lalthangliana chuan, ‘nia mawle, kei chuan ka telh kha’, a ti a. Pu B. Lalthangliana’n Mara chu Mizo an ni a lo ti hlauh a ni.

Nichina kan Minister zahawm tak Pu Lalrinmawia sawi ang khan Tripura ami te, khawthlang lam Lal ropui tak tak Bangladesh ami te chanchin kan

history a kan ziah loh chuan lai lal ropui tak tak te, Mara lal ropui tam tak te ziah ngaihna alo awmlo reng reng, kan thlen chin a tawi lutuk a. Chuvangin, hei hi chu vawiina kan inlungual dan en hian kan history hi chu ennawn a, rewrite a ngai a ni tih lo langin ka hria a.

Tin, mihringten harsatna kan tawh hian inpuih tawn hi inpumkhatna tha em em niin ka hria. Hman deuha Mumbai thil thlenga Israel nupa an thih khan an fa awmtu Indian nu mawl tak pakhat pawh kha Israela an chhungte khan an lo ngaina em em a. A chhan chu naute kha alo duat a, hel awmlai pawha alo chhan tlat avangin. Nazi ho in Juda ho an suat vanglai a German mi, Israel lo humtu Israel hoin an ngaihsan dan zia te en ila. Mi an harsatna tawh lai lo tanpui hi kan Lalpa zirtirna nen a inang thlap a ni

Chuvangin, kan House Leader leh member dang zawng zawng pawhin in sawi ang khan kan unaute hi an harsat laia lo tanpui hi hreh lo ila, a vaiin kan ti thei lo ang a, amaherawhchu, kan lo lainat ani tih kan lo lan tir hi nakina inpumkhatna siamtu a ni ang. Kan sawi tel vek a, kan tihloh tur aiin kan tihur hi a pawimawh zawk, YMA President ka nih lai chuan han ti leh thin ila, Chapchar Kut apiangin Manipur leh Tripura-a kan unaute phurh chhoh tur tiin Motor kan tum ziah thin. Tunlai in an la ti em ka hre lova. Manipur-ah pawh a chi hrang hrang Hmar te, Paihte te, Vaiphei, Simte, Kom leh Zo hnahthlak apiang rawn sawm rawh u tiin kan chah ziah a ni. Kut hman ho leh seminar te hian mi a inpawh tir a ni. Kan Pastor te pawh in pulpit-a sawi nuam an tih leh keini pawhin ngaihthlak nuam kan tih chu Korea emaw, USA emaw, England-ah emaw seminar an neih te, an paper present te, an seminar neih a ni. Keini pawhin khawilai emaw foreign a kan kal ve chhun te hi kan sawi ve fo a nia. Hei hian inunauna a siam si.

Inpawlkhawm hian inpawhna leh inunauna a siam a. Chuvangin Chapchar Kut kan tih te hi hei ai hian han hmang rei ta hret ila. Hmanah ni 5 kan ti a, kan tlin miah lo rei lutuk chu, kal tur kan hmu ta lo. An ni ho tan a bika bus lian 2 Manipura thawn an lo thleng te hi chu an hmel hi uang tak a ni a. Nuam an ti vet tlat, in hmukhawma chet ho vang a ni. Zana Aizawl eng mawi an tih zia te an sawi chhen mai a ni. Aizawl hi zanah electric engah a mawi reng a, a nuam em em mai a ni.

Chuvangin, hetiang zawng te a kan inkalpawh tial tial kan hotuten tuna in tih mek ang leh Bible in a sawi anga in unau tura beih chhonzawm zel na lam hi uar deuh deuh a tha mang e.

Chutichuan, Pu Deputy Speaker, ka resolution putluh “Zofa-te inpumkhatna daltu chu engmah tih ni lo rawh se”, tih hi min pass pui theuh turin he House hi ka sawm nawn leh e, ka lawm e.

**DEPUTY SPEAKER** : Tunah chuan House Leader telin member 20-in kan sawi a, khang sawi zawng zawng khan he resolution hi kan pawmpui vek niin a lang a, chuvangin buk a ngai lova. Rem ti lo kan awm em ? Resolution neituin pawmpui turin a rawn ngen a, rem ti lo kan awm em ? Awm lo maw?

Pu T. Sangkunga resolution “Zofa-te inpumkhatna daltu chu engmah tih ni lo rawh se”, tih chu House in lungrual takin a pass/adopt ta a ni. (Pu T. SANGKUNGA : Pu Deputy Speaker, ka lawm e.)

Awle, Resolution chu kan adopt-ta a. Hei, kan hun darkar 1 deuhthawin kan pel a. Amaherawhchu, thahnemngai takin ram tan kan sawi ho a, a lawmawm a. Kan duh tawk tawh ang a. Tichuan ni 23.3.2015 (Monday) ah 10:30 AM ah kan thukhawm leh dawn nia.

Sitting is adjourned (5:05 PM).